

लूका

लूका यीशु केर जीवन केर बारे में लिखेक

१ बहुत आदमीमान हमार बीच में घटाल बातमान केर ब्यौरा लिखेक केर प्रयत्न करलाए। २ ओहे बातमान मोके उ आदमीमान केर द्वारा बताल गेलाक, जेमान उसोउब के शुरु से घटेक देईख रहाए आउ जेमान सुसमाचार केर प्रचारक रहाए। ३ हे मान्यवर थियुफिलुस! काहेकि मोयं शुरु सेहे सोउब कुछ के बड़ी सावधानी से अध्ययन कईरौ ईकारलाई मोयं ईके उचित सोंचलों कि मोय भी तोर लागिण ईकार एक क्रमानुसार बिबरण लिखबौं। ४ जेकार से तोयं उ बातमान केर निश्चितता के जाईन ले जेके तोके सिखाल जाए राहे।

जकरयाह आउर ईलीशिबा

५ उ समय जेखान यहूदिया में हेरोदेस केर राज राहे हुवाँ जकरयाह नाम केर एकझन यहूदी याजक राहे जे उपासना कारोईया केर अबिग्याह समुदाय^१ केर राहे। उकार पत्नी केर नाम ईलीशिबा आउर उ हारून केर परिवार से राहे। ६ उमान दुनोझन धर्मी रहाए। उमान बिना कोनो दोष से प्रभु केर सोभे आदेशमान आउर नियममान के पालन करत रहाए। ७ किन्तु उमान केर कोनो संतान नी रहाए, काहेकि ईलीशिबा बाँझ राहे आउर उमान दुनोझन बहुते बूढ़ा होए जाए रहाए।

८ जेखान जकरयाह केर समुदाय के मन्दिर में याजक केर काम केर पारी राहे, आउर उ परमेश्वर केर सामने उपासना केर लाई उपस्थित राहे। ९ तो याजकमान में चाईल आवाल परम्परा केर अनुसार पर्ची डाईलके उके चुनाल गेलाक कि उ प्रभु केर मन्दिर में जाएके धूप जलाओक। १० जेखान धूप जलाएक केर समय होलाक होले बाहिरे जमा होवाल आदमीमान प्रार्थना करत रहाए।

११ ओहे समय जकरयाह केर सामने प्रभु के एकझन दूत प्रकट होलाक। उ धूप केर वेदी केर दाहिना दिगे खड़ा राहे। १२ जेखान जकरयाह उ दूत के देखालक होले उ घबराए गेलाक आउर डर उके जकईडतो लेलाक जाईसान। १३ आउर प्रभु केर दूत उके कहलक, “जकरयाह न डराओ, तोर प्रार्थना सुईन लेवाल गेलाक।

१४ १:५ अबिग्याह समुदाय यहूदी याजकमान के २४ समुदाय में बाँटाल जाए राहे। देखाबे १ ईति. २४

ईकार लाई तोर पत्नी ईलीशिबा एकझन बेटा के जन्म देई, तोयं उकार नाम यूहन्ना रखबे। १५ उ तोके तो आनन्द आउर खुशी देबे कारी, उकार सागें उकार जन्म से आउर भी बहुत आदमीमान खुश होबाए। १६ काहेकि उ प्रभु केर दृष्टि में महान होवी। उ कहियौ भी कोनो दाखरस या कोनो भी मदिरा के सेवन नी करी। अपन जन्म काल सेहे उ पवित्र आतमा से परिपूर्ण राही।

१७ “उ ईसाएल केर बहुत आदमीमान के उमानकेर प्रभु परमेश्वर केर दिगे घुईरकेर आवेक लाई प्रेरित करी। १८ उ एलिय्याह केर शक्ति आउर आतमा में मजबूत होएके प्रभु केर आगे आगे चाली। उ बापमान केर हृदय उमान केर संतानमान केर दिगे वापस घुराई देवी आउर उ आज्ञा नी मानेक वाला मानके ऐसान विचार केर दिगे प्रेरित करी जेकार से उमान धर्मिमान केर जैसान विचार करवाए। ई सोउब, उ आदमीमान के प्रभु केर खातिर तैयार करेक केर लाई करी।”

१९ “सेखान जकरयाह प्रभु केर दूत के कहलक, “मोयं ईके कैसान जानबौं कि ई सच हेके? काहेकि मोयं एकझन बूढ़ा आदमी हेकों आउर मोर पत्नी भी बूढ़ीया होए जाहे।”

२० “सेखान प्रभु केर दूत उत्तर देईके उके कहलक, “मोयं जिब्राईल हेकों। मोयं उझन हेकों जे परमेश्वर केर सामने खड़ा रहोना। मोके तोर से बात करेक आउर ई सुसमाचार के बताएक केर लाई भेजाल जाहे। २१ किन्तु देख! काहेकि तोयं मोर शब्द में, जे निश्चित समय आवेक में सत्य सिद्ध होई, विश्वास नी करले, ईकारलाई तोयं गूंगा होए जाबे आउर उ दिन तक नी बोलेक पारबे जेखान तक ई पूरा नी होए जाई।”

२२ उदिगे बाहिरे आदमीमान जकरयाह के ओगरात रहाए। उमान अचरज होवात रहाए कि उ ईतना देरी मन्दिर में काहे रुईके काईके। २३ आउर जेखान उ बाहिरे आलाक तो उमान के बोलेक नी पारात राहे। उमान के लगलक कि मन्दिर केर भीतरे उके कोनो दर्शन होहे। उ गूंगा होए जाए राहे आउर केवल ईसारा करत राहे। २४ आउर ऐसान होलाक कि जेखान उकार उपासना केर समय पूरा होए गेलाक होले उ वापस अपन घर चाईल गेलाक।

२५ थोड़ा दिन पिछे उकार पत्नी ईलीशिबा गर्भवती होलाक। पाँच महीना तक उ सोउबकार से अलग थलग

रहलक। उ कहलक, २५“अखिर अन्त में जाएके ई प्रकार प्रभु मोर सहायता करलक। आदमीमान केर बीच मोर लाज रखेक लाई उ मोर सुधि लेलाक।”

कुंवारी मरियम

२६-२७ईलीशिबा केर जेखान छ महीना चलात राहे, गलील केर एकठु नगर नासरत में परमेश्वर द्वारा सोरगदूत जिब्राईल के एक कुंवारी केर टिन भेजाल गेलाक जेकार यूसुफ नाम केर एकझन व्यक्ति केर सागें सगाई होए चुईक राहे। उ दाऊद केर वंशज राहे। आउर उ कुंवारी केर नाम मरियम राहे। २८जिब्राईल उकार टिन आलाक आउर बोललक, “तोर में अनुग्रह होहे, तोर जय होओक। प्रभु तोर सागें आहे।”

२९ई वचन सुईन के उ बहुत घबराए गेलाक, उ सोच में पईइ गेलाक कि ई अभिवादन केर अर्थ का होएक पारी?

३०सेखान सोरगदूत उके कहलक, “मरियम, न डराओ, तोर से परमेश्वर खुश आहे। ३१सुन! तोयं गर्भवती होबे आउर एक बेटा के जनम देबे आउर तोयं उकार नाम यीशु रखबे। ३२उ महान होई आउर उ परमप्रधान केर बेटा कहलाई। आउर प्रभु परमेश्वर उके उकार आबा दाऊद केर सिंहासन प्रदान करी। ३३उ अनन्त काल तक याकूब केर घराना में राईज करी तथा उकार राईज केर अंत काहियो नी होई।”

३४हे से मरियम सोरगदूत के कहलक, “ईठु सच कैसान होएक सकी? काहेकि मोयं तो एखान कुंवारी आहों।”

३५उत्तर में सोरगदूत उके कहलक, “तोर टिन पवित्र आतमा आवी आउर परमप्रधान केर शक्ति तोके अपन छावों में ले लेवी। ऐसान से उ जनम लेवेक वाला पवित्र बालक परमेश्वर केर बेटा कहलाई। ३६आउर ईके भी सुन कि तोर कुटुम्ब केर ईलीशिबा केर गर्भ में भी बुढापा में एक बेटा आहे आउर उकार गर्भ केर एखान छठावाँ महीना हेके। आदमीमान कहात रहाए कि उ बाँझ आहे। ३७किन्तु परमेश्वर केर लाई कोनो भी असम्भव नैखे।”

३८मरियम कहलक, “मोयं प्रभु केर दासी हेकों। जैसान तोयं मोर लागिन कहले, वैसाने होक!” आउर सेखान उ सोरगदूत उकार टिन से चाईल गेलाक।

जकरयाह आउर ईलीशिबा केर टिन

मरियम केर जाएक

३९ओहे कईदिन में मरियम तैयार होएके तुरन्त यहूदिया केर पहाड़ी प्रदेश में स्थित एकठु नगर में चाईल गेलाक।

४०आउर उ जकरयाह केर घर पहुँचलक आउर उ

ईलीशिबा के अभिवादन करलक। ४१होलाक ई कि जेखान ईलीशिबा मरियम केर अभिवादन सुनलक होले जे छौवा उकार पेट में राहे, उखालक आउर ईलीशिबा पवित्र आतमा से अभिभूत होए गेलाक।

४२जोर आवाजमें पुकाईर के उ बोललक, “तोयं सोभे स्त्रिमान में सोउबसे अधिक भाग्यशाली हेकिस आउर जे छौवा के तोयं जन्म देबे, उ धन्य हेके। ४३किन्तु ई ईतना बड़का बात मोर सागें काहे घटलक कि मोर प्रभु केर माँ मोर टिन आलाक! ४४काहेकि तोर अभिवादन केर शब्द जैसाने मोर कान में पहुँचलक, मोर पेट में बच्चा खुशी से उछाईल गेलाक। ४५तोयं धन्य हेकिस, जेहार ईके विश्वास करलक कि प्रभु जे कुछ कईहे उसोउब होए के राही।”

मरियम द्वारा परमेश्वर केर स्तुति

४६सेखान मरियम कहलक,

४७ “मोर आतमा प्रभु केर स्तुति कराये;
मोर आतमा मोर रखवाला परमेश्वर में
आनन्दित आहे।

४८ उ अपन दीन दासी केर सुधि लेलाक,
हाँ आईज केर बाद
सोभे मोके धन्य कहबाँए।

४९ काहेकि उ शक्तिशाली मोर लाई महान काम
करलक।

उकार नाम पवित्र आहे।

५० जेमान उके डराएना उ उमान में पीढ़ी से पीढ़ी दया
करेला।

५१ उ अपन हाथमान केर शक्ति दिखालक।

उ अहंकारी आदमीमान के उमानकरे
अभिमानपूर्ण विचार केर सागें तितर-बितर
कईर देलाक।

५२ उ सम्राटमान के उमान केर सिंहासनमान से नीचे
उतराए देलाक।

आउर उ विनम्र आदमीमान के ऊँचा उठालक।

५३ उ भूखाल आदमीमान के अच्छा वस्तुमान से भरपूर
कईर देलाक,

आउर धनी आदमीमान के खाली हाथ में
लौटाए देलाक।

५४ उ अपन दास ईझाएल केर सहायता करेक आलक
हमार पुरखामान के देवाल वचन केर अनुसार

५५ उके ईब्राहीम आउर उकार वंशज में सोभे समय दया
दिखाएक केर याईद राहे।”

५६ मरियम लगभग तीन महीना तक ईलीशिबा केर सागें रहलक आउर अपन घर घुईर आलाक।

यूहन्ना का जनम

५७ आउर ईलीशिबा केर छौवा के जनम देवेक केर समय आलक आउर उकार घरे एकझन बेटा पैदा होलाक।

५८ जेखान उकार पड़ोसिमान आउर उकार परिवार केर आदमीमान सुनलाँए कि प्रभु उकार में दया दर्शाहे होले सोभेकोई उकार साथे मिल के खुशी मनालाँए।

५९ आउर ऐसान होलाक कि आठवां दिन बालक के खतना करेक केर लाई आदमीमान हुवाँ आलाँए। उमान उकार बाप केर नाम केर अनुसार उकार नाम जकरयाह रखेक खोजात रहाँए, ६० सेखने उकार माँएहर बोईल उठलक, “नाए, ईकार नाम तो यूहन्ना रखेक होई।”

६१ सेखान उमान उके बोललाँए, “तोहरेकेर कोनो भी सम्बन्धी केर ई नाम तो नैखे।” ६२ आउर उमान ईसारा में उकार आबा के पूछलाँए कि उ उके का नाम देवेक खोजाथे?

६३ एहे से जकरयाह उमान के लिखेक केर लाई एकटु शिलेट माँगलक आउर लिखलक, “ईकार नाम हेके यूहन्ना।” एसानसे उमान सोब अचरज में पईड़ गेलाँए। ६४ सेखने तुरथे उकार मुँख खोलाए गेलाक आउर उकार बात फूईट निकाललक। उ बोलेक लगलक आउर परमेश्वर केर स्तुति करेक लगलक। ६५ ईसान से सोभे पड़ोसी डराए गेलाँए आउर यहूदिया केर सोउब पहाड़ी क्षेत्र में आदमीमान में ई सोउब बातमान केर चर्चा होएक लगलक। ६६ जे केहो भी ई बात सुनलाँए, अचरज में पईड़के कहेक लगलाँए, “ई बालक का बनी?” काहेकि प्रभु केर हाथ उकार में आहे।

जकरयाह केर स्तुति

६७ सेखान उकार आबा जकरयाह पवित्र आतमा से अभिभूत होए उठलक आउर उ भविष्यवाणी करलक:

६८ “ईसाएल केर प्रभु परमेश्वर केर जय होओक काहेकि उ अपन आदमीमान केर सहायता केर लाई आहे आउर उमान के स्वतन्त्र करलक।

६९ उ हमार लाई अपन सेवक दाऊद केर परिवार से एकझन रक्षक प्रदान काईरहे।

७० जैसान कि उ बहुत पहिले अपन पवित्र

भविष्यवक्तामान केर द्वारा वचन देई राहे।

७१ उ हमरेके हमार शत्रुमान से आउर उ सोउब केर हाथ से,

जेमान हमरे के घृणा करात रहाँए, हमार छुटकारा केर वचन देई राहे।

७२ हमार पुरखामान में दया देखाए के अपन पवित्र वचन के याईद रखेक केर।

७३ उकार वचन राहे एकटु उ शपथ जेके हमार पूर्वज ईब्राहीम केर साथे लेवाल जाए राहे

७४ कि हमार शत्रुमान केर हाथ से हमारा छुटकारा होक आउर बिना कोनो डर से प्रभु केर सेवा करेक केर अनुमति मिलोक।

७५ आउर अपन जीवन भईर हर दिन उकार सामने हमरे पवित्र आउर धर्मी राहेक सकबोई।

७६ “हे बालक, एखान तोयं परमप्रधान केर नबी कहलावे,

काहेकि तोयं प्रभु केर आगे-आगे चईल के उकार लागिन रास्ता तैयार करबे।

७७ आउर उकार आदमीमान के कहेबे कि उमान केर पापमान केर क्षमा द्वारा उमानक उद्धार होई।

७८ “हमार परमेश्वर केर कोमल अनुग्रह से एक नौतून दिन केर इंजोत हमार में ऊपरे से उतरी।

७९ उकार में चमकेक केर लाई जे मृतु केर गहन छावों में जीयात आहाँए ताकि हमार गोदमान के शांति केर मार्ग केर दिशा मिली।”

८० ऐसानहे उ बालक बढ़ेक लगलक आउर उकार आतमा दृढ़ से दृढ़तर होवेक लगलक। उ आदमीमान ठिन प्रकट होएक से पहिले तक निर्जन जगह में रहलक।

यीशु केर जनम

(मती १:१८-२५)

२ ?ओहे कईदिने में औगुस्तुस कैसर केर ओर से एकटु आज्ञा निकाललक कि सोभे रोमी जगत केर जनगणना करल जाई। ई पहिली जनगणना राहे। ई उ समय होए राहे जेखान सीरिया केर राईजपाल क्विरिनियुस राहे। ३तो गणना केर लाई हर कोई अपन अपन नगर गेलाँए।

यूसुफ भी, काहेकि उ दाऊद केर परिवार एवं वंश से राहे, ईकारलाई उ भी गलील केर नासरत नगर से यहूदिया में दाऊद केर नगर बैतलहम में गोलाक। ५ उ हुवाँ अपन मँगेतर मरियम के सागँ, (जे गर्भवती भी राहे), अपन नाम लिखवाएक जाए राहे। ६ ऐसान होलक कि सेखान उमान हुवाँए रहाँए, मरियम केर छौवा जनेक केर समय आए गोलाक। ७ आउ उ अपन पहिला बेटा के जनम देलाक। काहेकि हुवाँ सराय केर भीतरे उमान केर लाई कोनो जगह नी मिल राहे ईकारलाई उ उके कपड़ा में लपेईट के चरनी में लेटाए देलाक।

यीशु केर जनम् केर सूचना

८ ओहे समय हुवाँ उ क्षेत्र में बाहिरे खेत में कएझान गड़रिया रहाँए जेमान राईत केर समय अपन जाँक केर रखवाली करात रहाँए। ९ ओहे समय प्रभु केर एकझन सोरगदूत उमान केर ठिन प्रकट होलाक आउ उमान केर चाईरो दिगे प्रभु केर इंजोंत प्रकाशित होए उठलक। उमान डराए गेलाँए। १० सेखान सोरगदूत उमान के कहलक, “न डराआ, मॉयं तोहार लाई अच्छा समाचार आईनों, जेकार से सोभे आदमीमान के महा आनन्द होई। ११ काहेकि आईज दाऊद केर नगर में तोहार उद्धारकर्ता प्रभु मसीह केर जनम होहे। १२ तोहरे उके चिन्हेक केर चिन्हा होई कि तोहरे एकझन बालक के कपड़ा में लेपटाल, चरनी में सुताल पाबा।”

१३ ओहे समय अचानक उ सोरगदूत केर सागँ बहुत आउ सोरगदूत हुवाँ उपस्थित होलाँए। उमान ईके कईके प्रभु केर स्तुति करात रहाँए,

१४ “सोरग में परमेश्वर केर महिमा होक

आउ धरती में उ आदमीमान के शांति मिलोक
जेमान से उ खुश आहे।”

१५ आउ जेखान सोरगदूत उमान के छोईड़के सोरग घुईर गेलाँए तो उ गड़ेरियामान आपस में कहेक लगलाँए, “आवा हमरे बैतलहम जाबोई आउ जे घटना घईंटे आउ जेके प्रभु हमरे के बताहे, उके देखबा।”

१६ तो उमान जल्दीए चाईल देलाँए आउ हुवाँ जाँके उमान मरियम आउ यूसुफ के पालाँए आउ देखालाँए कि बालक चरनी में लेटाल आहे। १७ गड़ेरियामान जेखान उके देखालाँए होले ई बालक केर विषय में जे संदेश उमान के देवाल जाए राहे, उके उमान सोउब के बताए देलाँए। १८ जे केहोमान भी उमान केर सुनलाँए,

उमान सोभे गड़ेरियामान केर कहाल बात में आश्चर्य करेक लगलाँए। १९ किन्तु मरियम इ सोउब बातमान के अपन मन में बसाए लेलाक आउ उ उमानमे जेखने तेखने सोचेक लगलक। २० हुने उ गड़ेरियामान जे कुछ उमान सुईन रहाँए आउ देईख रहाँए, उ सोउब कुछ केर लाई परमेश्वर केर महिमा आउ स्तुति करते अपन अपन घर में घुईर गेलाँए।

२१ आउ जेखान बालक केर खतना केर आठवाँ दिन होलाक तो उकार नाम यीशु रखाल गोलाक। उके ई नाम उकार गर्भ में आवेक से भी पहिले सोरगदूत द्वारा देई देवाल जाए राहे।

यीशु मन्दिर में अर्पित

२२ आउ जेखान मूसा केर व्यवस्था केर अनुसार शुद्ध होएक केर दिन पूरा होलक होले उमान यीशु के प्रभु के समर्पित करेक केर लाई यरूशलेम लेई गेलाँए। २३ प्रभु केर व्यवस्था में लिखाल अनुसार, “हर पहिला नर सन्तान ‘प्रभु के समर्पित’ मानाल जाई।”^a २४ आउ प्रभु केर व्यवस्था कहेला कि, “एक जोड़ी पेरोंवा या पेरोंवा केर दुईठु बच्चा बलि चढ़ाएक चाहि।” तो उमान व्यवस्था केर अनुसार बलि चढ़ाएक लेई गेलाँए।^b

शमौन केर यीशु के दर्शन

२५ यरूशलेम में शमौन नाम केर एकझन धर्मी आउ भक्त व्यक्ति राहे। उ ईसाएल केर सुख-चैन केर रास्ता जोहात रहात राहे। पवित्र आतमा उकार सागँ राहे। २६ पवित्र आतमा द्वारा उके प्रकट कराल जाए राहे कि जेखान तक उ प्रभु के मसीह के दर्शन नी कईर लेवी, नी मोरी। २७ उ आतमा से प्रेरणा पाएके मन्दिर में आलक आउ जेखान व्यवस्था केर विधि केर अनुसार काम केर लाई बालक यीशु के उकार आयो-आबा मन्दिर में आनलाँए। २८ तो शमौन यीशु के अपन कोरा में उठाए के परमेश्वर केर स्तुति कईर के बोललक:

२९ “प्रभु, एखान तोयं अपन वचन केर अनुसार अपन दास मोके शांति केर साथ मुक्त कर,

३० काहेकि मॉयं अपन आईंख से तोर उ उद्धार केर दर्शन कईर चुकलाँ,

३१ जेके तोयं सोभे आदमीमान केर सामने तैयार करले।

^a २:२३ “हर ... जाए” देखाब निर्गमन १३:२, १२

^b २:२४ उद्धारण लेव्य १२:८

३२ ई बालक गैर यहूदिमान केर लाई तोर रास्ता के देखाएक केर हेतु इंजोत केर स्रोत हेके आउर तोर अपन ईसाएल केर आदमीमान केर लाई ई महिमा हेके।”

३३उकार माय-बाप यीशु केर लागिन कहल इ बात मात से अचरज में पईइ गेलाए. ३४आउर शमौन उके आशीर्वाद देलाक आउर उकार माँए मरियम के कहलक, “ई बालक ईसाएल में बहुतमान केर पतन या उत्थान केर कारण बनी आउर एकटु ऐसा चिन्ह ठहराय जाएक केर लाई निर्धारित कराल जाहे जेकार विरोध कराल जाई। ३५आउर तलवार से यहां तक कि तोर अपन प्राण भी छिदाए जाई जेकार से कि बहुतमान केर हृदय केर विचार प्रकट होए जाई।”

हन्नाह द्वारा यीशु के दर्शन

३६हुवाँए हन्नाह नाम केर एकझन महिला नबी राहे। उ अशेर केर गोत्र केर फनूएल केर बेटी राहे। उ बहुत बूढ़ीया राहे। अपन विवाह केर बस सात साल पिछे तक हे उ पति केर साथे राहे। ३७आउर चौरासी वर्ष तक उ वैसाने हे विधवा राहे। उ मन्दिर के कभी नी छोईइ राहे। उपवास आउर प्रार्थना करते करते उ राईत-दिन उपासना करते रहात राहे।

३८ओहे समय उ उछौवा आउर आयो-आबा केर ठिन आलक। उ परमेश्वर के धन्यवाद देलाक आउर जेमान यरूशलेम केर छुटकारा केर रास्ता जोहात रहाँए, उ सोउब के उ बालक केर बारे में बतालक।

यूसुफ आउर मरियम केर घर घुईर आवेक

३९प्रभु केर व्यवस्था केर अनुसार सोउब कारेकवाला विधि-विधान पूरा कई केर उमान गलील में अपन नगर नासरत घुईर आलाँए। ४०हुने उ बालक बढ़ते एवं हृष्ट-पुष्ट होते गेलाक। उ बहुत बुद्धिमान राहे आउर उकार में परमेश्वर केर अनुग्रह राहे।

बालक यीशु

४१फ़सह परब में हर वर्ष उकार आयो-आबा यरूशलेम जात रहाँए। ४२जेखान उ बारह साल केर होलाक होले आगे केर जैसान उमान परब में गेलाँए। ४३जेखान परब समाप्त होलाक आउर उमान घर घुरात रहाँए तो यीशु हुवाँए यरूशलेम में राई गेलाक किन्तु आयो-आबा के ईकार पता नी चाललक। ४४ई सोचलाँए कि उ भीइ

में कोनो ठिन आहे, उमान दिन भईर यात्रा करते रहाँए। आउर उमान उके अपन संबन्धिमान आउर सांगमान केर बीच खोजेक लगलाँए। ४५आउर जेखान उ उमानके नी मिललक तो उके खोजते खोजते उमान यरूशलेम घुईर आलाँए।

४६आउर एसान होलक कि तीन दिन पिछे उ उपदेशकमान केर बीच बैठ के, उमान केर बात सुनात राहे आउर उमान के प्रश्न पूछेक समय मन्दिर में उमान के मिललक। ४७उमान सोभे जेमान उकार से सुईन रहाँए, उकार सूझबूझ आउर उकार प्रश्नोत्तर मान से आश्चर्यचकित रहाँए। ४८जेखान उकार आयो-आबा उके देखेके उमान भाकुवाए राई गेलाँए। उकार आयो उके पूछलक, “बेटा, तोग्रं हमार सागें ऐसा काहे करले? तोर आबा आउर मोग्रं तोके खोजेक में बहुत व्याकुल राही।”

४९सेखान यीशु उके कहलक, “तोहरे मोके काहे खोजात रहा? का तोहरे नी जानाला कि मोके मोर आबा केर घर में होएक चाहि?” ५०किन्तु यीशु उमान के जे उत्तर देई राहे, उमान उके समईइ नी पालाँए।

५१आउर उ उमान केर सागें नासरत घुईर आलक आउर उमान केर आज्ञा के पालन करात राहलक। उकार आयो ई सोउब बातमान के अपन मन में रखते जात राहे। ५२आउर यीशु बुद्धि में, डील-डौल में आउर परमेश्वर तथा मनुष्यमान केर प्रेम में बढ़ेक लगलक।

यूहन्ना का संदेश

(मती ३:१-१२; मरकुस १:१-८; यूहन्ना १:११-२८)

३ ?तिबिरियुस कैसर केर शासन केर पन्द्रहवां साल में जेखान

यहूदिया केर राईजपाल पुन्तियुस पिलातुस राहे आउर उ प्रदेश केर चौथाई भाग केर राजामान में हेरोदेस गलील केर, उकार भाई फिलिप्पुस ईतूरैया आउर त्रखोनीतिस का, तथा लिसानियास अबिलेने केर अधीन में राहल शासक राहे।

१आउर हन्ना तथा कैफा महायाजक राहे, सेहे समय जकरयाह केर बेटा यूहन्ना केर ठिन जंगल में परमेश्वर केर वचन पहुँचलक। २होले यर्दन केर आसपास केर समूचा क्षेत्र में घुईर घुईर के उ पाप क्षमा केर लाई मन फिराव केर हेतु बपतिस्मा केर प्रचार करेक लगलक। ३भविष्यवक्ता यशायाह केर वचन केर पुस्तक में जैसान लिखाल आहे:

“केकरो जंगल में पुकारेक वाला शब्द:
 ‘प्रभु केर लाई रास्ता तैयार करा
 आउर उकार लाई डहार सीधा करा।
 ५ हर घाटी भईर देवाल जाई
 आउर हर पहाड़ आउर टिलहामान चेपटा होए
 जाई
 टेढ़ा-मेढ़ा आउर ऊचां-नीचा रास्ता
 समान कईर देवाल जाई।
 ६ आउर सोभे आदमीमान परमेश्वर केर उद्धार केर
 दर्शन करबाँए!’” यशायाह ४०:३-५

यूहन्ना उकारसे बपतिस्मा लेक आवाल अपार जन समूह के कहात राहे, “अरे साँप केर छौवामान! तोहरे के केहार चेताए देलाक कि तोहरे आवेक वाला क्रोध से बईच निकला? ‘परिणाममान केर द्वारा तोहरेके प्रमाण देवेक होई कि वास्तव में तोहरे केर मन फिर जाहे सेके। आउर आपस में ईके कहेक शुरु न करबा कि ‘ईब्राहीम हमारेकेर आबा हेके।’ मोयं तोहरे के कहार्थो कि परमेश्वर ईब्राहीम केर लाई ई पत्थरमान से भी बच्चा पैदा कईर सकेला। ‘गाछ केर सिकोड़ में कुठाईर राईख जाए चुईके आउर हर उ गाछ के जेसोउब उत्तम फल नी देवेला, काईट के गिराल जाई आउर उके आगुन में झोंईक देवाल जाई।’
 १० सेखान भीड़ से उके पूछलाँए, “होले हमरे के का करेक चाहि?”

११ उत्तर में उ उमान के कहलक, “जेकार ठिन दुईटु कुर्ता आहे, उ उके, जेकार ठिन नैखे, उकार सागों बाँईट लेओक। आउर जेकार ठिन भोजन आहे, उ भी ऐसेने करोक।”

१२ आउर उमान उके पूछलाँए, “हे गुरु, हमरे के का करेक चाहि?”

१३ एहे से उ उमान के कहलक, “जितना चाहि उकार से अधिक जामा न करबा।”

१४ काएज़न सैनिकमान उके पूछलाँए, “आउर हमरे के का करेक चाहि?”

तो उ उमान के बतालक, “जबारजस्ति केकरो ठिन से धन न लेबा। केकरो में झूठा दोष न लगाबा। अपन वेतन में संतोष राहबा।”

१५ आदमीमान जेखान बहुत आशा केर साथ रास्ता जोहात रहाँए आउर यूहन्ना केर बारे में अपन मन में ईके सोचात रहाँए कि कहीं एहे तो मसीह न लागे,

१६ सेखने यूहन्ना ईके कईके उ सोउब के उत्तर देलाक: “मोयं तो तोहरे के पानी से बपतिस्मा देवार्थो किन्तु उ जे मोर से अधिक सामर्थवान आहे, आवाथे, आउर

मोयं उकार जूता केर बन्धनी खोलेक योग्य भी न लागों। उ तोहरे के पवित्र आतमा आउर आगुन से बपतिस्मा देवी। १७ उकार हाथ में फटकेक केर सुपा आहे, जेकार से उ अनाज के भूसा से अलग कईर के अपने खलिहान में उठाए के राखेला। किन्तु उ भूसा के ऐसन आगुन में झोंईक देई जे केखनों नी निझेला।” १८ एहे रकाम ऐसेने आउर बहुत से शब्द से उ उमान के समझाए के सुसमाचार सुनात राहे।

यूहन्ना केर काम केर समाप्ति

१९ पिछे यूहन्ना उ चौथाई प्रदेश केर अधीनस्थ राजा हेरोदेस के उकार भाई केर पत्नी हिरोदिआस केर साथे उकार बुरा सम्बन्ध आउर उकार दोसरा बुरा काम केर लाई धामकालाक। २० सेहेसे हेरोदेस यूहन्ना के बंदी बनाएके, जे सोउब कुकर्म उ कईर राहे, उसोउब में एकटु कुकर्म आउर जोईड लेलाक।

यूहन्ना द्वारा यीशु केर बपतिस्मा

(मत्ती ३:१३-१७; मरकुस १:९-११)

२१ ऐसन होलाक कि जेखान सोउबकोई बपतिस्मा लेवात रहाँए तो यीशु भी बपतिस्मा लेलाक। आउर जेखान यीशु प्रार्थना करत राहे, सेखने आकाश खुईल गेलाक। २२ आउर पवित्र आतमा एकटु पेरोंवा केर देह धारण कईर के उकार में नीचे उतारलक आउर आकाशवाणी होलाक कि, “तोयं मोर दुलार बेटा हेकिस, मोयं तोर से बहुत खुश आहों।”

यूसुफ केर वंश परम्परा

(मत्ती १:१-१७)

२३ यीशु जेखान अपन सेवा कार्य शुरु करलक तो उ लगभग तीस साल केर राहे। ऐसन सोचाल गेलाक कि उ

एली केर बेटा यूसुफ राहे।

२४ एली मत्तात केर,
 मत्तात जे लेवी केर,
 लेवी जे मलकी केर,
 मलकी यन्ना केर,
 यन्ना यूसुफ केर,

२५ यूसुफ मत्तित्याह केर,
 मत्तित्याह आमोस केर,
 आमोस नहूम केर,
 नहूम असल्ल्याह केर,

- असल्याह नोगह केर,
 २६ नोगह मात केर,
 मात मत्तित्याह केर,
 मत्तित्याह शिमी केर,
 शिमी योसेख केर,
 योसेख योदाह केर,
 २७ योदाह योनान केर,
 योनान रेसा केर,
 रेसा जरुब्बाबिल केर,
 जरुब्बाबिल शालतियेल केर,
 शालतियेल नेरी केर,
 २८ नेरी मलकी केर,
 मलकी अदी केर,
 अदी कोसाम केर,
 कोसाम ईलमोदाम केर,
 ईलमोदाम ऐर केर,
 २९ ऐर यहोशुआ केर,
 यहोशुआ ईलाज़ार केर,
 ईलाज़ार योरीम केर,
 योरीम मत्तात केर,
 मत्तात लेवी केर,
 ३० लेवी शमौन केर,
 शमौन यहूदा केर,
 यहूदा यूसुफ केर,
 यूसुफ योनान केर,
 योनान ईलियाकीम केर,
 ३१ ईलियाकीम मेलिया केर,
 मेलिया मिन्ना केर,
 मिन्ना मत्तात केर,
 मत्तात नातान केर,
 नातान दाऊद केर,
 ३२ दाऊद यिशै केर,
 यिशै ओबेद केर,
 ओबेद बोअज केर,
 बोअज सलमोन केर,
 सलमोन नहशोन केर,
 ३३ नहशोन अम्मीनादाब केर,
 अम्मीनादाब आदमीन केर,
 आदमीन अरनी केर,
 अरनी हिस्मोन केर,
 हिस्मोन फिरिस केर,
 फिरिस यहूदाह केर,

- ३४ यहूदाह याकूब केर,
 याकूब ईसहाक केर,
 ईसहाक ईब्राहीम केर,
 ईब्राहीम तिरह केर,
 तिरह नाहोर केर,
 ३५ नाहोर सरूग केर,
 सरूग रऊ केर,
 रऊ फिलिग केर,
 फिलिग एबिर केर,
 एबिर शिलह केर,
 ३६ शिलह केनान केर,
 केनान अरफक्षद केर,
 अरफक्षद शेम केर,
 शेम नूह केर,
 नूह लिमिक केर,
 ३७ लिमिक मथूशिलह केर,
 मथूशिलह हनोक केर,
 हनोक यिरिद केर,
 यिरिद महललेल केर,
 महललेल केनान केर,
 ३८ केनान एनोश केर,
 एनोश शेत केर,
 शेत आदम केर,
 आउर आदम परमेश्वर केर बेटा राहे।

यीशु केर परीक्षा

(मत्ती ४:१-११; मरकुस १:१२-१३)

४ १पवित्र आतमा से भावित होएके यीशु यर्दन नदी से घुईर आलक। आतमा उके वीरान में रास्ता देखात राहे। २हुवाँ शैतान चालीस दिन तक उकार परीक्षा लेलाक। उ दिनमान में यीशु बिना कोनो खाएके राहे। आउर जेखान उ समय पूरा होलक होले यीशु के बहुत भूख लगलक।

३तो शैतान उके कहलक, “यदि तोयं परमेश्वर केर बेटा हेकिस, होले ई पत्थर से रोटी बईन जाएक कह।”

४एहे से यीशु उके उत्तर देलाक, “शास्त्र में लिखाल आहे:

‘मनुष्य केवल रोटी से नी जीएना।’”

व्यवस्था विवरण ८:३

५आउर शैतान उके बहुत ऊँचाई में लेई गेलाक आउर थोड़ा समय में सारा संसार केर राईजमान के उके

देखाएके, शैतान उके कहलक, “मोयं ई राईजमान केर सारा वैभव आउर अधिकार तोके देई देबों काहेकि उसोउब मोके देवाल जाहे आउर मोयं उके जेके चाहबों देई सकौना। होले यदि तोयं मोर उपासना करबे होले ई सोउब तोर होए जाई।”

यीशु उके उत्तर देईके कहलक, “शास्त्र में लिखाल आहे:

‘तोके बस अपन प्रभु परमेश्वर केर उपासना करेक चाहि।

तोके केवल उकरेहे सेवा करेक चाहि!’”

व्यवस्था विवरण ६:१३

सेखान उ उके यरूशलेम लेई गेलाक आउर हुवाँ मन्दिर केर सोबसे ऊँचा चोटी में लेई जाएके खड़ा कईर देलाक। आउर उके बोललक, “यदि तोयं परमेश्वर केर बेटा हेकिस होले हियाँ से अपने के नीचे गिराए दे! १०काहेकि शास्त्र में लिखाल आहे:

‘उ अपन सोरगदूतमान के तोर विषय में आज्ञा देई कि उमान तोर रक्षा करबाँए।’

भजन सहिता ११:११

११आउर लिखाल आहे:

‘उमान तोके अपन बाहों में ऐसान उठाए लेबाँए कि तोर गोढ़ तक कोनो पत्थर के नी छुवी।’”

भजन सहिता ११:१२

१२यीशु उत्तर देईके कहलक, “शास्त्र में ई भी लिखाल आहे:

‘तोयं अपन प्रभु परमेश्वर के परीक्षा में नी डालेक चाहि।’”

व्यवस्था विवरण ६:१६

१३तो जेखान शैतान उकार सोउब रकाम से परीक्षा लेई चुकलक होले उचित समय केर लाई उके छोईड़ के चाईल गेलाक।

यीशु केर काम केर शुरुवात

(मती ४:१२-१७; मार्कुस १:१४-१५)

१४आउर आतमा केर शक्ति से पूर्ण होएके यीशु गलील घुईर आलक आउर उ सोउब प्रदेश में उकार चर्चा फैलेक

लगलक। १५उ उमान केर आराधनालयमान में उपदेश देवेक लगलक। सोभेकोई उकार प्रशंसा करात रहाँए।

यीशु केर अपन देश घुईर आवेक

(मती १३:५३-५८; मार्कुस ६:१-६)

१६आउर उ नासरत में आलाक जहाँ उ पईल-बईद रहे। आउर अपन आदत के अनुसार सबल केर दिन उ यहूदी आराधनालय में गेलाक। जेखान उ पढ़ेक केर लाई खड़ा होलाक १७तो यशायाह नबी केर पुस्तक उके देवाल गेलाक। उ जेखान पुस्तक खोललक तो उके उ स्थान मिललक जहाँ लिखाल आहे:

१८“प्रभु केर आतमा मोरमें समय आहे

उ मोर अभिषेक कइहे ताकि मोयं दीनमान के सुसमाचार सुनाबों।

उ मोके बंदिमान के ईके घोषित करेक केर लाई कि उमान मुक्त आहाँए,

अन्धरामान के ई सन्देश सुनाएक कि उमान

आउर दृष्टि पाबाँए,

दलितमान के छुटकारा दिलाएक के आउर

१९ प्रभु केर अनुग्रह केर समय बताएक केर लाई भेजाल जाहों।”

यशायाह ६१:१-२; ५८:६

२०आउर उ पुस्तक बंद कईके सेवक के वापस देई देलाक। आउर उ नीचे बैठ गेलाक। आराधनालय में सोउब आदमीमान केर आँईख उखे देखात रहाँए। २१सेखान उ उमान के कहेक लगलक, “आईज तोहार सुनते हे शास्त्र केर ई वचन पूरा होलाक!”

२२हर कोई उकार बड़ाई करात रहाँए। उकार मुख से जे सुन्दर वचन निकलत रहे, उकार में सोउब चकित रहाँए। उमान बोललाँए, “का ई यूसुफ केर बेटा न लागे?”

२३आउर यीशु उमान के कहलक, “निश्चय तोहरे मोके ई कहावत सुनवाबा, ‘अरे वैद्य, स्वयं अपन ईलाज कर। कफ़रनहूम में तोर जे काममान केर विषय में हमरे सुईन राही, उ काममान के हियाँ अपन स्वयं केर नगर में भी कर।’” २४यीशु सेखान उमान के कहलक, “मोयं तोहरे के सच कहाथों कि अपन नगर में कोनो नबी केर मान्यता नी होवेला।

२५-२६“मोयं तोहरे के सच कहाथों ईसाएल में एलिय्याह केर समय में जेखान आकाश जैसान बन्द होए रहे आउर साढ़े तीन साल तक सारा देश में भयानक अकाल पईड़ रहे, सेखान हुवाँ अनगिनत विधवामान

रहाँ। किन्तु सैदा प्रदेश केर सारपत नगर केर एकझन विधवा के छोईड़ के एलिय्याह के केकरों आउर केर टिन नी भेजाल जाए राहे।

२०“आउर नबी एलिशा केर काल में ईसाएल में बहुत से कोढ़ी रहाँए किन्तु उमान में से सीरिया केर रहेक वाला नामान कोढ़ी के छोईड़ के आउर केखो शुद्ध नी करल जाए राहे।”

२१तो जेखान यहूदी आराधनालय में आदमीमान ईके सुनलाँए होले सोभे कोई के बहुत खिस उठलाक। २२होलेसे उमान खड़ा होलाँए आउर उमान उके नगर से बाहिरे डेकाईल देलाँए। उमान उके पहाड़ केर उ चोटी में लेई गेलाँए जाहाँ में उमानक नगर राहे ताकि उमान हुवाँ चट्टान से उके नीचे फेंईक देबाँए। २३किन्तु उ उमान केर बीच से निकार्ईल के दोसरा दिगे अपन रास्ता में चाईल गेलाक।

दुष्टात्मा से छुटकारा देवेक

(मरकुस १:२१-२८)

२१आउर उ गलील केर एकठु नगर कफरनहूम पहुँचलक आउर सब्त केर दिन आदमीमान के उपदेश देवेक लगलक। २२आदमीमान उकार उपदेश से आश्चर्यचकित रहाँए काहेकि उकार संदेश अधिकारपूर्ण होवात राहे।

२३हुवाँए उ आराधनालय में एकझन व्यक्ति राहे जेकार में दुष्टात्मा समाय राहे। उ ऊँचे स्वर में चिल्लालक, २४“हे यीशु नासरी! तोयं मोर से का चाहाथिस? का तोयं हमार नाश करेके आहिस? मोयं जानोना तोयं के हेकिस — तोयं परमेश्वर केर पवित्र पुरुष हेकिस!” २५यीशु झिड़ाईके उके कहलक, “चुप रह! ईकार से बाहिरे निकार्ईल आओ!” एहे से दुष्टात्मा उ व्यक्ति के आदमीमान केर सामने पटाईक देलाक आउर उके बिना कोनो हानि पहुँचाएके, उकार से बाहिरे निकार्ईल आलाक।

२६सोभे आदमीमान चकित रहाँए। उमान एक दोसरा से बात कईके बोललाँए, “ई कैसान वचन हेके? अधिकार आउर शक्ति केर साथ ई दुष्टात्मान के आज्ञा देवेला आउर उमान बाहिरे निकार्ईल आवेना।” २७उ क्षेत्र में आस-पास हर कहीं उकार बारे में समाचार फैलेक लगलक।

बीमारी स्त्री के ठीक करेक

(मती ८:१४-१७; मरकुस १:२९-३४)

२८जेखान यीशु आराधनालय के छोईड़ के शमौन केर घर चाईल गेलाक। शमौन केर साईस के बहुत बुखार चईद

राहे। उमान यीशु के उके सहायता करेक केर लाई विनती करलाँए। २९यीशु उकार मुढ़दिगे खड़ा होलाक आउर उ बुखार के डाँटलक। बुखार उके छोईड़ देलाक। उ जल्दी से खड़ा होए गेलाक आउर उकार सेवा करेक लगलक।

यीशु द्वारा बहुतमान के चंगा करेक

३०जेखान सूरज डुबात राहे तो जेकार टिन विभिन्न प्रकार केर बीमारी से ग्रस्त रोगी रहाँए, उ सोभे कोई के उकार टिन लानलाँए। आउर उ अपन हाथ उमान केर हर एकझन केर मुढ़ में राईख के उमान के चंगा कईर देलाक।

३१उमान केर बहुतझन में से दुष्टात्मान चिल्लाते ईके कहते बाहिरे निकार्ईल आलाँए, “तोयं परमेश्वर केर बेटा हेकिस।” किन्तु उ उमान के बोलेके नी देलाक, काहेकि उमान जानात रहाँए, “उ मसीह हेके सेके।”

यीशु केर दोसरा नगरमान में यात्रा

(मरकुस १:३५-३९)

३२जेखान फाजिर होलाक होले उ हुवाँ से सुनसान जगह में चाईल गेलाक। किन्तु भीड़ उके खोजते खोजते हुवाँ जाए पहुँचलाँए जहाँ उ राहे। उमान जोर करलाँए कि उ उमान के छोईड़ के न जाओक। ३३किन्तु उ उमान के कहलक, “परमेश्वर केर राईज केर सुसमाचार मोके दोसरा नगरमानों में भी पहुँचाएक आहे काहेकि मोके ईकरे लाई भेजाल जाहे।”

३४आउर एसान से उ यहूदिया केर आराधनालयमान में निरन्तर उपदेश करेक लगलक।

यीशु केर पहिला चेला

(मती ४:१८-२२; मरकुस १:१६-२०)

५ १बात एसान होलाक कि भीड़ में आदमीमान यीशु के चाईरों दिगे से घेईर के जेखान परमेश्वर केर वचन सुनात रहाँए आउर उ गन्नेसरत नामक झील केर किनार में खड़ा राहे। २सेखने उ झील केर किनार में दुईठु नाव देखलक। उकार से मछुआरामान निकार्ईल के अपन जाल साफा करात रहाँए। ३यीशु ओहे में से एकठु नाव में चढ़लक जेठु शमौन केर राहे, आउर उ नाव के किनार से थोड़ा हटाएक लेवेक कहलक। आउर उ नाव में बैठ गेलाक आउर ओहे नाव से जनसमूह के उपदेश देवेक लगलक।

४जेखान उ उपदेश समाप्त कईर चुकलक तो उ शमौन के कहलक, “गहरा पानी केर दिगे जा आउर मछरी धारेक केर लाई अपन जाल डाल।”

“शमौन बोललक, “स्वामी, हमरे सारा राईत कठिन परिश्रम करली, लेकिन हमरे के कोनो नी मिललक, किन्तु तोयं कहथिस ईकारलाई मोंयं जाल डाईले देवाथों!”
 ६जेखान उमान जाल फेंईक देलाँए तो बहुत संख्या में मछरी धाराए गेलाँए। उमानक जाल फाटेक जैसान होत राहे। ७सेहेसे उमान दोसर नाव में बैठाल अपन साथिमान के संकेत देईके सहायता केर लाई बोलालाँए। उमान आए गेलाँए आउर उमान दुनों नाव में ईतना मछरी लाईद देलाँए कि उ डूबेक लगलक।

८-९जेखान शमौन पतरस ईके देखालक तो उ यीशु केर चरण में गिर के बोललक, “प्रभु मोंयं एकझन पापी मनुष्य हेकों। तोयं मोर से दूरे रह।” उ ईके ईकारलाई कई राहे कि ईतना मछरी बटोईर पाएक केर कारण उके आउर उकार सोभे साथिमानो के बहुत अचरज होवात राहे। १०जब्दी केर बेटा याकूब आउर यूहन्ना केहो भी, (जे शमौन केर साथी राहे) बहुत आश्चर्य-चकित होलाँए।

तो यीशु शमौन के कहलक, “न डराओ, काहेकि एखान से आगे तोयं मनुष्यमान के बटोरबे।”

११ओर उमान अपन नावमान के किनार में लानलाँए आउर सोब कुछ छोईड के यीशु केर पीछे चलेक लगलाँए।

कोदी के शुद्ध करेक

(मत्ती ८:१-४; मार्कुस १:४०-४५)

१?होले ऐसान होलक कि जेखान यीशु एकठु नगर में राहे सेखने हुवाँ कोद से पूरा ग्रस्त एकझन कोदी भी राहे। जेखान उ यीशु के देखलक तो दण्डवत प्रणाम कईरके उके प्रार्थना करलक, “प्रभु, यदि तोयं चाहबे होले मोके ठीक कईर सकिसिला।”

२?सेहेसे यीशु अपन हाथ बढ़ाए के कोदी के ऐसान कईके छुलाक, “मोंयं चाहाथों, ठीक होए जा।” आउर तुरथे उकार कोद छुटेक लगलक। ३?आउर यीशु उके आज्ञा देलाक कि उ ई विषय में केखो कोनो न कहोक कईके। उके कहलक, “याजक केर ठिन जा आउर उके अपन के देखाव आउर मूसा केर आदेश केर अनुसार भेंट चढ़ाओ ताकि आदमीमान के तोर ठीक होएक केर प्रमाण मिलोक।”

४?किन्तु यीशु केर विषय में समाचार आउर अधिक जल्दी से फैलात राहे। आउर आदमीमान केर दल ईकट्टा होएके उकार बात सुनेक आउर अपन बीमारिमान से छुटकारा पाएक उकार ठिन आवात राहाँए। ५?किन्तु यीशु प्रायः प्रार्थना करेक कोनो सुनसान हाबी में जात राहे।

लकवा केर रोगी के चंगा करेक

(मत्ती ९:१-८; मार्कुस २:१-१२)

१?ऐसान होलक कि एक दिन जेखान उ उपदेश देत राहे होले हुवाँ फ़रीसी आउर यहूदी धर्मशास्त्रीमानों बैठ रहाँए। उ गलील आउर यहूदिया केर हर नगर तथा यरूशलेम से आवाल रहाँए। आदमीमान के ठीक करेक केर लाई प्रभु केर शक्ति उकार सागें राहे। २?सेखने काएझन आदमीमान खाटीया में लकवा केर एकझन बिमारी के लेईके उकार ठिन आलाँए। उमान उके भीतरे लाईनके यीशु केर सामने रखेक केर यत्न करत रहाँए। ३?किन्तु भीड़ केर कारण उके भीतरे लानेक केर रास्ता नी पाएके उमान ऊपरे छाईन में चाढ़लाँए आउर उमान उके उकार डिसना समेत छाईन केर मांझे से खापीर हटाएके यीशु केर सामने उताराए देलाँए। ४?उमान केर विश्वास के देईखके यीशु कहलक, “हे सागीं, तोर पाप क्षमा होलक।”

५?सेखान यहूदी धर्मशास्त्री आउर फ़रीसीमान आपस में सोचेक लगलाँए, “ई के हेके जे परमेश्वर केर लाई ऐसान अपमान केर शब्द बोलाथे? परमेश्वर के छोईड के दोसरा के आहे जे पाप क्षमा कईर सकेला?”

६?किन्तु यीशु उमानकेर सोच-विचार के समईझ गेलाक। तो उत्तर में उ उमान के कहलक, “तोहरे अपन मन में ऐसान काहे सोचाथा? ७?सहज का हेके? ईके कहेक कि ‘तोर पाप क्षमा होलक’ या ईके कहेक कि ‘उठ आउर चाईल जा?’ ८?श्लेकिन ईकार लाई कि तोहरे जाईन लेवा कि मनुष्य केर बेटा केर धरती में पाप क्षमा करेक केर अधिकार आहे।” उ लकवा माराल के कहलक, “मोंयं तोके कहाथों, खड़ा हो, अपन डीसना उठाव आउर घर चाईल जा।”

९?होलेसे उ तुरथे खड़ा होलाक आउर उमान केर देखते देखते जे डीसना में उ लेटाल राहे, उके उठाए के परमेश्वर केर स्तुति करते करते अपन घर चाईल गेलाक। १०?उमान सोभे जेमान हुवाँ रहाँए आश्चर्यचकित होएके परमेश्वर केर गुणगान करेक लगलाँए। उमान श्रद्धा आउर विस्मय से भईर गेलाँए आउर बोललाँए, “आईज हमरे कोनो अद्भुत देखलि।”

लेवी (मत्ती) यीशु केर पीछे चलेक लगलक

(मत्ती ९:९-१३; मार्कुस २:१३-१७)

१?ईकार पिछे यीशु चईल गेलाक। सेहे बेरा उ चुंगी केर चौकी में बैठाल लेवी नाम केर एकझन मासुल वसूलेक वाला के देखलक। उ उके बोललक, “मोर पीछे चाईल आओ!” २?होले उ खड़ा होलाक आउर सोब कुछ छोईड के उकार पीछे होए गेलाक।

२९आउर लेवी अपन घर में यीशु केर सम्मान में एकठु स्वागत समारोह करलाक। हुवाँ मासुल वसूलेक वाला आउर दोसरा आदमीमान केर एकठु बड़का जमाहट में उमान केर सागें खाना खात राहे। ३०सेखान फरीसी आउर धर्मशास्त्रीमान उकार चेलामान के ई कईके आपति करलाँए कि, “तोहरे मासुल वसूलेक वाला आउर पापीमान केर सागें काहे खावा-पीया कराला?”

३१उत्तर में यीशु उमान के कहलक, “भाला-चगाँ आदमीमान के नई, लेकिन बीमारीमान के वैद केर आवश्यकता होएला। ३२मोय्रं धर्मीमान के नई, लेकिन पापीमान के मन फिराएक केर लाई बोलाएक आहों।”

उपवास केर विषय में यीशु केर कहेक

(मत्ती ९:१४-१७; मार्कुस २:१८-२२)

३३उमान यीशु के कहलाँए, “यूहन्ना केर चेलामान प्रायः उपवास रखेना आउर प्रार्थना करेना। आउर ऐसनेहे फरीसीमान केर अनुयायी मान भी करेना किन्तु तोर अनुयायी मान तो हर समय खाते पीते राहेना।”

३४यीशु उमान के पूछलक, “का दूल्हा केर गोतियामान जेखान तक दूल्हा उमान केर सागें राहेला, होले उपवास करेना कि? ३५किन्तु उ बेरा भी आवी जेखान दूल्हाके उमान से छीन लेवाल जाई। आउर उ बेरा में उमान भी उपवास करबाँए।”

३६उ उमान के एकठु दृष्टांत कथा आउर कहलक, “केहो भी कोनो नौतून पोशाक से कोनो टुकड़ा फाईड के उके पुरना पोशाक में नी लगाएना आउर यदि केहो ऐसान करबाँए होले उकार नौतून पोशाक तो फटबे धारी, सागें उ नौतून टापलि भी पुरना पोशाक केर सागें मिल नी खाई।

३७केहो भी पुरना कलसी में नौतून दाखरस नी भोराएना आउर यदि भोराबाँए होले नौतून दाखरस पुरना कलसी के फुटाए देई। उठु बिखाईर जाई आउर कलसी भी नष्ट होए जाई। ३८आदमीमान सोउब समय नौतून दाखरस नौतून कलसी में भोराएना। ३९पुरना दाखरस पी के केहो भी नौतून केर चाहात नी करेना काहेकि उ कहेला, ‘पुरनाए ठु आछा आहो।’”

सब्त केर प्रभु यीशु

(मत्ती १२:१-८; मार्कुस २:२३-२८)

६ १अब ऐसान होलाक कि सब्त केर एक दिन यीशु जेखान अनाज केर खेत बाटे से जात राहे होले उकार चेलामान अनाज केर बाईल के नोईच के, हाथ में रागाईड के उसोउब के खाते जात रहाँए। २सेखने काएझन

फरीसीमान कहलाँए, “जेके सब्त केर दिन करेक उचित न लागे, उके तोहरेमान काहे कराथा?”

३उत्तर देईके यीशु उमान के पूछलक, “का तोहरे नी पईढ़ा जेखान दाऊद आउर उकार सांगमान भूखे रहाँए, सेखान दाऊद का कईर राहे? ४का तोहरे नी पईढ़ा कि उ परमेश्वर केर घर में डुईक के, परमेश्वर के अर्पित रोटि उठाएके खाए राहे आउर उमानोके देई राहे, जेमान उकार सागें रहाँए? जबकि याजकमान के छोईडके उके खाएक केकरो केर लाई भी उचित नी राहे?” ५उ आगे कहलक, “मनुष्य केर बेटा सब्त केर दिन केर भी प्रभु हेके।”

यीशु द्वारा सब्त केर दिन बीमारी के अच्छा करेक

(मत्ती १२:९-१४; मार्कुस ३:१-६)

६दोसरा सब्त केर दिन ऐसान होलक कि उ यहूदी आराधनालय में जाके उपदेश देवेक लगलक। हुवाँए एकझन ऐसान व्यक्ति राहे जेकार दाहिना हाथ मुरझाय जाए राहे। ७हुवाँए यहूदी धर्मशास्त्रि आउर फरीसीमान ईके देखेक केर ताक में रहाँए कि उ सब्त केर दिन केखो चंगा करी कि नई। ताकि उमान उके दोष लगाएक केर कोनो कारण पाए सकबाँए। ८उ उमान केर विचारमान के जानात राहे, तो उ उझान मुरझाल हाथ वाला व्यक्ति के कहलक, “उठ आउर सोउब कार सामने खड़ा होए जा।” उ उठलक आउर हुवाँ खड़ा होए गेलाक। ९सेखान यीशु आदमीमान के कथा, “मोय्रं तोहरे के पूछाथें सब्त केर दिन केखो भला करेक उचित हेके या केकरो हानि पहुँचाएक, केकरो जीवन बचाएक उचित हेके या केकरो जीवन के नष्ट करेक?”

१०यीशु चाईनों दिगे उ सोउब में नजाईर करलक आउर उके कहलक, “अपन हाथ सीधा कर।” उ वैसाने करलक आउर उकार हाथ आउर अच्छा होए गेलाक। ११किन्तु ईकार से आग बबूला होएके उमान आपस में विचार करेक लगलाँए कि यीशु के का करल जाई?

बारह प्रेरितमान के चुनेक

(मत्ती १०:१-४; मार्कुस ३:१३-१९)

१२ओहे बेरा ऐसान होलाक कि यीशु प्रार्थना करेक केर लाई एकठु पहाड़ में गेलाक आउर गोटा राईत परमेश्वर के प्रार्थना कईरके बिताए देलाक। १३आउर जेखान फजिर होलाक होले उ अपन अनुयायिमान के आपन ठिन बोलालक। उमान में से उ बारहझन के चुनलक जेमान के उ “प्रेरित” नाम देलाक:

१४ शमौन (जेके उ पतरस कहलक)

आउ उकार भाई अन्द्रियास,
याकूब आउ
यूहन्ना,
फिलिप्पुस,
बरतुलमै,

१५ मत्ती,

थोमा,
हलफ्रई केर बेटा याकूब, आउ
शमौन जिलौती;

१६ याकूब केर बेटा यहूदा, आउ

यहूदा ईष्करियोती (जे विश्वासघाती बनलक।)

यीशु केर आदमीमान के उपदेश

देवेक आउर चंगा करेक

(मत्ती ४:२३-२५; ५:१-१२)

१७ आउर यीशु उमान सागें पहाड़ से नीचे उताईर के सामान जगह में आएके खड़ा होलाक। हुवाँए उकार चेलामान केर भी एकठु बड़का भीड़ रहाँए। सागें समूचे यहूदिया, यरूशलेम, सूर आउर सैदा केर सागर किनार से अनगिनत आदमीमान हुवाँ आएके ईकड़ा होलाँए। १८ उमान उकार बात सुनेक आउर बीमारी से छुटकारा पावेक हुवाँ आए रहाँए। जेमान दुष्टात्माना से पीड़ित रहाँए, उमान भी हुवाँ आएके अच्छा होलाँए। १९ समूचा भीड़ उके छूवेक लाई यत्न में रहाँए काहेकि उकार से शक्ति निकलत राहे आउर उ सोउब कोई के निरोग बनाए देत राहे!

२० आउर अपन चेलामान के देखेक के उ बोललक:

“धन्य हेका तोहरेमान जेमान दीन हेका,

सोरग केर राईज तोहरे केर हेके,

२१ धन्य हेका तोहरेमान, जेमान एखान भूखे आहा,
काहेकि तोहरे तृप्त होबा।

धन्य हेका तोहरेमान जेमान आईज आँसू बहाथा,
काहेकि तोहरे आगे हँसबा।

२२ “धन्य हेका तोहरेमान, जेखान मनुष्य केर बेटा केर कारण आदमीमान तोहरे के घृणा करबाँए, आउर तोहरे के बहिष्कृत करबाँए, आउर तोहार निन्दा करबाँए, तोहार नाम बेया सोईचके काईट देबाँए। २३ उ बेरा तोहरे आनन्दित होएके उछलबा-कूदबा, काहेकि सोरग में तोहार लाई बड़का प्रतिफल आहे, उमान केर पूर्वजमान भी भविष्यवक्तामान केर सागें ऐसानेहे कईर रहाँए।

२४ “तोहरे के धिक्कार आहे, ओ धनीमान,
काहेकि तोहरे के पूरा सुख चैन मिलाथे।

२५ तोहरे के धिक्कार आहे, जेमान ई बेरा भरपेट आहा
काहेकि तोहरे भूखे राहबा।
तोहरे के धिक्कार आहे, जेमान ई बेरा हँसाथा,
काहेकि तोहरे शोकित होबा आउर कान्दबा।

२६ “तोहरे के धिक्कार आहे, जेखान तोहरे केर प्रशंसा होएला काहेकि उमान केर पूर्वजमान भी झूठा नबीमान केर सागें ऐसाने व्यवहार करलाँए।

अपन दुश्मान से भी प्रेम करा

(मत्ती ५:३८-४८; ७:१२)

२७ “हे सुनोईयामान! मोंग तोहरे के कहार्थो अपन शत्रु के भी प्रेम करा। जेमान तोहरे के घृणा करेना, उमान केर सागें भी भलाई करा। २८ उमान के भी आशीर्वाद देना, जेमान तोहरे के अभिशाप देवेना। उमान केर लाई भी प्रार्थना करबा जेमान तोहार सागें अच्छा व्यवहार नी करेना। २९ यदि केहो तोर गाल में थपड़ मारी होले दोसरा गालो के उकार दिगे आगे कईर देबा। यदि केहो तोर कोट ले लेई होले उके अपन कुर्ता के भी लेई लेक देबा। ३० जे केहो तोहरे के माँगबाँए, उके देबा। यदि केहो तोहार कोनो रईख लेई होले उके घुराए के न माँगबा। ३१ तोहरे अपन लाई जैसान व्यवहार दोसरा से चाहाला, तोहरेहो दोसरमान केर सागें वैसानेहे व्यवहार करेक लागि।

३२ “यदि तोयं बस ओहेमान के प्यार करबे, जेमान तोके प्यार करेना, होले ईकार में तोर का बड़ाई? काहेकि अपन के प्रेम करेक वाला तो पापीमानों भी प्रेम कराएना। ३३ यदि तोयें बस ओहेमान केर भलाई करबे, जेमान तोर भलाई करेना, होले तोर का बड़ाई? ऐसान तो पापी मानों कराएना। ३४ यदि तोयें केवल ओहेमान के उधार देवे, जेमानसे तोके वापस मिलेक केर आशा आहे, होले तोर का बड़ाई? ऐसान तो पापी भी पापीमान के देवेना कि उमानके उमानक पूरा रकम वापस मिल जाओक।

३५ “लेकिन अपन शत्रु के भी प्यार करा, उकार सागें भलाई करा। कोनो भी घुराए पाएक केर आशरा छोईड के उधार देबा। एहे प्रकार तोहार प्रतिफल महान होई आउर तोहरे परम परमेश्वर केर संतान बनबा काहेकि परमेश्वर अकृतज्ञों आउर दुष्ट आदमीमान में भी दया करेला। ३६ जैसान तोहार परम पिता दयालु आहे, वैसानेहे तोहरो भी दयालु बना।

अपन के जाना

(मती ७:१-५)

३७“केखो दोषी न कहबा होले तोहरे केओ भी दोषी नी कहाल जाई। केखो खंडन नी करबा होले तोहरे केओ भी खंडन नी कराल जाई। क्षमा करबे, तोके भी क्षमा मिली। ३८दोसरामान के देबे, तोके भी देवाल जाई। उमान पूरा नाईप के दबाए-दबाए के आउर हिलाए-हिलाए के बाहिरे निकलेक तक तोर झोली में दाईल देवाँए काहेकि जे नाप से तोयं दोसरामान के नापीसिला, ओहे से तोके भी नापाल जाई।”

३९उ उमान के एकटु दृष्टान्त कहलक, “का कोनो अन्धरा कोनो दोसरा अन्धरा के रास्ता देखाएक सकेला? का उमान दोनोझन कोनो गढ़ा में नी जाए गिरबाँए? ४०कोनो विद्यार्थी अपन पढ़ाएक वाला से बड़का नी होए सकेना, किन्तु जेखान कोनो व्यक्ति भालसे सिद्ध होएला होले उ अपन गुरु केर समान बईन जाएला।

४१“तोयं अपन भाई केर आँईख में कोनो जाबड़ा के काहे देखिसिला आउर अपन आँईख केर लट्टा भी तोके नी सूझेला? ४२तो अपन भाई के तोयं कैसान कहेक पारबे: ‘सागीं, तोयं अपन आँईख केर जाबड़ा के मोके निकलाएक दे कईके।’ जेखान तोयं अपन आँईख केर लट्टा तक के नी देखेख पाथिस! अरे कपटी, पहिले अपन आँईख केर लट्टा गुच्चाओ, सेखान तोयं अपन भाई केर आँईख केर जाबड़ा के बाहिरे निकलाएक केर लाई देखेख पाबे।

दुई प्रकार केर फल

(मती ७:१७-२०; १२:३४ब-३५)

४३“कोनो भी ऐसन आछा गाछ नैखे जेकार में खारब फल लगेला। न तो कोनो ऐसन खारब गाछ आहे, जेकार में आछा फल लगेला। ४४हर गाछ अपन फल से हे जानाए जाएला। आदमीमान काँटाँ झुड़ से अंजीर नी बिछाएना। न तो कोनो झड़लोता से आदमीमान अंगूर तोराँएना। ४५एकझन अच्छा मनुष्य उकार मन से अच्छाई केर जे भण्डार आहे, उकरे से अच्छा बातमान के उपजाएला। आउर एकझन खारब मनुष्य, जे उकार मन में बुराई आहे, उकरे से बुराई पैदा करेला। काहेकि एकझन मनुष्य मुँख से उखे बोलेला, जे उकार हृदय से उफाईन्द के बाहिरे आवेला।

दुई प्रकार केर आदमी

(मती ७:२४-२७)

४६“तोहरे मोके ‘प्रभु, प्रभु’ काहे कहाला आउर जेमान

के मोंय कहोना, उकार में नी चलाला? ४७जे केहो मोर टिन आवेना आउर मोर उपदेश सुनेना आउर उरकाम केर आचरण करेना, उमान कोन प्रकार केर राहेना, मोंय तोहरे के बताथो। ४८उझन उ व्यक्ति केर समान आहे जे घर बनाथे। उ बागरा खुदाई ककरलक आउर चट्टान में नेंव डाललक। आउर जेखान बाढ़ आलक आउर पानी केर सोत उ घर से टकरालक तो ई उके हिलाएक तक नी सकलक, काहेकि उठु बहुत अच्छा से बनल राहे।

४९“किन्तु जेमान मोर उपदेश सुनेना आउर उरकाम नी चलेना, उमान उ व्यक्ति केर समान आहाँए जेहार बिना नेंव केर माटि में घर बनलक। पानी केर सोत उकार से टकरालक आउर उठु तुरन्त धाईस गेलाक आउर पूरा तहस-नहस होए गेलाक।”

विश्वास केर शक्ति

(मती ८:५-१३; यूहन्ना ४:४३-५४)

७ १यीशु आदमीमान के जे बातमान के सुनाएक चाहात राहे, उसोउब के कहल पिछे उ कफरनहूम चाईल आलाक। १हुवाँ एकझन सेनानायक राहे जेकार दास ईतना बीमर राहे कि मोरके पर राहे। उ सेवकझन उकार बहुत प्रिय राहे। ३सेनानायकझन जेखान यीशु केर विषय में सुनलक होले उ काईझन बुजुर्ग यहूदी नेतामान के ई अनुरुध करेक केर लाई उकार टिन भेजलक कि उ आएके उकार सेवक केर प्राण बचाए लेओक। ४जेखान उमान यीशु केर टिन पहुँचलाँए तो उमान सच्चा मन से अनुरुध कईके कहलाँए, “उ ई योग्य आहे कि तोयं उकार लाई ऐसन कईरे दे। ५काहेकि उ हमार आदमीमान के प्रेम करेला। उ हमार लाई आराधनालय के निर्माण करुवाए देहे।”

६सेहेसे यीशु उमान केर सागें चाईल देलाक। जेखान उ घर से बेसि दूर नी राहे, उ सेनानायकझन उकार टिन अपन संगमान के ईके कहेक केर लाई भेजलक, “हे प्रभु, अपन के कष्ट न दे। काहेकि मोंयं ईतना अच्छा नैखों कि तोयं मोर घर में आबे। ७ईकरेलाई मोंयं तोर टिन आवेक केर नी सोचलौं। किन्तु तोयं बस कई दे आउर मोर सेवक आच्छा होए जाई। ८मोंयं स्वयं दोसरा अधिकारी केर नीचे काम करेक वाला व्यक्ति हेकों आउर मोर नीचे भी सैनिकमान आहाँए। मोंयं जेखान केखो कहोना कि ‘जा’ होले उ चाईल जाएला आउर जेखान दोसरा के कहोना कि ‘आव’ होले उ आए जाएला। आउर जेखान मोंयं अपन दास से कहोना, ‘ईके कर’ होले उ उखे करेला।”

९यीशु जेखान ईके सुनलक होले उ उकार में बहुत

आश्चर्य होलाक। जे जन समूह उकार पीछे चाईल आवात रहॉए, उमान दिगे मुईड के यीशु कहलक, “मोंय तोहरे के बतार्थों ऐसन विश्वास मोके ईसाएल में भी कहावों नी मिल्ले।”

१०आउर भेजाल आदमीमान जेखान घुईर के घर पहुँचलाँए होले उमान उ सेवक के निरोग पालाँए।

मृतक के जीवन-दान

११आउर ऐसन होलाक कि यीशु नाईन नाम के एकठु नगर में चाईल गेलाक। उकार चेलामान आउर एकठु बड़का भीड़ उकार सागें रहॉए। १२उ जैसनेहे नगर-द्वार केर सामने आलाक होले हुवाँ से एकझन मुर्दा के लेई जात रहॉए। उ अपन विधवा माँए केर एकलौटा बेटा राहे। सेहेसे नगर केर अनगिनत आदमीमान केर भीड़ उकार सागें रहॉए। १३जेखान प्रभु उके देखलक होले उके उकार में बहुत दया लगलक। उ बोललक, “न कन्दा।” १४आउर उ आगे बढ़लक आउर उ बाक्सा के छुलक उ आदमीमान जे बाक्सा के लेई जात रहॉए, रोईख के खड़ा रहॉए। यीशु कहलक, “नौवोजवान, मोंय तोके कहाथों, खड़ा होए जा।” १५होले उ मोराल आदमी उईठ के बैठालक आउर बोलेक लगलक। यीशु उके उकार माँए के वापस घुराए देलाक।

१६आउर उमान सोभे श्रद्धा आउर विस्मय से भईर गेलाँए। आउर ईके कईके परमेश्वर केर महिमा करेक लगलाँए कि “हमार बीच एकझन महान नबी प्रकट होहे।” आउर कहेक लगलाँए, “परमेश्वर अपन आदमीमान के सहायता केर लाई आए जाहे।”

१७यीशु केर ई समाचार यहूदिया आउर आसपास केर गाँवमान में सोब दिगे फाईल गेलाक।

यूहन्ना केर प्रश्न

(मत्ती ११:२-११)

१८ई सोब बातमान केर विषय में यूहन्ना केर अनुयायिमान उके सोब के जाएके बतालाँए। होलेसे यूहन्ना अपन दुईझन चेलामान के बोलाएके १९उमान के प्रभु के ईके पुछेक लाई भेजलक: “का तोयं ओहे हेकिस, जे आवेक वाला आहे या हमरे दोसरा केकरो लाई रास्ता देखवोई?”

२०आउर उमान जेखान यीशु केर टिन पहुँचलाँए होले उमान कहलाँए, “बपतिस्मा देवक वाला यूहन्ना हमरे के तोके ईके पुछेक लाई भेईसे: ‘का तोयं ओहेझन हेकस जे आवेक वाला आहे या हमरे केहो दोसरे केर रास्ता देखवोई?’”

२१ओहे समय उ बहुत बीमारीमान के निरोग करलक आउर उमान के वेदनामान तथा दुष्टात्मान से छुटकारा देलाक। आउर बहुत अंधरामान के आँईख देलाक। २२आउर उ उमान के उत्तर देलाक, “जावा आउर जेसोउब के तोहरे देखला आउर सुनला, उसोउब के यूहन्ना के बतावा: अंधरा आदमीमान आउर देखेख पाथाँए, लँगड़ा लूला चाईल फिराथाँए आउर कोही शुद्ध होए गेलाँए। बहीरा सुईन पाथाँए आउर मुर्दा आउर जियाए जाथाँए। आउर गरीब आदमीमान के सुसमाचार सुनाल जाथे। २३उ व्यक्ति धन्य हेके जेकार से मोके स्वीकार करेक में कोनो समस्या नाखे।”

२४जेखान यूहन्ना केर संदेश लानेक वालामान चाईल गेलाँए होले यीशु भीड़ में आदमीमान के यूहन्ना केर बारे में बताएक शुरु करलक: “तोहरे बियाबान जंगल में का देखेक जाए रहा? का हवा में हिलेक कोनो खागड़ी? नाई? २५होले तोहरे का देखेक जाए रहा? का कोनो पुरुष जेहार बहुत आच्छा पोशाक पिन्धेक वाला के? नई, उ आदमीमान जेमान आच्छा पोशाक पिन्धेना आउर जेमान शुख-विलास केर जीवन जीएना, उमान तो राज-भवन में हे पावाए जाएना। २६किन्तु बतावा तोहरे का देखेक जाए रहा? का कोनो नबी? हाँ, मोंय तोहरे के बतार्थों कि तोहरे जेके देखला, उ कोनो नबी से बड़काझन के। २७ई ओहे हेके जेकार विषय में लिखाल जाहे:

‘देख मोंयं तोहरे से पहिले हे अपन दूत के भेजाथों,
उ तोरसे पहिले हे रास्ता तैयार करी।’

मलाकी ३:१

२८मोंयं तोहरे के बतार्थों कि कोनो स्त्री से पैदा होवालमान में यूहन्ना से महान् केहो नखाँए। किन्तु फिर भी परमेश्वर केर राईज केर छोटो से छोटो व्यक्ति भी उकार से बड़का आहे।”

२९(सेखान सोभे कोई, यहाँ तक कि मासुल वसूलेक वाला मान भी यूहन्ना केर बात सुईन के उकार से बपतिस्मा लेईके ईके माईन लेलाँए कि परमेश्वर केर डहर सत्य आहे। ३०किन्तु फरीसीमान आउर व्यवस्था के जानोईयामान उकार से बपतिस्मा नी लेईके उमान केर सम्बन्ध में परमेश्वर केर ईच्छा के नकाईर देलाँए।)

३१“होले से ई पीढ़ी केर आदमीमान केर तुलना मोंय केकार सागें करबों कि उमान कैसान आहाँए? ३२उमान बाजार में बैठाल उ छावामान केर समान आहाँए जेमान एक दोसरा के पुकाईर के कहेना:

‘हमरे तोर लागिन बाँसुरी बजालि लेकिन
तोयं नी नाचले।
हमरे तोर लागिन शोक-गीत
गीतालि लेकिन तोयं नी कन्दले।’

३३काहेकि बपतिस्मा देवेक वाला यूहन्ना आलाक जे न तो रोटी खात राहे आउर न ही दाखरस पीयात राहे आउर तोहरे कहाला, ‘उकार में दुष्टात्मा आहे।’ ३४आउर खाते पीते मनुष्य केर बेटा आलाक, लेकिन तोहरे कहाला, ‘देखा ई पेटु हेके, पियकड़ हेके, मासुल वसूलेक वाला आउर पापीमान केर सागौं हेके।’ ३५बुद्धि केर उत्तमता तो उकार परिणाम सेहे सिद्ध होएला।”

शमौन फ़रीसी

३६एकझन फ़रीसी अपन सागौं खाएक लाई उके निमंत्रन करलक। तो उ फ़रीसी केर घर गेलाक आउर उकार हुवाँ खाएक लाई बैठलक।

३७ओहे नगर में उ बेरा एकझन पापी स्त्री राहे, उ जेखान ईके गोम पालाक कि उ एकझन फ़रीसी केर घर खाना खाथे तो उ संगमरमर केर एकठु पात्र में ईत्र लेईके आलाक। ३८उ उकार पीछे उकार चरण दिगे खड़ा राहे। उ कन्दांत राहे। अपन आँईखपानी से उ उकार गोढ़ के भिजाँएक लगलक। आउर उ गोढ़ के अपन केशं से पोंछलक आउर चरण के चूर्ईम के उकार में ईत्र दाईल देलाक।

३९उ फ़रीसीझन जेहार यीशु के अपन घर बोलाए राहे, ईके देखके मन हे मन में सोचलक, “यदि ई मनुष्य नबी राहतक होले जाईन जाताक कि उके छूवेक वाली ई स्त्री के हेके आउर कैसान आहे? उ जाईन जाताक कि ई तो पापिनी हेके।”

४०उत्तर में यीशु उके कहलक, “शमौन, मोयं तोके कुछ कहेक आहे।”

उ बोललक, “गुरु, कह।”

४१यीशु कहलक, “कोनो साहूकार केर दुईझन कर्जदार रहाँए। एकझन में उकार पाँच सौ चाँदी केर सिक्का^a पाएक राहे आउर दोसराझन से पचास। ४२काहेकि उमान कर्ज नी लौटाएक पारात रहाँए ईकारलाई उ दया कईरके दुनोंझन केर कर्जा माफ़ कईर देलाक। एखान बताओ दुनोंझन में से उके अधिक प्रेम के करी?”

४३शमौन उत्तर देलाक, “मोर सोच से, ओहेझन जेझान केर उ अधिक कर्जा छोईद देलाक।”

a ७:४१ चाँदी केर सिक्का या “दीनारी,” रोमन सिक्का जेठु कि एक दिन केर औसत मज़दूरी राहे।

यीशु कहलक, “तोयं उचित विचार करले।” ४४आउर उझन स्त्री केर दिगे मुईड के उ शमौन के बोललक, “तोयं ई स्त्री के देखाथिस? मोयं तोर घर में आलों, तोयं मोर गोढ़ धोएक लाई मोके पानी नि देले किन्तु ई मोर गोढ़ आँईखपानी से भिजाँए देलाक। आउर उके अपन केशं से पोंछलक। ४५तोयं स्वागत में मोके नि चूमले किन्तु ई जेखान से मोयं भीतेर आहों, मोर गोढ़ के लगातर चूमते आहे। ४६तोयं मोर मूढ़ में तेल केर अभिषेक नि करले, किन्तु ई मोर गोढ़ में ईत्र छिड़कालक। ४७ईकार लाई मोयं तोके बताथों कि ईकार अगाध प्रेम दर्शाते कि ईकार बहुत से पाप क्षमा कईर देवाल गेलाक। किन्तु उ जेकार थोड़ा पापमान केर क्षमा मिललक, उ थोड़ा प्रेम करेला।”

४८सेखान यीशु उ स्त्री के कहलक, “तोर पाप क्षमा कईर देवाल गेलाक।”

४९आउर जेमान उकार सागौं खाना खात रहाँए, उमान मन ही मन सोचेक लगलौए, “ई के हेके जे पापमान के भी क्षमा कईर देवेला?”

५०सेखान यीशु उ स्त्री के कहलक, “तोर विश्वासो तोके रक्षा करलक। शान्ति से जा।”

यीशु अपन चेलामान केर सागौं

५१ईकार पिछे ऐसान होलाक कि यीशु परमेश्वर केर राईज केर सुसमाचार आदमीमान के सुनाते सुनाते नगर-नगर आउर गाँव-गाँव घुरेक लगलक। उकार बारहो चेलामान भी उकार सागौं रहात रहाँए। ५२उकार सागौं काईझन स्त्रीमान भी रहाँए जेमानके उ बीमारी आउर दुष्टात्मान से छुटकारा दिलाए राहे। ईमान में मरियम मगदलीनी नाम केर एकझन स्त्री राहे जेके सात दुष्टात्मान से छुटकारा मिल राहे। ५३(हेरोदेस केर प्रबन्ध अधिकारी) खुजा केर पत्नी योअन्ना भी ईमान सागौं राहे। सागौं सुसन्नाह तथा आउर बहुत स्त्रिमान भी रहाँए। ई स्त्रिमान अपन ही साधन से यीशु आउर उकार चेलामान केर सेवा केर प्रबन्ध करत रहाँए।

बीज बुनेक केर दृष्टान्त कथा

(मत्ती १३:१-१७; मरकुस ४:१-१२)

५४जेखान नगरमान से आएके आदमीमान केर बड़का भीड़ उकार टिन जमान होवात रहाँए, होले उ उमान के एकठु दृष्टान्त कथा कहलक:

५५“एकझन किसान अपन बीज बुनेक निकललक। जेखान उ बीज बुनलाक तो थोड़ा बीज रास्ता किनार में गिरलाक आउर गोढ़ तले रूँदाँए गेलाक। आउर

चाराईमान उसोउब के चुईंग लेलाँए। १७थोड़ा बीज चट्टानी माटि में गिरलाक, उसोउब जेखान उगलक होले नमी केर नी होएक से मुरझाए गेलाक। १८थोड़ा बीज काँटा झुँड में गिरलाक। काँटा केर बढेक भी उकार सागें होलाक आउर काँटामान उसोउब के दबोईच देलाक। १९आउर थोड़ा बीज उपजाउ माटि में गिरलाक। उसोउब उगलक आउर उसोउब से सौ गुना अधिक फसल होलाक।”

ई बातमान के बताएके उ जोर से कहलक, “जेकार ठिन सुनेक केर कान आहे, उ सुईन लेओक।”

२०उकार चेलामान उके पूछलाँए, “ई दृष्टान्त कथा केर का अर्थ हेके?”

१०होले उ बतालक, “परमेश्वर केर राईज केर रहस्य जानेक केर सुविधा तोहरे के देवाल जाहे किन्तु दोसरामान के ई रहस्य दृष्टान्त कथामान केर द्वारा देवाल जाहे ताकि:

‘उमान देखेखकेओ
नि देखेख पालाँए
आउर सुईनकेओ
नि समईझ पालाँए।’

यशायाह ६:९

बीज बुनेक केर दृष्टान्त केर व्याख्या

(मती १३:१८-२३; मरकुस ४:१३-२०)

११“ई दृष्टान्त कथा केर अर्थ ई हेके: बीज परमेश्वर केर वचन हेके। १२उसोउब बीज जेसोउब रास्ता किनार में गिर राहे, उसोउब उ व्यक्तिमान हेकाँए जेमान जेखान वचन के सुनेना, होले शैतान आवेला आउर वचन के उमान केर मन से निकलाए लेई जाएला ताकि उमान विश्वास नि करेक पारोक आउर उमान केर उद्धार न होओक। १३उसोउब बीज जेसोउब चट्टानी माटि में गिर राहे उकार अर्थ हेके, उमान व्यक्ति जेमान जेखान वचन के सुनेना होले उके आनन्द केर साथ अपनाएना। किन्तु उमान केर भीतरे उकार जड़ नि जाईम पाएला। उमान थोड़ा समय केर लाई विश्वास करेना किन्तु परीक्षा केर समय में उमान डगमगाँए जाएना।

१४“आउर जेसोउब बीज काँटा झुँड में गिर राहे, उकार अर्थ हेके, उमान व्यक्ति जेमान वचन के सुनेना किन्तु जेखान उमान अपन रास्ता में चलेना होले चिन्तामान धन-दौलत आउर जीवन केर भोग विलास उमान के दबाए देला, जेकार से उसोउब में केखनों पकाल फसल नि होएक परेला। १५आउर अच्छा माटि में गिराल बीज केर अर्थ हेके उमान व्यक्ति जेमान अच्छा आउर सच्चा मन से जेखान वचन के सुनेना होले उसोउब के धारण

करेना। आउर अपन धिराज केर सागें उमान उत्तम फल देवेना।

अपन सत्य केर उपयोग करा

(मती ४:२१-२५)

१६“केहो भी कोनो दिया के बर्तन केर नीचे ढकेक लाई नि जलाएना। या उके ढीसना केर नीचे नि रखेना। लेकिन उमान उके दीवट में रखेना ताकि जे भीतरे आई उ इंजोत देखेख पाई। १७न कोनो गुप्त बात आहे जेके जानाए नि जाई आउर कोनो भी ऐसान छिपाल नईखे जे इंजोत में नि दिसाई। १८ईकार लाई ध्यान से सुना काहेकि जेकार ठिन आहे उके आउर भी देवाल जाई आउर जेकार ठिन नईखे, उकार जे कोनो उकार ठिन दिखाए देई, उके भी लेई लेवाल जाई।”

यीशु केर अनुयायी माने उकार सच्चा परिवार हेकाँए

(मती १२:४६-५०; मरकुस ३:३१-३५)

१९सेहेखान यीशु केर आयो आउर उकार भाई उकार ठिन आलाँए किन्तु उमान भीड़ केर कारण उकार सामने नि जाएक पारलाँए। २०ईकार लाई यीशु के ईके कहाल गेलाक, “तोर आयो आउर तोर भाई बाहिरे खड़ा आहाँए। उमान तोके मिलेक चाहाथाँए।”

२१किन्तु यीशु उमान के उत्तर देलाक, “मोर आयो आउर मोर भाई तो ई मान हेकाँए जेमान परमेश्वर केर वचन सुनेना आउर उकार में चालेना।”

चेलामानक यीशु केर शक्ति केर दर्शन

(मती ८:२३-२७; मरकुस ४:३५-४१)

२२ओहे समय एक दिन ऐसान होलाक कि उ अपन चेलामान केर सागें एकठु नाव में चढ़लक आउर उमान के बोललक, “आवा, झील केर उ पार जावोई।” होले उमान बान्धाल के खोललाँए। २३जेखान उमान नाव चलात रहाँए, यीशु निन्दाई गेलाक। झील में आँधी-तूफान उठलक। उमान केर नाव में पानी भरेक लगलक। उमान संकट में पड़ई गेलाँए। २४सेहेसे उमान उकार ठिन आलाँए आउर उके जगाएके कहेक लगलाँए, “स्वामी! स्वामी! हमरे डूबाथी।”

आउर उ खड़ा होलाक आउर उ आँधी तथा लहर के धामकालक। उसोउब थाईम गेलाक आउर हुवाँ शान्ति छाप गेलाक। २५आउर उ उमान के पूछलक, “कहाँ गेलाक तोहरे केर विश्वास?”

किन्तु उमान डराए जाए रहाँ आउर अचरज में पईड जाए रहाँ। उमान आपस में बोललाँ, “आखिर ई के हेके जे हवा आउर पानी दुनों के आज्ञा देवेला आउर उसोउब उके मानेना?”

दुष्टात्मा से छुटकारा

(मती ८:२८-३४; मरकुस ५:१-२०)

१६आउर उमान गिरासेनियों मान केर प्रदेश में पहुँचलाँ जेटु गलील झील केर सामने किनार में राहे। १७जैसानेहे उ किनार में उतारलक, नगर केर एकझन व्यक्ति उके मिललक। उकार में दुष्टात्मान सामाय रहाँ। बहुत लम्बा समय से उ न तो कपड़ा पिन्धात राहे आउर न ही उ घर में रहात राहे, लेकिन उ कबरस्थान में रहात राहे।

१८-१९जेखान उ यीशु के देखालक होले हल्ला करते उकार सामने गिर के जोर से बोललक, “हे परम प्रधान (परमेश्वर) केर बेटा यीशु, तोयं मोरसे का चाहाथिस? मोंय विनती कराथों मोके दुख न दे।” उ उ दुष्टात्मा के उ व्यक्ति में से बाहिरे निकलेक केर आदेश देई राहे, काहेकि उ दुष्टात्मा उ मनुष्य के बहुत बार धाईर राहे। ऐसन समय में उके सिकड़ी से बाँईध के पहरा देईके रखाल जात राहे। किन्तु उ सोभे समय सिकड़ीमान के टुटाए देवात राहे आउर दुष्टात्मा उके जंगल में भगाए चालत राहे।

२०सेहे यीशु उके पूछलक, “तोर नाम का हेके?”

उ कहलक, “सेना।” (काहेकि उकार में बहुत दुष्टात्मान सामाए रहाँ।) २१उमान यीशु से तर्क-वितर्क केर साथे विनती करत राहे कि उ उमान के नरक गड़ा में जाएक केर आज्ञा न दे कईके। २२आउर देखा, सेहे बेरा हुवाँ पहाड़ में गाहोरिमान केर एकठु बड़का झुण्ड चारात रहाँ। दुष्टात्मान उके विनती करलाँ कि उ उमान के गाहोरिमान में जाएक दे कईके। होले उ उमान के अनुमति देई देलाक। २३ईकार से उ दुष्टात्मान उ व्यक्ति से बाहिरे निकललाँ आउर उ सुअरमान में दुईक गेलाँ। आउर गाहोरिमान केर उ झुण्ड नीचे उ ढासना से लुढ़कते पुढ़कते कुदते झील में जाए गिरलाँ आउर डूब गेलाँ।

२४झुण्ड केर चारवाहामान, जे कुछ होए राहे, उके देखके हुवाँ से भागलाँ। आउर उमान ई समाचार नगर आउर गाँव में जाएके सुनालाँ। २५आउर हुवाँ केर आदमीमान जे कुछ घईट राहे उके देखेक बाहिरे आलाँ। उमान यीशु से मिललाँ। आउर उमान उ व्यक्ति के जेकारमें से दुष्टात्मान निकार्इल रहाँ यीशु केर चरण में बैठाल पालाँ। उ व्यक्तिझन कपड़ा पिन्धके राहे आउर उकार दिमाग एकदम आच्छा राहे। एहेसे उमान

भी सोभे डराए गेलाँ। २६जेमान देखेख रहाँ, ओहेमान आदमीमान के बतालाँ कि दुष्टात्मा-ग्रस्त व्यक्ति कैसान ठीक होलाक। २७हे से गिरासेन प्रदेश केर सोभे निवासीमान उके प्रार्थना करलाँ कि उ हुवाँ से चाईल जाएक लाई काहेकि उमान सोभे बहुत डराए जाए रहाँ।

सेहेस यीशु नाव में आलाक आउर धुईर गेलाक। २८किन्तु जे व्यक्ति में से दुष्टात्मान निकला जाए राहे, उ यीशु के अपन के सागें लेई जाएक लाई विनती करत राहे। एहे से यीशु उके ईके कईके घुराए देलाक कि, २९“धर जा आउर जे कुछ परमेश्वर तोर लाई करलक, उके बताओ।”

होलेसे उ धुईरके, यीशु उकार लाई जे कुछ कईर राहे, उके सारा नगर में सोउब कोई के कहत राहलक।

बिमारी स्त्री केर अच्छा होएक आउर

मृत छोड़ी के जीवनदान

(मती ९:१८-२६; मरकुस ५:२१-४२)

४०देखातो जेखान यीशु घुरलाक होले जन समूह मान उकार स्वागत करलाँ काहेकि उमान सोभे उकार प्रतीक्षा में रहाँ। ४१सेखने याईर नाम केर एकझन व्यक्ति हुवाँ आलाक। उ हुवाँ केर यहूदी आराधनालय केर मुखिया राहे। उ यीशु केर चरण में गिरलाक आउर उके अपन घर आवेक केर लाई विनती करेक लगलक। ४२काहेकि उकार बारह साल केर एकझन एकलौती बेटा राहे, उ मोरेक पर राहे।

होलेसे यीशु जेखान जात राहे तो भीड उके चिपाए देत रहाँ। ४३हुवाँ एकझन स्त्री राहे जेकार बारह साल से खून बहत राहे। जे कुछ उकार ठिन राहे, उ डक्टरमान के देई खर्चा कईर देई राहे, लेकिन उ केकरो से भी ठीक नी होए पाए राहे।^a ४४उ उकार पीछे आलाक आउर उ उकार कपड़ा के आंचरा के छूलाक। आउर उकार खून जाएक तुरथे रुईक गेलाक। ४५सेखान यीशु पूछलक, “उ के हेके जेझान मोके छुलाक?”

जेखान सोभे कोई नाई कहात रहाँ, पतरस बोललक, “स्वामी, सोभे आदमीमान तो तोके घेईर देहाँ आउर उमान सोभे तो तोर में गिर जाथाँ।”

४६किन्तु यीशु कहलक, “केहो हर तो मोके छुईहाँ काहेकि मोके लगलक कि जैसान मोर में से शक्ति निकलक।” ४७उ स्त्रीझन जेखान देखलक कि उ छुईप राहेक नी पारि, होले उ काँपते काँपते आलक आउर यीशु केर सामने गिर गेलाक। हुवाँ सोभे आदमीमान केर सामने

^a ८:४३ उ ... राहे कोनो कोनो यूनानी प्रतिमान में ई शब्द नैखे।

उ बतालक कि उ उके काहे छुई राहे। आउर कैसान जल्दी से उ अच्छा होए गेलाक। ४८ एहे से यीशु उके कहलक, “बेटी, तोर विश्वास तोर उद्धार करलक। चैन से जा।”

४९ उ जेखान बोलते राहे कि यहूदी आराधनालय केर मुखिया केर घर से हुवाँ केहो आपके बोललाँए, “तोर बेटी मोईर गेलाक। सेहेसे गुरु के एखान आउर कष्ट न दे।”

५० यीशु ईके सुईन पालाक। होले उ उके बोललक, “न डराओ! विश्वास कर। उ बईच जाई।”

५१ जेखान यीशु उ घर में आलाक होले उ अपन सागें पतरस, यूहन्ना, याकूब आउर छोड़ी केर माए-बाप के छोईइ के केखो आउर मान के अपन सागें भीतरे नी आवेक देलाक। ५२ सोभे आदमीमान उ छोड़ी केर लाई कन्दात रहाँए आउर शोक करात रहाँए। यीशु बोललक, “कन्देक बंद करा। ई नी मोईरह, लेकिन निन्दाथे।”

५३ एहे से आदमीमान उकार हँसी उडालाँए। काहेकि उमान जानात रहाँए कि छोड़ीइज्जत मोईर सेके। ५४ किन्तु यीशु उकार हाथ के धारलक आउर जोर से कहलक, “बच्ची, खड़ा होए जा!” ५५ उकार आतमा घुईर आलाक, आउर उ तुरथे उईठ के बैठलक। यीशु आज्ञा देलाक, “ईके कोनो खाएक लाई देई देआ।” ५६ ईकार से छोड़ी केर माए बाप मान बहुत अचरज होलाँए किन्तु यीशु उमान के आदेश देलाक कि जे घटना घटलक, उके उमान केखो न बताओक कईके।

यीशु द्वारा बारह चेलामान केर भेजेक

(मती १०:५-१५; मरकुस ६:७-१३)

१ आउर यीशु बारहइज्जत चेलामान के एके सागें बोलालक आउर उमान के दुष्टात्मान से छुटकारा दिलाएक केर अधिकार आउर शक्ति प्रदान करलक। उ उमान के बिमारी दूर करेके केरो शक्ति देलाक। २ आउर उ उमान के परमेश्वर केर राईज केर सुसमाचार सुनाएक आउर बिमारीमान के चंगा करेक केर लाई बाहिर भेजलक। ३ उ उमान के कहलक, “अपन यात्रा केर लाई तोहरे कोनो सागें न लेंवा: न लाठी, न झोला, न रोटी, न चाँदी आउर न कोनो अतिरिक्त लुगा। ४ तोहरे जेकरो घर केर भीतरे जाबा, हुवाँए राहबा। आउर जेखान तक विदा नी लेबा, हुवाँए राहबा। ५ आउर जहाँ आदमीमान तोहरे के स्वागत नी करबाँए होले जेखान तोहरे उ नगर के छोड़बा तो उमान केर विरुद्ध में गवाही केर रूप में अपन गोढ़ केर धूला के झाईइ देबा।”

६ सेहेसे हुवाँ से जाएके उमान हर जगह सुसमाचार केर उपदेश देते देते आउर आदमीमान के चंगा करते सोभे गाँवमान से होएके यात्रा करेक लगालाँए।

हेरोदेस केर गालत सोच

(मती १४:१-१२; मरकुस ६:१४-२९)

७ जेखान एक चौथाई देश केर राजा हेरोदेस, जे कुछ होए राहे, उकार बारे में सुनलाक होले उ चिंता में पईइ गेलाक काहेकि कोनो कोनो आदमीमान केर द्वारा कहाल जात राहे, “यूहन्ना के मोरालमान में से जियाए देवाल जाहे।” ८ दोसरामान कहात रहाँए, “एलिय्याह प्रकट होहे।” केहो आउर मान कहात रहाँए, “पुरना युग केर कोनो नबी जी उईठे।” ९ किन्तु हेरोदेस कहलक, “माँय यूहन्ना केर तो मुढ़ काटवाए देई राहों, आउर ई के हेके जेकार बारे में माँय ऐसान बातमान सुनके पाथों?” होलेसे हेरोदेस उके देखेक केर जतन करेक लगलक।

पाँच हजार से अधिकइज्जत के खाना

(मती १४:१३-२१; मरकुस ६:३०-४४; यूहन्ना ६:१-१४)

१० आउर जेखान प्रेरितमान घुईर के आलाँए होले उमान जे सोउब के कईर रहाँए, सोब यीशु के बतालाँए। होलेसे उ उमान के हुवाँ से अपन सागें लेईके चुपचाप बैतसैदा नामक नगर में चाईल गेलाँए। ११ लोकिन भीड़मान के खाबर होए गेलाक होलेसे उमान भी उकार पीछे पीछे गेलाँए। यीशु उमान के स्वागत करलाक आउर परमेश्वर केर राईज केर विषय में उमान के बतालक। आउर जेमान के चंगा केर आवश्यकता राहे, उमान के चंगा करलक।

१२ जेखान साझं होवेक लगलक होले उ बारहइज्जत उकार ठिन आलाँए आउर बोललाँए, “भीड़ के विदा कर ताकि उमान आसपास केर गाँवों आउर खेतमान में जाएके बाशा आउर खाना पाए सकाबाँए काहेकि हमरे हियाँ बहुत दुर सुनसान जगह में आही।”

१३ किन्तु उ उमान के कहलक, “तोहरेहे ईमान के खाएक लाई कोनो देवा।”

उमान बोललाँए, “हमार ठिन बस पाँचटु रोटी आउर दुईटु मछरि के छोईइके आउर कोनो भी नखे। तोय ईके तो नी काहेक खोजाथिस कि हमरे जाबोई आउर ई सोबकार लाई खाना किनके लेई आनबोई।” १४ (हुवाँ लगभग पाँच हजार पुरुष रहाँए।)

किन्तु यीशु अपन चेलामान के कहलक, “उमान के पचास पचास केर समूह में बैठाए देवा।”

१५ होलेसे उमान वैसाने करलाँए आउर सोभेइज्जत के बैठाए देलाँए। १६ आउर यीशु पाँचटु रोटी आउर दुईटु मछरि के लेईके सोरग केर दिगे देईख के उमान केर लाई परमेश्वर के धन्यवाद देलाक आउर उसोउब के टुकड़ा कईरके उके अपन चेलामान के देलाक कि

उमान आदमीमान के बाइंट देओक। १७सेखान सोउब आदमीमान खाएके तृप्त होलाँए आउर बचाल टुकड़ा से उकार चेलामान बारह टोकरि में भोरालाँए।

यीशु हे मसीह हेके

(मती १६:१३-१९; मरकुस ८:२७-२९)

१८होलाक एसान कि जेखान यीशु एकला प्रार्थना करत राहे होले उकार चेलामान भी उकार सागें रहाँए। होले यीशु उमान के पूछलक, “आदमीमान का कहेना कि मोंय के हेकों?”

१९उमान उत्तर देलाँए, “बपतिस्मा देवेक वाला यूहन्ना, के केमान कहेना एलिय्याह किन्तु के केमान दोसराए कहेना प्राचीन युग केर कोनो नबी उईठ खड़ा होहे।”

२०यीशु उमान के कहलक, “आउर तोहरे का कहाला कि मोंय के हेकों?”

पतरस उत्तर देलाक, “परमेश्वर केर बेटा मसीह।”

२१किन्तु ई विषय में केखो भी नी बताएक केर चेतावनी देईके यीशु उमान के कहलक,

यीशु द्वारा अपन मृत्यु केर भविष्यवाणी

(मती १६:२१-२८; मरकुस ८:३०-९:१)

२२“ई निश्चित आहे कि मनुष्य केर बेटा बहुत रकाम यातनामान झेली आउर उ बुजुर्ग यहूदी नेतामान, याजकमान आउर धर्मशास्त्रीमान केर द्वारा नकारा जाएके मोरवाए देवाल जाई। आउर फिर तीसरा दिन जीवित कईर देवाल जाई।”

२३आउर उ उसोउब के कहलक, “यदि केहो मोर पीछे चलेक चाहेना होले उ अपन के इंकार करेक होई आउर उके हर दिन अपन क्रूस उठाएक होई। सेखान हे उ मोर पीछे चली। २४काहेकि जे केहो अपन जीवन बचाएक खोजेना, उ उके हेराए देई लेकिन जे केहो मोर लाई अपन जीवन के त्याग करबाँए, ओहे उके बचाएक पारी। २५काहेकि इंकार में कोनो व्यक्ति केर का लाभ आहे कि उ सारा संसार के तो प्राप्त कईर लेई किन्तु अपने के नष्ट कईर देवी या भटईक जाई होले। २६जे केहो भी मोर शब्दमान केर लाई लज्जित आहाँए, उकार लाई परमेश्वर केर बेटा भी जेखान अपन वैभव, अपन परमपिता आउर पवित्र सोरगदूतमान केर वैभव में प्रकट होवी होले उकार लाई लज्जित होई। २७किन्तु मोंय सच्चाई केर साथ तोहरे के कहाथों हियाँ केहोमान एसान आहाँए, जेमान सेखान तक मृत्यु केर स्वाद नी चखबाँए, जेखान तक परमेश्वर केर राज के देईख नी लेंबाँए।”

मूसा आउर एलिय्याह केर सागें यीशु

(मती १७:१-८; मरकुस ९:२-८)

२८ई शब्दमान के कहेक केर लगभग आठ दिन पिछे उ पतरस, यूहन्ना आउर याकूब के सागें लेईके प्रार्थना करेक केर लाई पहाड़ केर ऊपरे गेलाक। २९आउर एसान होलाक कि प्रार्थना करेक बेरा उकार मुख केर स्वरूप एकदम भिन्न होए गेलाक आउर उकार पोशाक चमचम करते सफेद होए गेलाक। ३०हुवाँए उकार सागें बात करते दुईझन पुरुष प्रकट होलाँए। उमान मूसा आउर एलिय्याह रहाँए। ३१जेमान अपन महिमा केर साथ प्रकट होए रहाँए आउर यीशु केर मृत्यु केर विषय में बात करत रहाँए जेके उ यरूशलेम में पुग करेक वाला राहे ३२किन्तु पतरस आउर उमान जे उकार सागें रहाँए नीद से लापटाए जाए रहाँए। सेहेसे जेखान उमान जागलाँए होले उमान यीशु केर महिमा के देखलाँए आउर उमान उ दुई झनों के भी देखलाँए जेमान उकार सागें खड़ा रहाँए। ३३आउर हुवाँ होलाक एसान कि जैसानेहे उमान उकार से विदा लेवात रहाँए, पतरस यीशु के कहलक, “स्वामी, अच्छा होलाक कि हमरे हियाँ आहि, हमरे के तीनठु मण्डप बनाएक आहे — एकठु तोर लाई। एकठु मूसा केर लाई आउर एकठु एलिय्याह केर लाई।” (उ नी जानत राहे, उ का कहबो सेके।)

३४उ ई बात करत राहे कि एकठु बादल उमड़लक आउर उठु उमान के अपन छावों में सामाईट लेलाक। जैसनेहे उमान में बादल छाया गेलाक, उमान घबराए गेलाँए। ३५सेखने बादल से आकाशवाणी होलाक, “ई मोर बेटा हेके, ईके मोंय चुईनों, ईकार बात सुना।”

३६जेखान आकाशवाणी होए गेलाक होले उमान यीशु के एकालाए पालाँए। उमान ईकार बारे में चुपे रहाँए। उमान जे सोउब के देईख रहाँए, उ विषय में उ समय केखो कोन नी कहलाँए।

छोकड़ा के दुष्टात्मा से छुटकारा

(मती १७:१४-१८; मरकुस ९:१४-२७)

३७अगला दिन एसान होलाक कि जेखान उमान पहाड़ से नीचे उतारलाँए होले उमान के एकठु बड़का भीड़ मिललक। ३८सेहे समय भीड़ में से एकझन व्यक्ति चिल्लालक, “गुरु, मोंय प्रार्थना कराथों कि मोर बेटा के अनुग्रह-दृष्टि कर। उ मोर एकलौटा सन्तान हेके। ३९अचानक एकठु दुष्ट आतमा उके जकाईड लेवेला आउर उ चीखेला। उके दुष्टात्मा एसान मरोईड लेवेला कि उकार मुँख से झाग निकलेक लगेला। उ उके केखनों नी छोडेला आउर सताते जाथे। ४०मोंय तोर चेलामान के

प्रार्थना कईर राहों कि उमान उके बाहिर निकलाँए देओक कईके किन्तु उमान ऐसान नी करेक सकलाँए।”

४१सेखान यीशु उत्तर देलाक, “अरे अविश्वासिमान आउर भटकाल आदमीमान, मोंय आउर कितना दिन तोहार सागें राहबों आउर केखान तक तोहार सागें राहबों? अपन बेटा के हियाँ लेई आन।”

४२जेखान उ छोकड़ा आवाते राहे कि दुष्टात्मा उके पटाईक देलाक आउर मरोईड देलाक। किन्तु यीशु दुष्ट आतमा के धामकालक आउर छोंडाइन के निरोग कईर के वापस उकार बाप के सौँईप देलाक। ४३उमान सोभे परमेश्वर के ई महानता से चकित होए उठलाँए।

यीशु द्वारा अपन मृत्यु केर चर्चा

(मती १७:२२-२३; मरकुस ९:३०-३२)

यीशु जे सोउब के करात राहे उके देखेखके आदमीमान जेखान आश्चर्य करात रहाँए सेहे बेरा यीशु अपन चेलामान के कहलक, ४४“एखान जेके मोंय तोहरे के कहाथों, उ बातमान में ध्यान देवा। मनुष्य केर बेटा मनुष्य केर हाथ से धारुवाए जाएक वाला आहे।” ४५किन्तु उमान ई बात के नि समईझ पालाँए। ई बात उमान से छुपाल राहे। सेहेसे उमान उके जाईन नी पालाँए। आउर उमान उ बात केर विषय में उके पूछेक लाई डरात रहाँए।

सोबसे बड़का के हेके?

(मती १८:१-५; मरकुस ९:३३-३७)

४६एक बार यीशु केर चेलामान केर बीच ई बात में विवाद छिड़लक कि उमान में सोउबसे बड़का के हेके? ४७यीशु जाईन गेलाक कि उमान केर मन में का विचार चलाथे। सेहे से उ एकझन छौवा के हकालक आउर उके अपन टिन खड़ा कईर के ४८उमान के बोललक, “जे केहो ई छोटे छौवा के मोर नाम में ग्रहण करेना, उ माना कि मोकेहे ग्रहण कराथे। आउर जे केहो मोके ग्रहण करेना, उ उखे ग्रहण करेला जेहार मोके भईझे। ईकार लाई जे तोहरे केर में से सोबसे छोटा आहे, ओहे सोबसे बड़का हेके।”

जे तोहार विरोधी न लगे, उझन अपाने हेके

(मरकुस ९:३८-४०)

४९यूहन्ना प्रतिक्रिया व्यक्त कईरके कहलक, “स्वामी, हमरे तोर नाम में एकझन व्यक्ति के दुष्टात्मान के निकलाएक देईखी। हमरे उके रोकेक केर यत्न करली, काहेकि उ हमार में से केहो नि राहे, जे तोर अनुसरण करिला।”

५०ईकार से यीशु यूहन्ना के कहलक, “उके न रोका, काहेकि जे तोर विरोध में नैखे, उ तोर पक्ष में हे आहे।”

एकठु सामरी नगर

५१एखान ऐसान होलाक कि जेखान उके ऊपरे सोरग में लेई जाएक केर समय आलाक होले उ यरूशलेम जाएक केर निश्चय कईर के चाईल गेलाक। ५२उ अपन दूतमान के पहिलेहे भईज देई राहे। उमान चाईल गेलाँए आउर उकार लाई तैयारी करेक एकठु सामरी गाँव में पहुँचलाँए। ५३किन्तु सामरिमान हुवाँ उकार स्वागत सन्मान नि करलाँए काहेकि उ यरूशलेम में जात राहे। ५४जेखान उकार चेलामान याकूब आउर यूहन्ना ईके देखलाँए होले उमान बोललाँए, “प्रभु का तोयं चाहाथिस कि हमरे आदेश देई के आकाश से अग्नि बरसोक आउर उमान के भस्म कईर देओक?”^a

५५एहे लाई उ उमान दिगे मुडलक आउर उमान के डाँटलक गारियालक,^b ५६आउर उमान दोसरा गाँव चाईल गेलाँए।

यीशु केर अनुसरण

(मती ८:११-२२)

५७जेखान उमान रास्ता किनार से चाईल जात रहाँए केहो एकझन उके कहलक, “तोयं जहाँ कहीं भी जाबे, मोंय तोर पीछे जाबों।”

५८यीशु उके कहलक, “लोमड़िमान केर टिन गुफा होवेला। आउर आकाश केर चाराईमानो केर भी घोंसला राहेला किन्तु मनुष्य केर बेटा केर टिन मुड छुपाएक तक केर कोनो जगह नैखे।”

५९उ दोसरा झन के कहलक, “मोर पीछे होए ले।”

किन्तु उ व्यक्तिझन बोललक, “हे प्रभु, मोके जाएक दे ताकि मोंय पहिले अपन आबा के दफ़न कईर के आबों।”

६०सेखान यीशु उके कहलक, “मोरालमान के अपन मुर्दा गाड़ेक दे, तो जा आउर परमेश्वर केर राईज केर घोषणा कर।”

६१आउर कोनो आउर एकझन भी कहलक, “हे प्रभु, मोंय तोर पीछे चलबों किन्तु पहिले मोके अपन घर वाला मान से विदा लेई आवेक दे।”

^a ९:५४ कोनो यूनानी प्रतिमान में ई भाग जोड़ल जाहे: “जैसान कि एलिय्याह कईर राहे?”

^b ९:५५ कोनो यूनानी प्रति में ई भाग जोड़ल जाहे: “आउर यीशु कहलक, ‘का तोहरे नि जानाला कि तोहरे कैसान आतमा केर सागें सम्बन्ध रखाला? मनुष्य केर बेटा मनुष्य केर आतमामान के नष्ट करेके नैई लेकिन उमान उ उद्धार करेक आहे।’”

१२“एहसे यीशु उके कहलक, “ऐसान केहो भी जे हार में हाथ राईख के पिछे देखेला, परमेश्वर केर राईज केर योग्य नैखे।”

यीशु द्वारा बहत्तर चेलामान के भेजेक

१० **१**ई घटनामान केर पिछे प्रभु बहत्तर^a चेलामान के आउर नियुक्त करलाक आउर जे-जे नगरमान आउर जगहमान में उके निजे जाएक राहे, दुई-दुईजन कईरके उ उमान के अपन से आगे भेजलक।^१ उ उमान के बोललक, “फसल बहुत बागरा आहे किन्तु, काम करेक वाला मजदूर कमति आहाँए। ईकारलाई फसल केर प्रभु के विनती करा कि उ अपन फसल काटेक लाई मजदूर भेजोकर।

२“जावा आउर याईद रखा, मोंय तोहरे के भेड़ियामान के बीच भेड़ केर मेमनामान केर समान भेजाथों।^२ अपन साथे न कोनो बटुआ, न मुना आउर न ही जूता लेगबा। रास्ता में केखो नमस्कार तक न करबा। “जेकरो घर में जाबा, सोबसे पहिले कहबा, “ई घर के शान्ति मिलोक।”^३ यदि हुवाँ केहो शान्तिपूर्ण व्यक्ति राहबाँए होले तोहार शान्ति उके प्राप्त होई। किन्तु यदि उझन व्यक्ति शान्तिपूर्ण नी राही होले तोहार शान्ति तोहार ठिन घुईर आवी।^४ जे कोनो उमान तोहरे के देबाँए, उके खाते पीते ओहे घर में राहबा। काहेकि मजदूरी में मजदूर केर हक आहे। घर-घर न घुरात राहबा।

३“आउर जेखान तोहरे कोनो नगर में प्रवेश करबा आउर उ नगर केर आदमीमान तोहार स्वागत सन्मान करबाँए होले जे कोनो उमान तोहार सामने परोसबाँए बस उखे खाबा।^५ उ नगर केर बिमारीमान के निरोग करबा आउर उमान के कहबा, “परमेश्वर केर राईज तोहरेकेर सामने आए पहुँईचे।”

४“आउर जेखान तोहरे कोनो ऐसान नगर में जाबा जहाँ केर आदमीमान तोहरे के सम्मान नी करबाँए, होले हुवाँ केर सड़कमान में जाए के कहबा, १“ई नगर केर उ धूल तक जे हमार गोढ़ में लाईगे, हमरे तोहार विरोध में हियाँए पोईछ के जाथी। आउर भी ई ध्यान रखा कि परमेश्वर केर राईज सामने आए पहुँईचे।”^६ मोंय तोहरे के कथाथों कि उ दिन उ नगर केर आदमीमान से सदोम केर आदमीमान केर दशा बहुत अच्छा होवी।

अविश्वासिमान के यीशु केर चेतावनी

(मती ११:२०-२४)

१३“ए खुराजीन, ए बैतसैदा, तोहरे के धिक्कार आहे,

^a १०:१ बहत्तर कोनो कोनो यूनानी प्रतिमान में ई संख्या सत्तर आहे। पद १७ में भी सत्तर आहे।

काहेकि जे आश्चर्यकर्म तोहार माझें कराल गेलाक, यदि ओहेमान के सूर आउर सैदा में कराल जाताक, होले न जाने उमान केखनेहे टाट केर शोक-पोशाक पिन्धके आउर राख में बैठ के मन फिराए लेताँए।^७ कोनो भी होक न्याय केर दिन सूर आउर सैदा केर स्थिति तोहार से बहुत अच्छा होवी।^८ ए कफ़रनहूम का तोयं सोरग तक ऊँचा उठाए जाबे? तोयं तो नीचे नरक में गिरेबे!

९“चेलामान! जे केहो तोहरे केर सुनेना, मोरे सुनेना, आउर जे तोहरेके बाधा करेला, उझन मोके बाधा करेला। आउर जे मोके ईकार करेला, उ उके ईकार करला जेहार मोके भेईझे।”

शैतान केर पतन

१० आउर उ बहत्तरझन आनन्द केर साथ वापस घुईर आलाँए आउर बोललाँए, “हे प्रभु, दुष्टात्मानां तोर नाम में हमार आज्ञा मानेना!”

११“एहे से यीशु उमान के कहलक, “मोंय शैतान के आकाश से बिजली केर समान गिरेक देखलों।^१ सुना! साँपमान आउर बिच्छुमान के गोढ़ निचे रौंदेक आउर शत्रु केर समूचा शक्ति में प्रभावी होएक केर सामर्थ्य मोंयं तोहरे के देई देहों। तोहरे के केहो कोनो हानि नी पहुँचेक पारबाँए।^२ किन्तु बस एहे बात में खुशी न होवा कि आतमामान तोहरेकेर बस में आहाँए, लेकिन ईकार में खुशी होवा कि तोहरे केर नाम सोरग में लिखाल जाहे।”

यीशु केर परम पिता के प्रार्थना

(मती ११:२५-२७; १२:१६-१७)

११ ओहे बेरा उ पवित्र आतमा में स्थिर होएके आनन्दित होलाक आउर बोललक, “हे परम पिता! हे सोरग आउर धरती केर प्रभु! मोंयं तोर स्तुति करायों कि तोयं ई बातमान के चतुर आउर प्रतिभावान आदमीमान से छुपाए के रईख के भी छौवामान^b केर लाई उसोउब के प्रकट कईर देहिस। हे परम पिता! निश्चय ही तोयं ऐसानहे करेक चाहात राहिस।

२२“मोके मोर पिता द्वारा सोउब कुछ देवाल जाहे आउर पिता केर सिवाय केहो नी जानेना कि बेटा के हेके आउर बेटा केर अतिरिक्त केहो नी जानेना कि पिता के हेके, या उकार सिवाए जेके बेटा ईके प्रकट करेक खोजेला।”

२३ आउर चेलामान केर दिगे मुईडके उमान के चुपे से कहलक, “धन्य हेका, उसोउब आईख जेमान के तोहरे

^b १०:२१ छौवामान छौवामान से अभिप्राय हेके सीधा सादा सरल अबोध जन।

देईख पाता, उसोउब के देखाथा। १५काहेकि मोंय तोहरे के बातार्थों कि उ बातमान के बहुत से नबी आउ राजामान देखेक खोजात रहाँए, जेमान के तोहरे देखाता, लेकिन देईख नी पालाँए। जे बातमान के तोहरे सुनेक पाथा, उसोउब के उमान सुनेक खोजात रहाँए, लेकिन उमान सुईन नी पालाँए।”

अच्छा सामरी केर कथा

१५सेखान एकइन न्यायशास्त्री खड़ा होलाक आउ यीशु केर परीक्षा लेवेक केर लाई उके पूछलक, “गुरु, अनन्त जीवन पावेक केर लाई मोंय का करबों?”

१६एहे से यीशु उके कहलक, “व्यवस्था केर विधि में का लिखाल आहे, हुवाँ तोय का पढ़िसिला?”

१७उ उत्तर देलाक, “‘तोयं अपने सम्पूर्ण मन, सम्पूर्ण आतमा, सम्पूर्ण शक्ति आउ सम्पूर्ण बुद्धि से अपन प्रभु के प्रेम कर।’”^a आउ ‘अपन पड़ोसी से वैसानेहे प्यार कर, जैसान तोयं अपने आप के करिसिला।’^b”

१८सेखान यीशु उके कहलाक, “‘तोयं ठीक उत्तर देले। होले तोयं एसाने कर ईकरे से तोयं जीवित राहबे।”

१९किन्तु उ अपन के न्याय संगत ठहराएक केर ईच्छा कईकरे यीशु के कहलक, “आउ मोर पड़ोसी के हेके?”

२०यीशु उत्तर में कहलक, “देख, एकइन व्यक्ति यरूशलेम से यरीहो जात राहे कि उके डाकुमान घेईर लेलाँए। उमान सोउब कुछ छीन के उके गंगा कईर देलाँए आउ माईर पीट के उके अधामोरा छोईड के उमान चाईल गेलाँए।

२१“सेखान संयोग से ओहे रास्ता से एकइन याजक जात राहे। जेखान उ उके देखलक होले उ मुँख मोईडके दोसरा दिगे चाईल गेलाक। २२ओहे रास्ता होएके एकइन लेवी^c भी हुनेसे आलाक। ओहो उके देखलक आउ उ भी मुँख मोईडके दोसरा दिगे चाईल गेलाक।

२३“किन्तु एकइन सामरी भी जाएक समय ओहे टिन आलाक जहाँ उ गिराल राहे। जेखान उ उइन व्यक्ति के देखलक होले उकार लाई उकार मन में करुणा होलाक, २४सेहेसे उ उकार टिन गेलाक आउ उकार घावमान में तेल आउ दाखरस डाईल के पट्टी बाँधलक। आउ उ उके अपन पशु में लाईद के एकटु सराय में लेई गेलाक आउ उकार देखभाल करेक लगलक। २५अगले दिन उ

दुई दीनारी निकलालक आउ उके सराय वाला के देईके बोललक, ‘ईकार ध्यान रखबे आउ ईकार से अधिक जे कुछ तोर खर्चा होई, जेखान मोंयं घुईर आबों, तोके चुकाए देबों।’”

२६यीशु उके कहलक, “बताओ तोर विचार से डाकुमान केर बीच घेराल व्यक्ति केर पड़ोसी ई तीनोंइन में से के होलाक?”

२७न्यायशास्त्रीइन कहलक, “ओहेइन जेहार उके दया करलक।”

एहेसे यीशु उके कहलक, “जा आउ वैसानेहे कर जैसान उइन करलक।”

मरियम आउ मार्था

२८जेखान यीशु आउ उकार चेलामान अपन रास्ता में जात रहाँए होले यीशु एकटु गाँव में पहुँचलक। एकइन स्त्री, जेकार नाम मार्था राहे, उदारता के साथ उकार स्वागत सन्मान करलक। २९उकार मरियम नाम केर एकइन बहिन राहे जे प्रभु केर चरण में बैठलक, जेमान के उ कहात राहे, उके सुनात राहे। ३०उदिगे रकाम रकाम केर तैयारिमान में लईग के मार्था व्याकुल होएके यीशु केर टिन आलाक आउ बोललक, “हे प्रभु, का तोयं नी देखाथिस कि मोर बहिन सारा काम बस मोरे ऊपरे छोईड देहे? ईकार लाई उके मोर सहायता करेक लाई कह।”

३१प्रभु उके उत्तर देलाक, “मार्था, हे मार्था, तोयं बहुत बातमान केर लाई चिंतित आउ व्याकुल राहिसिला। ३२किन्तु बस एकटु बात आवश्यक आहे, आउ मरियम काहेकि अपन लाई ओहे उत्तम भाग के चुईन लेहे, सेहेसे उके उकार से नी छीनाल जाई।”

प्रार्थना

(मत्ती ६:९-१५)

११ १सेखान एसान होलाक कि यीशु एकठिन प्रार्थना करात राहे। जेखान उ प्रार्थना समाप्त कईर चुकलक होले उकार एकइन चेला उके कहलक, “हे प्रभु, हमरेकेओ सिखाओ कि हमरे प्रार्थना कैसान करबों। जैसान कि यूहन्ना अपन चेलामान के सिखात राहे।”

२एहेसे उ उके बोललक, “तोहरे प्रार्थना करबा, होले कहबा:

‘हे आबा, तोर नाम पवित्र मानाल जाओक।

तोर राईज आओक,

३ हमारे के दिन भर केर रोटी प्रतिदिन दे।

^a १०:२७ उद्धरण व्यवस्था ६:५

^b १०:२७ उद्धरण लैव्य १९:१८

^c १०:३२ लेवी लेवी समूह केर एकइन व्यक्ति। यह परिवार समूह मन्दिर में यहूदी याजक केर सहायक होवात रहाँए।

४ हमार अपराध क्षमा कर,
काहेकि हमरे भी अपन अपराधी के क्षमा
करलि,
आउर हमरे के कठिन परीक्षा में न पड़ेक दे।”

माँगते रहा

(मत्ती ७:७-११)

५-६ आउर उ उमान के कहलक, “माना कि, तोहरे केर केकरो एकझन सागीं आहे, तो तोयं आधा राती उकार टिन जाएके कहबे, ‘हे सागीं मोके तीनटु रोटी दे। काहेकि मोर एकझन सागीं एखने यात्रा कईरके मोर टिन आहे आउर मोर टिन उके देवेक केर लाई कोनो भी नैखे।’
७ आउर कल्पना करा उ व्यक्ति भीतरे से उत्तर देलाक, ‘मोके तंग न कर, द्वार बंद होए चुईके, ढीसना में मोर सागें मोर छौवामान आहाँए, सेहेसे तोके कोनो भी देवेक माँयं उठेक नी पारबों।’
८ ‘माँयं तोहरे के बताथों उ यदिओ नी उठी आउर तोके कोनो नी देवी, किन्तु फिर भी काहेकि उ तोर सागीं हेके, सेहेसे तोर घाने घाने, बिना संकोच कईरके माँगते रहेक से उ उठी आउर तोर आवश्यकता भईर, तोके देवी।
९ आउर ईकार लाई माँयं तोहरे के कहाथों माँगा, तोहरे के देवाल जाई। खोजा, तोहरे पावा। खटखटावा, तोहार लाई दुवार खोईल देवाल जाई।
१० काहेकि हर कोई जे माँगला, उ पाएला। जे खोजेला, उके मिलेला। आउर जे खटखटाएला, उकार लाई दुवार खोईल देवाल जाएला।
११ तोहरे केर ऐसन बाप के आहे जेहार यदि उकार बेटा मछरि माँगीं, होले मछरि केर जगह में उके साँप थमाए देवी
१२ आउर यदि उ अण्डा माँगीं होले उके बिच्छू देवी।
१३ होले बुरा होएकेओ भी जेखान तोहरे जानाला कि अपन छौवामान के उत्तम भेंट कैसान देवाल जाएला, होले सोरग में रहाल परम पिता, जेमान उके माँगेना, उमान के पवित्र आतमा कितना अधिक देवी।”

यीशु में परमेश्वर केर शक्ति

(मत्ती १२:२२-३०; मरकुस ३:२०-२७)

१४ आउर जेखान यीशु एकझन गूँगा बनाए देवेक वाला दुष्टात्मा के निकलात राहे होले ऐसन होलाक कि जैसानहे उ दुष्टात्मा बाहिरे निकलक, होले उ गूँगा, बोलेक लगलक। भीड़ केर आदमीमान ईकार से बहुत चकित होए गेलाँए।
१५ किन्तु उमान केर के केमान कहलाँए, “ई देवतामान केर शासक बैल्जाबुल केर सहायता से दुष्टात्मामान के निकलाएला।”

१६ किन्तु आउरमान उके परखेक केर लाई कोनो

सोरगीय चिन्हा केर माँग करलाँए।
१७ किन्तु यीशु जाईन गेलाक कि उमान केर मन में का आहे। सेहेसे उ उमान के बोललक, “उ राईज जेकार में अपन भीतरेहे फूट पईड जाई, नष्ट होए जाएला आउर ऐसाने हे कोनो घर केर भी फूट पड़ले उकार नाश होए जाएला।
१८ यदि शैतान अपनहे विरुद्ध फूट पईड जाई होले उकार राईज कैसान टिकेक सकी? ईके माँयं तोहरे के ईकारलाई पूछाथों कि तोहरे कहाला कि माँयं बैल्जाबुल केर सहायता से दुष्टात्मामान के निकलाओना।
१९ किन्तु यदि माँयं बैल्जाबुल केर सहायता से दुष्टात्मामान के निकलाओना होले तोहरे केर अनुयायीमान उमान केकार सहायता से निकलाँएना? सेहेसे तोहरे के तोहार अपन आदमीमानहे अनुचित सिद्ध करबाँए।
२० किन्तु यदि माँयं दुष्टात्मामान के परमेश्वर केर शक्ति से निकलाओना होले ईदु स्पष्ट आहे कि परमेश्वर केर राईज तोहरे तक आए पहुँचै!

२१ “जेखान एकझन शक्तिशाली मनुष्य पूरा हथियार कईस के अपन घर केर रक्षा करेला होले उकार सम्पत्ति सुरक्षित राहेला।
२२ किन्तु जेखान केहो भी उकार से अधिक शक्तिशाली उकार ऊपरे हमला कईर के उके हराए देवेला होले उ उकार सोभे हथियारमान के, जेकार ऊपरे उकार भरोसा राहे, उकार से छीन लेवेना आउर लूटाल केर वस्तुमान के उमान आपस में बाँट लेवेना।

२३ “जे मोर सागें नैखे, मोर विरोध में आहे आउर उ जेझन मोर सागे नी सामुटेला, उ झन बिखराएला।

खाली व्यक्ति

(मत्ती १२:४३-४५)

२४ “जेखान कोनो दुष्टात्मा कोनो मनुष्य से बाहिरे निकलेला होले विश्राम करेक लाई खोजते खोजते सूखाल जगह से होएके जाएला आउर जेखान उके आराम नी मिलेला होले उ कहेला, ‘माँयं अपन ओहे घर घुईर जाबों जहाँ से आहों।’
२५ आउर वापस जाएके उ उके साफ़ सुथरा आउर व्यवस्थित पाएला।
२६ आउर उ जाएके अपन से भी अधिक दुष्ट दोसरा सातटु दुष्टात्मामान के हुवाँ लानेला। आउर उसोउब उकार में जाएके राहेक लगेना। एहे प्रकार उ व्यक्ति केर पिछे केर स्थिति पहिले केर स्थिति से भी अधिक खारब होए जाएला।”

उमान धन्य हेंकाँए

२७ आउर ऐसन होलाक कि जैसानेहे यीशु ई बातमान के कहलक, भीड़ में से एकझन स्त्री उठलक आउर जोर से

बोललक, “उ गर्भ धन्य आहे, जे तोके धारण करलक। उ स्तन धन्य आहे, जेकार से तोयं पीले।”

२८एहेसे उ कहलक, “धन्य तो लेकिन उमान हेकाँए जेमान परमेश्वर केर वचन सुनेना आउर उकार में चालेना!”

प्रमाण केर माँग

(मत्ती १२:३८-४२; मरकुस ८:१२)

२९जैसानेहे भीड़ बढ़ते जात रहॉए, उ कहेक लगलक, “ईंठु एक दुष्ट पीढ़ी हेके। ईमान कोनो चिन्हां देखेक खोजेना। किन्तु ईमान के योना केर चिन्हा केर सिवाए आउर कोनो चिन्हां नी देवाल जाई। ३०काहेकि जैसान नीनवे केर आदमीमान केर लाई योना चिन्हां बनलाक, वैसाने हे ई पीढ़ी केर लाई मनुष्य केर बेटा भी चिन्हां बनी।

३१“दक्षिण केर रानी^v न्याय केर दिन प्रकट होएके ई पीढ़ी केर आदमीमान केर ऊपरे अभियोग लगाई आउर उमान के दोषी ठहराई काहेकि उ धरती केर दोसरा छोर से सुलैमान केर ज्ञान सुनेक लाई आलक आउर एखान देखा हियाँ तो केहो सुलैमान से भी बड़का आहे।

३२“नीनवे केर आदमीमान न्याय केर दिन ई पीढ़ी केर आदमीमान केर विरोध में खड़ा होएके उमान में दोष लगाबाँए काहेकि उमान योना केर उपदेश के सुईन के मन फिराय रहॉए। आउर देखा एखान तो योना से भी महान केहो हियाँ आहे।

विश्व केर इंजोत बना

(मत्ती ५:१५; ६:२२-२३)

३३“दीया जलाएके केहो भी उके कोनो निदिसेक जगह या कोनो बर्तन केर भीतरे नी रखेना, लेकिन उ ईके दीवट में रखेना ताकि जेकेहो भीतरे आबाँए इंजोत देखेख पाबाँए। ३४तोहार शारीर केर दीया तोहार आँईख हेंके, सेहेसे यदि आँईख साफा राही होले सारा शारीर इंजोत से भईर जाई किन्तु, यदि खराब आहे होले तोहार शारीर अंधकारमय होए जाई। ३५सेहेसे ध्यान रखबा कि तोहरे केर भीतरे केर इंजोत अंधार नैख्। ३६अतः यदि तोहार सारा शारीर इंजोत से परिपूर्ण आहे आउर ईकार कोनो भी अंग अंधकारमय नैखे होले ऊठु ऐसान चमकी कि माना कोनो दीया तोहार में अपन ज्वोति में चमकाथे रकाम।”

^v ११:३१ दक्षिण केर रानी या “शीबा केर रानी।” उ हजार मील चाईल के सुलैमान से परमेश्वर केर ज्ञान सीखेक आए राहे। देखाब १ राजा १०:१-१३

यीशु द्वारा फरीसिमान केर आलोचना

(मत्ती २३:१-३६; मरकुस १२:३८-४०; लूका २०:४५-४७)

३७यीशु जेखान अपन बात समाप्त करलक होले एकझन फरीसी उके अपन साँगें खाना खाएक लाई आग्रह करलक। सेहेसे उ भीतरे जाएके खाना खाएक बैठ गेलाक। ३८किन्तु जेखान उ फरीसी ईके देखलक कि खाना खाएक केर पहिले उ अपन हाथ नी धोलाक होले उके बड़ा आश्चर्य होलाक। ३९एहेसे प्रभु उके कहलक, “देखा तोहरे फरीसीमान थाली आउर कटोरा के बस बाहिरे से तो माँजाला लेकिन भीतरे से तोहरेमान लालच आउर दुष्टता से भराल आहा। ४०अरे मूर्ख आदमीमान! का जेहार बाहरी भाग के बनाहे, ओहे भीतरे भाग केयो भी नी बनाहे जानों? ४१ईकार लाई जे कुछ भीतरे आहे, उके गरीबमान के देई देवा। आउर तोहार लाई सोब कुछ पवित्र होए जाई।

४२“ओ फरीसीमान! तोहरे के धिक्कार आहे काहेकि तोहरे अपन पुदीना आउर सोफ गुटी आउर हर कोनो जड़ी बूटी केर दसवाँ हिस्सा तो अर्पित कराला किन्तु परमेश्वर केर प्रेम आउर न्याय केर उपेक्षा कराला। किन्तु ई बातमान के तोहरे उ बातमान केर उपेक्षा बिना कईके करेक राहे।

४३“ओ फरीसीमान, तोहरे के धिक्कार आहे! काहेकि तोहरे यहूदी आराधनालयमान में सोबसे महत्त्वपूर्ण आसन खोजाला आउर बाजारमान में सम्मानपूर्ण नमस्कार लेवेक तोहरेके भाल लागेला। ४४तोहरे के धिक्कार आहे काहेकि तोहरे बिना कोनो पहचान केर उ कबर केर समान आहा जेकार में आदमीमान अनजाने से हिटेना।”

४५सेखान एकझन न्यायशास्त्री यीशु के कहलक, “गुरु, जेखान तोयं ऐसान बात कहिसिला होले हमार भी अपमान करिसिला।”

४६एहेसे यीशु कहलक, “ओ न्यायशास्त्रीमान! तोहरे के धिक्कार आहे। काहेकि तोहरे आदमीमान में ऐसान बोझ लादाला जेके उठाएक कठिन आहे। आउर तोहरे निजे उ बोझमान के एकठु उँगली से छूवेक जा नी खोजाला। ४७तोहरे के धिक्कार आहे काहेकि तोहरे नबीमान केर लाई कबरमान तो बानावाल जबकि उमान तोहरे केर पूर्वजे रहॉए जेमान उमान के हत्या कई रहॉए। ४८ईकार से तोहरे ईके देखावाल कि तोहरेमान अपन पूर्वजमान केर उ काममान के समर्थन कराला। काहेकि उमान तो उसोउब के मारलॉए आउर तोहरे उमान लाई कबरमान बनाला। ४९एहेलाई परमेश्वर केर ज्ञान भी कईहे, ‘मॉय नबीमान

आउ प्रेरितमान के भी उमान टिन भेजबों। आउ केके तो उमान मोराए देबाँए आउ केखो कष्ट देंबाँए।’

५०“ईकार लाई संसार केर शुरु से जेतना भी नबीमान केर खून बहाल जाहे, उकार हिसाब ई पीढ़ी केर आदमीमान से चुकता कराल जाई। ५१यानी हाबिल केर हत्या से लेईके जकरयाह केर हत्या तक केर हिसाब, जेके परमेश्वर केर मन्दिर आउर वेदी केर बीच में माराल जाए राहे। हाँ, मॉय्य तोहरे के कहार्थों ई पीढ़ी केर आदमीमान के ईकार लाई लेखा जोखा देवेके होई।

५२“हे न्यायशास्त्रीमान, तोहरे के धिक्कार आहे, काहेकि तोहरे ज्ञान केर कुंजी तो लेई लेहा। लेकिन उकार में न तो तोहरे खुद प्रवेश करला आउर जेमान प्रवेश करेक केर जतन करात रहाँए उमानोंके भी तोहरे बाधा देला।”

५३आउर जेखान यीशु हुवाँ से चाईल गेलाक होले उ धर्मशास्त्री आउर फरीसी उकार से घोर शत्रुता रखेक लगलाँए। बहुत बातमान केर बारे में उमान उके तीखा प्रश्न पूछेक लगलाँए। ५४काहेकि उमान उके उकार कहाल कोनो बात से फँसाएक केर धन्धा में लाईग रहाँए।

फरीसीमान जैसान न बना

१२ १आउर जेखान हजार हजार केर ईतना भीड़ आए जमा होलाँए कि आदमीमान एक दोसरा के जाँताए देवात रहाँए सेखान यीशु पहिलेहे अपन चेलामान के कहेक लगलक, “फरीसीमान केर खमीर से, जे उमान केर कपट हेके, बईच के रहबा। २कोनो एसान छिपाल नैखे जेके प्रकट नी कईर देवाल जाई। एसान कोनो अनजाना नैखे जेके जानेक नी देवाल जाई। ३ईकार लाई हर उ बात जेके तोय्र अँधार में कईहिस, उजाले में सुनाल जाई। आउर सुनसान कमरा में जे कुछ भी तोय्र चुपचाप केकरो कान में कईहिस, मकान केर छत ऊपरे से घोषणा कराल जाई।

बस परमेश्वर के डरावा

(मती १०:२८-३१)

४“किन्तु मोर सार्गीमान! मॉय्य तोहरे के कहार्थों उमान के न डरावा जेमान बस तोहार शरीर के मारेक सकेना आउर उकार पिछे एसान कोनो नी करेक पारेना जे उमान केर बस में नैखे। ५मॉय्य तोहरे के देखाबों कि तोहरे केके डराएक लागि। उके डरावा जेकार तोहरे के माईके नरक में डालेक केर शक्ति आहे। हाँ, मॉय्य तोहरे के बतायों, बस उकेहे डरावा।

६“का दुई पैसा में पाँचठु चाराई नी बेचाएना? फिर

भी परमेश्वर उमान केर एकठु के नी भूलाएला। ७आउर देखा तोहरे केर मुद्द केर एक एकठु केश तक गिनाल जाहे। न डरावा तोहरे तो बहुत चाराईमानों से अधिक मूल्यवान हेका।

यीशु केर नाम में न लज्जावा

(मती १०:३२-३३; १२:३२; १०:१९-२०)

८“किन्तु मॉय्य तोहरे के कहार्थों जे कोनो व्यक्ति सोउबकार सामने मोके स्वीकार करेला, मनुष्य के बेटा भी उ व्यक्ति के परमेश्वर केर सोरगदूतमान केर सामने स्वीकार करी। ९किन्तु उ जे मोके दोसरा केर सामने नाकरएला, उके परमेश्वर केर सोरगदूतमान केर सामने नकाईर देवाल जाई।

१०“आउर हर उज्जन् व्यक्ति के तो क्षमा कईर देवाल जाई जेमान मनुष्य केर बेटा केर विरोध में कोनो शब्द बोलवाँए होले, किन्तु जे पवित्र आतमा केर निन्दा करेला, उके क्षमा नी कराल जाई।

११“सेहेसे जेखान उमान तोहरे के यहूदी आराधनालयमान में, शासक आउर अधिकारिमान केर सामने लेई जाबाँए होले चिंता न करवा कि तोहरे अपन बचाव कैसान करबोई या तोहरे के का कहेक होई कईके। १२चिंता न करा काहेकि पवित्र आतमा तोहरे के सिखाई कि उ समय तोहरे के का बोलेक लागि।”

स्वार्थ केर विरुद्ध चेतवनी

१३आउर भीड़ में से उके कोनो एकज्जन् कहलक, “गुरु, मोर भाई के बाप केर सम्पत्ति के बँटवारा करेक कई दे।”

१४हेसे यीशु उके कहलक, “ओ भला मनुष्य, मोके तोहार न्यायकर्ता या बँटवारा करेक वाला के बनालक?”

१५सेहेसे यीशु उके कहलक, “सावधानी केर साथ सोभे प्रकार केर लोभ से अपने के दूर रख। काहेकि आवश्यकता से अधिक सम्पत्ति होले भी जीवन केर आधार उकार संग्रह नी होएला।”

१६आउर उ उमान के एकठु दृष्टान्त कथा सुनालक: “कोनो धनी व्यक्ति केर धरती में भरपूर उपज होलाक। १७उ अपन मन में सोईच के कहेक लगलक, ‘मॉय्य का करबों, मोर टिन फ़सल के रखेक केर लाई जगह तो नैखे।’

१८“आउर उ कहलक, ‘ठीक आहे मॉय्य ईके करबों कि अपन अनाज केर कोठा के गिराए के बड़का कोठा बानुवाबों आउर अपन समूचा अनाज के आउर सामान के हुवाँ रईख देबों। १९आउर अपन आतमा के कहबों, अरे मोर आतमा एखान बहुत उत्तम वस्तुमान, बहुत बरस केर

लाई तोर ठिन संचित आहे। न घबराओ, खा, पी आउर माजा उड़ाओ।’

२०“किन्तु परमेश्वर उके बोललक, ‘अरे मूरख, एहे राती तोर आतमा तोरसे लेई लेवाल जाई। जे सोउब तोय्र तैयार कईरिस, उके के लेवी?’

२१“देखा, उ व्यक्ति केर साथे भी कुछ ऐसानहे होलाक, उ अपन लाई भंडार भरेला किन्तु परमेश्वर केर दृष्टि में उ धनी नैखे।”

परमेश्वर से बईदके कोनो नैखे

(मती ६:२५-३४; १९-२१)

२२आउर उ अपन चेलामान के कहलक, “ईकारलाई मोंय तोहरे के कहाथों, अपन जीवन केर चिंता न करा कि तोहरे का खाबा अथवा अपन शरीर केर चिंता न करा कि तोहरे का पिन्धबा? २३काहेकि जीवन भोजन से आउर शरीर वस्त्रों से अधिक महत्वपूर्ण आहे। २४कौवामान के देखा, न उमान बुनाएना, न ही उमान काटेना। न उमान ठिन भंडार आहे आउर न अनाज केर कोठा। फिर भी परमेश्वर उमान के भोजन देवेला। तोहरे तो कौवामान से कितना अधिक मूल्यवान हेका। २५चिन्ता कईरके, तोहरे में से केहार ऐसान आहे, जे अपन आयु में एक घड़ी भी आउर जोईड सकेला। २६काहेकि यदि तोहरे ई छोटे काम के भी नी करेक सकाला होले शेष केर लाई चिन्ता काहे कराला?

२७“कुमुदिनिमान के देखा, उसोउब कैसान उमना? न उसोउब श्रम करेना, न कटाई, फिर भी मोंय तोहरे के कहाथों कि सुलैमान अपन सारा वैभव केर साथ उसोउब में से कोनो एकटु केर समान भी नी सजाएक सकलक। २८ईकार लाई जेखान मैदान केर घास के, जेसोउब आईज हियां आहे आउर जेके कईल आगुन में झाईक देवाल जाई, परमेश्वर ऐसान वस्त्रमान से सजाएला होले ए अल्प विश्वासीमान, तोहरे के होले उ आउर कितना अधिक वस्त्र पिन्धाई।

२९“आउर चिन्ता न करा कि तोहरेम का खाबोई आउर का पीवोई। ईकार लाई न सोचा। ३०काहेकि जगत केर आउर सोभे आदमीमान ई वस्तुमान केर पीछे कुदाथाँए लेकिन तोहरे केर पिता तो जानाथे कि तोहरे के ई वस्तुमान केर आवश्यकता आहे। ३१लेकिन तोहरे उकार राईज केर चिन्ता करा। ई वस्तुमान होले तोहरे के देई देवाल जाई।

धन में भरोसा न करा

३२“भोर भोला भेड़मान न डरावा, काहेकि तोहार परम पिता तोहरे के सोरग केर राईज देवेक लाई जल्दी में आहे। ३३सेहेसे अपन सम्पत्ति बेईच के धन गरीबमान में बाँईट

देवा। अपन ठिन ऐसान मुना रखा जे पुरना ना होओक अर्थात् केखनों समाप्त नी होवेक वाला धन सोरग में जमा करा जहाँ उठिन तक कोनो चोर पहुँचेक नी पारी। आउर न उके कीड़ा मकौड़ा नष्ट कईर सकबाँए। ३४काहेकि जहाँ तोहरे केर धन राही, हुवाँए तोहरे केर मन भी रही।

सदा तैयार रहा

(मती २४:४२-४४)

३५“कर्म करेक वाला समय सोउब समय तैयार रहोक। आउर अपन दीया जलाए रखोक। ३६आउर उ आदमीमान केर जैसान बना जेमान ब्याह केर भोज से घुईर आए के अपन स्वामी केर प्रतीक्षा में राहेना ताकि, जेखान उ आवी आउर द्वार खटखटाई होले उमान जल्दी से उकार लाई द्वार खोलेक सकबाँए। ३७उझन सेवक धन्य हेके जेझन स्वामी केर आवेक तक जागले आउर तैयार पाएला। मोंय तोहरे के सच्चाई केर साथ कहाथों कि उ भी उकार सेवा केर लाई ढँडा कईस लेई आउर उके, खाएक केर चौकी में खाएक केर लाई बैठाई। उ आवी आउर उके खाना खिलाई। ३८उ चाहे आधा राती से पहिले आवोक आउर चाहे आधा राती केर पिछे यदि उके तैयार पावी होले उ धन्य हेके।

३९“ई बात केर लाई निश्चित रहा कि यदि घर केर स्वामी के ई खबार होताक कि चोर कोन समय आवी, होले उ उके अपन घर के खोनेक नी देताक। ४०सेहेस तोहरे भी तैयार रहा काहेकि मनुष्य के बेटा ऐसान समय आवी जेके तोहरे सोंचये नी राहबा।”

विश्वासयोग्य सेवक के हेके?

(मती २४:४५-५१)

४१सेखान पतरस पूछलक, “हे प्रभु, ई दृष्टान्त कथा तोंय हमार लाई कहाथिस या सोबकार लाई?”

४२एहेसे यीशु कहलक, “होले ऐसान विश्वास-योग्य, बुद्धिमान प्रबन्ध-अधिकारी के होवी जेके प्रभु अपन सेवकमान केर ऊपरे उचित समय में, उमान के भोजन सामग्री देवेक केर लाई नियुक्त करी? ४३उ सेवक धन्य हेके जेके उकार स्वामी जेखान आवी होले उके वैसाने करते पावी। ४४मोंय सच्चाई केर साथ तोहरे के कहाथों कि उ उके अपन सोभे सम्पत्ति केर अधिकारी नियुक्त करी।

४५“किन्तु यदि उ सेवक अपन मन में ईकै कही कि मोर स्वामी तो आवेक में बहुत देरी कराथे आउर उ दोसरा पुरुष आउर स्त्री सेवकमान के मारेक पीटेक शुरु कईर देई तथा खाए-पीके आउर मतवाला होवेक लगी ४६होले उ

सेवक केर स्वामी ऐसाने दिन आए जाई जेके उ सोंचबे नी कईर राही। ऐसान समय जेकार प्रति उ अनजान राही। आउ उ उके टुकड़ा-टुकड़ा कईर देई आउ उके अविश्वासिमान केर बीच जगह देवी।

४०*उ सेवक जे अपन स्वामी केर ईच्छा के जानेला आउ उकार लाई तत्पर नी होएला या जैसान उकार स्वामी चाहेला, वैसान नी करेला, उ सेवक के जोरसे माउ खाई। ४१किन्तु उझन जेके अपन स्वामी केर ईच्छा केर ज्ञान नैखे आउ कोनो ऐसान काम कईर देई जे माउ खाएक योग्य होई होले उ सेवकझन हल्का माउ खाई। काहेकि प्रत्येक उ व्यक्ति से जेके बहुत अधिक देवाल जाहे, अधिक आसरा कराल जाई। उ व्यक्ति से जेके आदमीमान अधिक सौईपाए, उकार से आदमीमान अधिके माँगबाँए।”

यीशु केर सागें असहमति

(मती १०:२४-२६)

४९*“मोंयं धरती में एकटु आगुन लगाएक आहों। मोर कितना ईच्छा आहे कि उसुब कदाचित् एखान तक भड़कताक। ५०मोर टिन एकटु बपतिस्मा आहे जेके मोके लेवेक आहे जेखान तक ई पूरा नी होए जाई, मोंयं कितना व्याकुल आहों। ५१तोहरे का सोंचाथा मोंयं ई धरती में शान्ति स्थापित करेक केर लाई आएहों? नाई, मोंयं तोहरे के बताथों, मोंयं तो विभाजन करेक आहों। ५२काहेकि एखान से आगे एक घर केर पाँच आदमी एक दोसरा केर विरुद्ध होए जाबाँए। तीन दुईझन केर विरोध में आउ दुई तीनझन विरोध में होए जाबाँए।

५३ बाप, बेटा केर विरोध में,

आउर बेटा, बाप केर विरोध में,

माँए, बेटी केर विरोध में,

आउर बेटी, माँए केर विरोध में,

साईस, बहू केर विरोध में,

आउर बहू, साईस केर विरोध में होए जाबाँए।”

समय केर चिन्हेक

(मती १६:२-३)

५४आउ उ भीड़ के बोललक, “जेखान तोहरे पश्चिम दिगे से कोनो बादल के उठेक देखाला होले जल्दीहे कहाला, ‘वर्षा आवाथे काईके’ आउर आउर ऐसाने होवेला। ५५आउर जेखान दक्षिणी हवा चालेला, तोहरे कहाला, ‘गर्मी होई’ आउर ऐसाने होवेला। ५६अरे कपटिमान तोहरे

धरती आउर आकाश केर स्वरूप के व्याख्या करेक तो जानाला, आउर ऐसान काहे कि तोहरे वर्तमान समय केर व्याख्या करेक नी जानाला?

अपन समस्यामान के सुलझावा

(मती ५:२५-२६)

५७*“जे उचित हेके, उकार निर्णायक तोहरे अपने काहे नी बनावाल? ५८जेखान तोहरे अपन विरोधी केर सागें अधिकारिमान केर टिन जाथा होले रास्ता में हे उकार सागें समझौता करेक केर जतन करा। नई होले ऐसान न होओक कि उ तोके न्यायाधीश केर सामने खींच लेई जाई आउर न्यायाधीश तोके अधिकारी के सौईप देवी। आउर अधिकारी तोके जेल में बन्द कईर दी। ५९मोंयं तोहरे के बताथों, तोयं हुवाँ से तब तक नी छूटवे जेखान तक अंतिम पाई तक नी चुकाए देबे।”

मन बदलावा

१३ १उ समय हुवाँ उपस्थित काएझन आदमीमान यीशु के उ गलीलिमान केर बारे में बतालाँए जेमान केर खुन पिलातुस उकार बलिमान केर सागें मिलाए देई राहे। २सेहेसे यीशु उमान के कहलक, “तोहरे का सोंचाथा कि ई गलीलिमान दोसरा सोभे गलीलिमान से बुरा पापी रहाँए काहेकि उमान के ऐसान भुगतके होलाक? ३नैई, मोंयं तोहरे के बताथों, यदि तोहरे मन नी, फिराबा होले तोहरे सोब भी वैसानेहे मृत्यु मोरबा जैसान उमान मोरलाँए। ४था उ अड्डारह व्यक्तिमान केर विषय में तोहरे का सोंचाला जेमान केर ऊपरे शीलोह केर बुर्ज गिर के उमान के मोराए देलाक। का सोंचाथा, उमान यरूशलेम में राहेक वाला दोसरा सोभे व्यक्तिमान से अधिक अपराधी रहाँए? ५नैई, मोंयं तोहरे के बताथों कि यदि तोहरे मन नी फिराबा होले तोहरे सोब भी वैसानेहे मोरबा।”

निष्फल गाछ

६आउ उ ई दृष्टान्त कथा कहलक: “कोनो व्यक्ति अपना दाख केर बारी में अंजीर केर एकटु गाछ लगाए राहे सेहेसे उ उगाछ में फल खोजेक आलक लेकिन उके कोनो नी भेटालक। ७एहेसे उ माली के कहलक, ‘देख मोंयं तीन साल से अंजीर केर ई गाछ में फल दूँदते आवाथों किन्तु मोके एकोटु भी फल नी भेटालक। सेहेसे ईके काईट दे। ई धरती के ईसने व्यर्थ काहे कराथे?’ ८माली उके उत्तर देलाक, ‘हे स्वामी, ईके ई साल तक छोईड दे मोंयं ईकार चाईशें दिगे गद्दा खोईद के ईकार में खाद लगाबों। ९आउर

यदि ई अगले साल फल देई होले अच्छा आहे आउर यदि नी देई होले तोय ईके काईट सकिसिला।”

सब्त केर दिन स्त्री के निरोग करेक

१०कोनो आराधनालय में सब्त केर दिन यीशु जेखान उपदेश देत राहे ११होलेसे हुवाँए एकइन ऐसान स्त्री राहे जेकार में दुष्ट आतमा समाए जाए राहे। जेकि उके अठारह बरस से पंगु बनाए देई राहे। उ झुईक के कुबड़ी होए जाए राहे आउर थोड़ा भी सीधा नी होएक सकात राहे। १२यीशु उके जेखान देखलक होले उके अपन ठिन बोलालक आउर कहलक, “हे स्त्री, तोके अपन बिमारी से छुटकारा मिललक।” ईके कईके, १३उकार मुढ़ में अपन हाथ रईख देलाक। आउर उ तुरथे सीधा खड़ा होए गेलाक। उ परमेश्वर केर स्तुति करेक लगलक।

१४यीशु काहेकि सब्त केर दिन उके निरोग कईर राहे, ईकार लाई यहूदी आराधनालय केर नेता खिस से भईर के आदमीमान के कहलाँए, “काम करेक केर लाई छः दिन होवेला सेहेसे ओहे दिनमान में आवा आउर अपन बिमारी दूर करुवाआ लेकिन सब्त केर दिन निरोग होएक न आवा।”

१५प्रभु उत्तर देईके उमान के कहलक, “ए कपटिमान! का तोहरे में से हर केहो सब्त केर दिन अपन बैल या अपन गधा के गोहाल से निकलाए के पानी पियाएक नी लेजाला? १६एखान ई स्त्री जे ईब्राहीम केर बेटी हेके आउर जेके शैतान अठारह साल से जकाईई रईख राहे, का ईके सब्त केर दिन ईकार बंधन से मुक्त नी करेक राहे?” १७जेखान उ ईके कहलक होले उकार विरोध करेक वाला सोभे मान लज्जाए गेलाँए। उबाटे सारा भीड़ उ आश्चर्यपूर्ण काम से जेके उ कईर राहे, आनन्दित होवात रहाँए।

सोरग राईज कैसान आहे?

(मती १३:३१-३३; मरकुस ४:३०-३२)

१८सेहेसे उ कहलक, “परमेश्वर केर राईज कैसान आहे आउर मोंय उकार तुलना केकार से करबों? १९उठु सरसों केर बीज जैसान आहे, जेके केहोहर लेईके अपन बारी में बुईन देलाँए। उठु बड़का होलाक आउर एकठु गाळ बईन गेलाक। आउर आकाश केर चाराईमान उकार डाईरमान में खोता बनालाँए।”

२०उ आउर कहलक, “परमेश्वर केर राईज केर तुलना मोंय का से करबों? २१ई उ निमाक केर समान आहे जेके एकइन स्त्री लेईके तीन भाग आटा में मिलालक आउर उ समूचा आटा नमकिन होए गेलाक।”

सँकरा द्वार

(मती ७:१३-१४, २१-२३)

२२यीशु जेखान नगरमान आउर गाँवमान से होएके उपदेश देते देते यरूशलेम जात राहे। २३सेखने उके केहोहर पूछलक, “प्रभु, का थोड़ाए व्यक्तिमान केर उद्धार होवी?”

उ उके कहलक, २४“सकोट द्वार से प्रवेश करेक केर कोनो रकाम यत्न करा, काहेकि मोंय तोहरे के बताथों कि भीतरे जाएक केर यत्न बहुत कोई करबाँए लेकिन जाएक नी पारबाँए। २५जेखान एक बार घर केर स्वामी उईठ के द्वार बन्द कईर देवी, होले तोहरे बाहिरे खड़ा होएके दरवाजा खटखटाते कहबा, ‘हे स्वामी, हमार लाई दरवाजा खोईल दे!’ किन्तु उ तोहरे के उत्तर देई, ‘मोंय नी जानोना तोहरे कहाँ से आहा?’ २६सेखान तोहरेमान कहेक लागबा, ‘हमरे तोर सागें खाली, तोर सागें पिली, तोयं हमार गलिमान में हमरे के शिक्षा देले।’ २७लेकिन उ तोहरे के कही, ‘मोंय नी जानोना तोहरेमान कहाँ से आहा? अरे कुकर्मिमान! मोर ठिन से भाईग जावा।’

२८“तोहरेमान ईब्राहीम, ईसहाक, याकूब तथा अन्य सोभे नबीमान के परमेश्वर केर राईज में देखबा किन्तु तोहरे के बाहिरे ठेकाईल देवाल जाई होले हुवाँ बस कान्देक आउर दाँत रागड़ेक होई। २९आउर पूर्व आउर पश्चिम, उत्तर आउर दक्षिण केर आदमीमान परमेश्वर केर राईज में आएके भोजन केर चौकी में अपन स्थान ग्रहण करबाँए। ३०ध्यान राखा कि हुवाँ जेमान अंतिम में आहाँए, पहिले होए जाबाँए आउर जेमान पहिले आहाँए, उमान अंतिम में होए जाबाँए।”

यीशु केर मृत्यु यरूशलेम में

(मती २३:३७-३९)

३१ओहे समय यीशु ठिन काएइन फरीसी आलाँए आउर उके कहलाँए, “हेरोदेस तोके मोराएक खोजाथे, ईकार लाई हियाँ से दोसरा दिगे चाईल जा।”

३२सेखान उ उमान के कहलक, “जावा आउर उ सियार^v के कहा, ‘सुन मोंय आदमीमान से दुष्टात्मान के निकलाँबों, मोंय आईज भी चंगा करबों आउर कईल भी। आउर तीसरा दिन मोंय अपन काम पूरा करबों।’

३३आउर मोके आईज, कईल आउर परसों चालते राहेक होवी। काहेकि कोनो नबी केर लाई ई उचित नी होवी कि उ यरूशलेम से बाहिरे प्राण त्याग देवोक।

^v १३:३२ सियार सियार चालाक होएना, ईकार लाई यीशु हियाँ हेरोदेस के सियार केर रूप में सम्बोधित कईके उके धूर्त कहलक।

३४“हे यरूशलेम, हे यरूशलेम! तोयं नबीमान के हत्या करिसिला आउ परमेश्वर जेमान के तोर टिन भेईजे, उमान में पत्थर बरसाईसिला। मोंयं कितना बार तोर आदमीमान के वैसेनेहे परस्पर ईकट्टा करेके खोजलौं जैसान एक मुर्गी अपन छौवामान के अपन पाँईख केर नीचे समाईट लेवेला। लेकिन तोयं नी चाहले। ३५देख तोर लाई तोर घर परमेश्वर द्वारा बिखराल पडाल आहे। मोंयं तोके बताथौं तोयं मोके उ समय तक आउ नी देखबे जेखान तक उ समय नी आए जाई जेखान तोयं कहबे, ‘धन्य हेके उ, जेजान प्रभु केर नाम में आवाथे।’”

का सब्त केर दिन उपकार करेक उचित हेके?

१४ १एक बार सब्त केर दिन प्रमुख फरीसीमान में से केकरो घर यीशु भोजन करेक गेलाक। उबाटे उमान बहुत सामने से उके जोहात राहाँए। २हुवाँ उकार सामने बोखार से पीडित एकइन व्यक्ति राहे। ३यीशु यहूदी धर्मशास्त्री आउ फरीसीमान के पूछलक, “सब्त केर दिन केखो निरोग करेक उचित हेके या न लगे?” ४किन्तु उमान चुपे राहलाँए। सेहेसे यीशु उ आदमी के चंगा कईर देलाक। आउ उके दोसरा दिगे भेईज देलाक। ५आउ उ उमान के पूछलक, “यदि तोहरे केर केकरो टिन अपन बेटा आहे या बैल आहे, उ कुँवाँ में गिर जाई होले का सब्त केर दिन तोहरे उके जल्दी बाहिरे नी निकलवा कि?” ६उमान ईकरे से उकार साँगें तोरको नी करेक पारलाँए।

अपन के महत्त्व न देवा

७काहेकि यीशु ईके देखलक कि गुतियामान अपन लाई बैठेक केर कोनो सम्मानपूर्ण जगह खोजाथौंए, सेहेसे उ उमान के एकठु दृष्टान्त कथा सुनालक। उ बोललक: “जेखान तोके केहो शादी भोज में बोलाबाँए होले हुवाँ कोनो आदरपूर्ण जगह में न बैठबे। काहेकि होए सकेला हुवाँ केहो तोर से अधिक बड़का व्यक्ति उकार द्वारा बोलाल जाहे। ९आउ तोहरे दुनोंइन के बोलाएक वाला तोर टिन आएके तोके कही, ‘अपन ई जगह के ई व्यक्ति के देई दे।’ आउ लज्ज केर साथ तोके सोबसे नीचा जगह ग्रहण करेक होई।

१०“सेहेसे जेखान तोके बोलाल जाई होले जाएके सोबसे नीचे केर जगह ग्रहण कर जेकार से जेखान तोके आमंत्रित करेक वाला आवी होले तोके कही, ‘हे सागीं, उठ ऊपरे बैठ।’ आउ उमान सोबकार सामने, जेमान तोर साँगें हुवाँ गुतिया राहबाँए, तोर मान बढी। ११काहेकि हर

कोई जे अपने के उठाबाँए, उके नीचा करल जाई आउ जे अपने के नीचा बनाई, उके उठाल जाई।”

प्रतिफल

१२आउ जेहार उके आमन्त्रित कईर राहे, उ उके बोललक, “जेखान तोयं कोनो दिन या राईत के भोज देबे होले अपन सागीं, भाई बंधों, संबधि या धनी मानी पडोसिमान के न बोलाबे काहेकि बदला में उमान तोके बोलाबाँए आउ ई प्रकार तोके उकार फल मिल जाई। १३लेकिन जेखान तोयं कोनो भोज देबे होले दीन दुखिमान, अपाहिजमान, लँगडामान आउ अंधरामान के बोलाबे। १४काहेकि उमान टिन तोके वापस घुराएक लाई कोनो नेखे सेहेसे ई तोर लाई आशीर्वाद बईन जाई। ईकार प्रतिफल तोके धर्मी आदमीमान केर जी उठेक समय देवाल जाई।”

बड़का भोज केर दृष्टान्त कथा

(मत्ती २२:१-१०)

१५आउ उकार साथे भोजन कराईया आदमीमान में से एकइन ईके सुईनके यीशु के कहलक, “हर उइन व्यक्ति धन्य आहाँए, जेमान परमेश्वर केर राईज में भोजन करेना।”

१६जेखान यीशु उके कहलक, “एकइन व्यक्ति कोनो बड़का भोज केर तैयारी करत राहे, उ बहुत से आदमीमान के न्योता देलाक। १७आउ दावत केर समय जेमान के न्योता देवाल जाए राहे, दास के भेईजके ईके कहुवालक, ‘आवा काहेकि एखान भोजन तैयार आहे।’ १८उमान सोभे एकेरकाम आनाकानी करेक लगलाँए। पहिलाइन उके कहलक, ‘मोंयं एक खेत किन्हों, मोके जाएके उके देखेक आहे, कृपया मोके क्षमा कर।’ १९आउ दोसराइन कहलक, ‘मोंयं पाँच जोड़ा बैल किन्हों, मोंयं तो बस उसोउब के परखेक जाएक निकाईलौं, कृपया मोके क्षमा कर।’ २०एकइन आउ बोललक, ‘मोंयं पत्नी शादी कईरौं, ईकार कारण मोंयं नी आवेक पारबों।’

२१“सेहेसे जेखान उ सेवक घुईर आलक होले उ अपन स्वामी के ई बातमान के बताए देलाक। एहेसे उ घर केर स्वामी बहुत क्रोधित होलाक आउ अपन सेवक के कहलक, ‘शीघ्रहे नगर केर गली कोचा में जा आउ दीन-हीन, अपाहिजमान, अंधरा आउ लँगडामान के हियाँ बोलाए आन।’

२२“उ दासइन कहलक, ‘हे स्वामी, तोर आज्ञा पूरा कईर देवाल गेलाक किन्तु एखनो भी जगह बचाल आहे।’

२३आउ स्वामीइन सेवक के कहलक, ‘सडकमान में आउ खेतमान केर आखरी तक जा आउ हुवाँ से

आदमीमान के आग्रह कईरके हिशॉं बोलाए आन ताकि मोर घर भईर जाओक। १४आउर मॉयं तोहरे के कहाथों जेमान के पहिले बोलाल राहे उमान में से एकझन भी मोर भोज के न चाखोक।”

नियोजित बना

(मत्ती १०:३७-३८)

१५यीशु केर सागें अपार जनसमूह जात रहाँए। उ उमान केर दिगे मुडलक आउर बोललक, १६“यदि मोर ठिन केहो भी आवेक खोजेला आउर अपन बाप, माए, पत्नी आउर छौवामान अपन भाई आउर बहिनमान आउर एतना तक कि अपन जीवन के मोर से अधिक प्रेम रखेला, उ मोर चेला नी होए सकेला। १७जे अपन क्रूस बिना उठाले मोर पीछे चालेला, उ मोर चेला नी होए सकेला।

१८“यदि तोहरे केर केहो बुज बनाएक खोजी होले का उ पहिले बैठ के उकार दाम के, ईके देखेक केर लाई कि उके पूरा करेक केर लाई उकार ठिन काफ़ी धन आहे या नहीं, हिसाब-किताब नी करी कि? १९नि होले उ नीव तो डाईल देई आउर उके पूरा नी करेक पारी होले, जेमान उके शुरू करेक देईख रहाँए, सोब उकार हँसी उड़ाबाँए आउर कहबाँए, २०“अरे देखा ई व्यक्ति बनाएक शुरु तो करलक, लेकिन ई उके पूरा नी करेक सकलक।”

२१“या कोनो राजा ऐसान होबाँए कि जे कोनो दोसरा राजा केर विरोध में युद्ध छेडेक जाई आउर पहिले बैठ के ई विचार न करोक कि अपन दस हजार सैनिकमान केर सागें का उ बीस हजार सैनिक वाला अपन विरोधी केर सामना करेक सकी या नई। २२आउर यदि उ समर्थ नी होई होले उकार विरोधी जेखान रास्ता में हे राहबाँए सेखने उ अपन प्रतिनिधि मंडल भेईज के शांति-संधि केर प्रस्ताव करी।

२३“होले एहे प्रकार तोहरे में से केहो भी जे अपन सोभे सम्पत्तिमान के त्याग नी कईर देवी, मोर चेला नी होए सकी।

अपन प्रभाव न हेरावा

(मत्ती ५:१३; मरकुस ९:५०)

२४“नमक उत्तम आहे लेकिन यदि उ अपन स्वाद हेराए देई होले उके का में डालाल जाए सकेला। २५न तो वह मिट्टी केर आउर न ही खाद केर काम में आवेला, आदमीमान बस उके एसेनेहे फेईक देवेना।

“जेकार सुनेक केर कान आहे, उ सुईन लेओक।”

हेराल के पावेक केर आनन्द केर दृष्टान्त-कथामान

(मत्ती १८:१२-१४)

१५ आउर जेखान मासुल बसुलेक वाला आउर पापी सोभे उकार बात सुनेक उकार ठिन आवात रहाँए। १६होले फ़रीसी आउर यहूदी धर्मशास्त्री बड़बड़ाते कहेक लगलाँए, “ई व्यक्ति तो पापिमान के स्वागत करेला आउर उमान सागें खालेला।”

१७एहेसे यीशु उमान के ई दृष्टान्त कथा सुनालक: १८“माना कि तोहार में से केकोर ठिन एकसौ भेड़ आहाँए आउर उसोउब से कोनो एकठु हेराए जाई होले उ निन्यानबे भेड़मान के खुला में छोईड के हेराल भेड़ के खोजते राही, जेखान तक कि उ उके नी पाई। १९आउर जेखान उके भेड़ मिल जाई होले उ उके खुशी से अपन खन्ध में उठाए लेवी। २०आउर जेखान घर घुईर आवी होले अपन सागीमान आउर पड़ोसिमान के सामने बोलाएके उमान के कहेला, ‘मोर सागें आनन्द मनावे काहेकि मोके मोर हेराए जावाल भेड़ मिल गेलाक।’ २१मॉयं तोहरे के कहाथों, एहे रकाम कोनो एकझन केर मन फिराएक वाला पापी केर लाई, उ निन्यानबे धर्मी पुरुषमान से, जेमान के मन फिराएक केर आवश्यकता नैखे, सोरग में बहुत अधिक आनन्द मनाल जाई।

२२“या सोचा कोनो एखझन आउरत आहे जेकार ठिन दसठु चाँदी केर सिक्का आहे आउर उकार से एकठु सिक्का हेराए जाएला होले का उ दीया जलाए के घर के तब तक घुरते राही आउर सावधानी से नी खोजी जानों जेखान तक कि उ उठुके पाए नी जाई? २३आउर जेखान उ उठुके पाए जाएला होले अपन सहेलीमान आउर पड़ोसिमान के सामने बोलाए के कहेला, ‘मोर सागें आनन्द मनावे काहेकि मोर सिक्का जेठु हेराए जाए राहे, भेटाए गेलाक।’ २४मॉयं तोहरे के कहाथों कि एहे रकाम एकझन मन फिराएक वाला पापी केर लाई भी परमेश्वर केर दूतमान केर उपस्थिति में हुवाँ आनन्द मनाल जाई।”

भटकल बेटा के पावेक केर दृष्टान्त-कथा

२५आउर यीशु कहलक: “एकझन व्यक्ति केर दुईझन बेटा रहाँए। २६छोटोझन अपन बाप के कहलक, ‘जे सम्पत्ति मोर हिसा में होवेला, उके मोके देई दे।’ होले बाप हर उ दुनोंझन के अपन धन बाँईट देलाक।

२७कोनो अधिक समय नी बीत राहे, कि छोटो बेटा अपन समूचा सम्पत्ति समेटलक आउर दूर देश में चाईल गेलाक। आउर हुवाँ जँगलि रकाम उदण्ड जीवन जीके उ अपन सारा धन बर्बाद कईर देलाक। २८जेखान उकार

सोउब धन समाप्त होए चुईक राहे सेहे समय उ देश में सोभे दिगे से व्यापक भयानक अकाल होलाक। सेहेले उ अभाव में राहेक लगलक। १५ईकरे लाई उ उ देश केर कोनो एकइन व्यक्ति केर हुवाँ जाएके मजदूरी करेक लगलक उ व्यक्तिइन उके अपन खेत में गाहोरि चाराएक भेईज देलाक। १६हुवाँ उ सौंचालक कि उके उ भुसाए पेट भरेक लाई मिल जाताक जेके गाहोरिमान खात रहँए। लेकिन केहो उके थोड़ा भी भूसा नहीं देलाँए।

१७“आउर जेखान उकार होश आलक होले उ बोललक, ‘मोर बाप केर टिन कितना ऐसान मजदूर आहाँए जेमान टिन खाएक केर पिछे भी बचाल राहेला, आउर मोंग्र हिय्राँ भूखों मोराथों। १८सेहेसे मोंग्र हिय्राँ से उईठके अपन बाप टिन जाबों आउर उके कहबों: आबा, मोंग्र सोरग केर परमेश्वर आउर तोर विरुद्ध पाप करलौं। १९एखान आगे मोंग्र तोर बेटा कहाएक योग्य नी राहलौं। मोके अपन एकइन मजदूर समईइके रईख ले।’ २०सेहेसे उ उईठ के अपन बाप टिन चाईल देलाक।

छोटो बेटा केर घुरेक

“जेखान उ थोड़ा दूर में राहे कि उके बापहर देईख पालक आउर उकार बाप के उकार में बहुत दया लगलक। सेहे कुईद के उ उके अपन बाहों में समईट लेलाक आउर चूमा करलक। ११बेटाइन बापहर के कहलक, ‘आबा, मोंग्र तोर दृष्टि में आउर सोरग केर विरुद्ध पाप करलौं, मोंग्र एखान आउर अधिक तोर बेटा कहालाएक योग्य नैखों।’

२२“किन्तु बाप हर अपन सेवकमान के कहलक, ‘जल्दी से भाल पोशाक निकलाए आना आउर ईके पिन्धावा। ईकार हाथ में अँगूठी आउर गोढ़ में चप्पल पिन्धावा। २३कोनो मोटा ताजा बछड़ा आईनके मारा आउर आवा उके खाएके हमरे आनन्द मनाबोई। २४काहेकि मोर ई बेटा जे मोईर जाए राहे एखान जैसान आउर जीवित होए जाहे। ई हेराए जाए राहे, लेकिन एखान ई मिल गेलाक।’ सेहेसे उमान आनन्द मनाएक लगलाँए।

बड़का बेटा केर शिकायत

२५“सेखान उकार बड़का बेटा जे खेत में राहे, जेखान आलक आउर घर टिन पहुँचलक होले उ गाना नाचेक केर स्वरु सुनलक। २६उ अपन एकइन सेवक के बोलाएके पूछलक, ‘ई सोब का होवाथे?’ २७सेवकइन उके कहलक, ‘तोर भाई आए गेलाक आउर तोर आबा उके सुरक्षित आउर स्वस्थ पाएके एकटु मोटा बछड़ा कटुवाह!’

२८“बड़का भाई आग बबूला होए गेलाक, उ भीतरे जाएक तक नी खोजात राहे। सेलाई उकार बापहर बाहिर आएके उके समझालक बुझालक। २९लेकिन उ बापहर के उत्तर देलाक, ‘देख मोंग्र कितना बछार से तोर सेवा करते आवाथों। मोंग्र तोर कोनो भी आज्ञा केर विरोध नी कईरौं, लेकिन तोयं मोके केखनों एकटु बकरी तक नी देहिस कि मोंग्र अपन संगमान केर सागे कोनो आनन्द मनाएक सकतों। ३०लेकिन जेखान तोर ई बेटा आलक जे वेश्यामान में तोर धन उड़ाए देलाक, उकार लाई तोयं मोटा ताजा बछड़ा मरुवाले।’

३१“बाप हर उके कहलक, ‘मोर बेटा, तोयं हरदम मोर टिन आहिस आउर जे कुछ मोर टिन आहे, सोउब तोरे हेके। ३२किन्तु हमरे खुशी होएक लगे आउर परब मनाएक लगे काहेकि तोर ई भाई, जे मोईर जाए राहे, एखान फिर जीवित होए गेलाक। ई हेराए जाए राहे, जे फिर से मिल गेलाक।’”

सच्चा धन

१६ १आउर यीशु अपन चेलामान के कहलक, “एकइन धनी पुरुष राहे। उकार एकइन प्रबन्धक राहे उ प्रबन्धक में लाँछन लगाल गेलाक कि उ उकार सम्पत्ति के नष्ट कराथे कईके। २सेहे उ उके बोलालक आउर कहलक, ‘तोर विषय में मोंग्र ई का सुनाथों? अपन प्रबन्ध केर लेखा जोखा दे काहेकि एखान आगे तोयं प्रबन्धक नी राहेक पारबे।’

३“एहे से प्रबन्धक मन ही मन कहलक, ‘मोर स्वामी मोरसे मोर प्रबन्धक केर काम छीनाथे, होले एखान मोंग्र का करबों? मोरमें एखान ईतना शक्ति भी नैखे कि मोंग्र खेत में खुदाई-गुड़ाई केर काम करेक सकबों आउर माँगिक में मोके लाज लगेला। ४ठीक, मोके समझ में आए गेलाक कि मोके का करेक होई, जेकार से जेखान मोंग्र प्रबन्धक केर पद से हटाए देवाए जाबों होले आदमीमान अपन घर में मोर स्वागत सन्मान करबाँए।’

५“सेहे उ स्वामीहर केर हर देनदारमान के बोलालक। पहिला व्यक्ति के उ पूछलक, ‘तोयं मोर स्वामी के कितना देवेक आहे?’ ६उ कहलक, ‘एक सौ मोन जैतून केर तेल।’ एहेसे उ उके बोललक, ‘यदे ले अपन बही आउर बैठ के जल्दी ईके पचास कईर दे।’

७“आउर उ दोसरा के कहलक, ‘आउर तोर कितना देवेक आहे?’ उ बतालक, ‘एक सौ भार गेहूँ।’ उ उके बोललक, ‘यदे ले अपन बही आउर सौ के अस्सी कईर दे।’ ८“ऐसाने करेक से उकार स्वामी उ बेईमान प्रबन्धक

केर प्रशंसा करलक काहेकि उ चतुराई से काम करलक। सांसारिक व्यक्ति अपन जैसान व्यक्तिमान से व्यवहार करेक में आध्यात्मिक व्यक्तिमान से अधिक चतुर रहौएना।

१०“मोंग्रं तोहरे के कहाथों सांसारिक धन-सम्पत्ति से अपन लाई ‘संग’ बनावा। काहेकि जेखान धन-सम्पत्ति समाप्त होए जाई, उमान अनन्त निवास में तोहार स्वागत करबाँए। १०उ आदमीमान जेमान में थोड़ा केर लाई विश्वास कराल जाई आउर एहे रकाम जे थोड़ा केर लाई बेईमान होई सकेला उ अधिक केर लाई भी बेईमान होवी। ११एहे रकाम यदि तोहरे सांसारिक सम्पत्ति केर लाई भरोसा योग्य नी राहबा होले सच्चा धन केर विषय में तोहरे में के भरोसा करी? १२जे कोनो दोसरा केर हेके, यदि तोग्रं उकार लाई विश्वास केर योग्य नी राहबे, होले जेटु तोर हेके, उके केहार तोके देवी?

१३“कोनो भी दास दुईझन स्वामिमान केर सेवा नी करेक सकेना। उ या तो एकझन से घृणा करी आउर दोसरा के प्रेम या उ एकझन केर प्रति समर्पित रही आउर दोसरा के तिरस्कार करी। तोहरे धन आउर परमेश्वर दुनों केर उपासना एके सागों नी करेक सकबा।”

प्रभु केर विधि अटल आहे

(मत्ती ११:१२-१३)

१४आउर जेखान पैसा केर पुजारी फरीसीमान ई सोब के सुनलाँए होले उमान यीशु केर बहुत हंसी उडालाँए। १५एहलाई उ उमान के कहलक, “तोहरे उमान हेका जे आदमीमान के ईके बताएक खोजाला कि तोहरे बहुत अच्छा हेका किन्तु परमेश्वर तोहरे केर मन के जानेला। आदमीमान जेके बहुत मूल्यवान समझेना, परमेश्वर केर लाई उतु तुच्छ हेके।

१६“यूहन्ना तक व्यवस्था केर विधि आउर नबीमान केर प्रमुखता राहे। उकार पिछे परमेश्वर केर राईज केर सुसमाचार प्रचार कराल जाथे आउर हर कोई बहुत तीव्रता से ईकार दिगे खिंचाए के चाईल आवाथाँए। १७फिर भी सोरग आउर धरती केर डिग जाएक तो सहज आहे किन्तु व्यवस्था केर विधि केर एक-एक बिंदु केर शक्ति सोभे समय अटल आहे।

तलाक आउर पुर्नविवाह

१८“उ हर केहो जे अपन पत्नी के त्यागेला आउर दोसरा के शादी करेला, उ व्यभिचार करेला। एसाने जे अपन

पति द्वारा त्यागाल, कोनो स्त्री से शादी करेला, उ भी व्यभिचार करेला।”

धनी पुरुष आउर लाजर

१९“देखा, एकझन व्यक्ति राहे जे बहुत धनी राहे। उ बैंगनी रंग केर उत्तम मलमल केर पोशाक पिन्धात राहे आउर हर दिन विलासिता जीवन केर आनन्द लेवात राहे। २०हुवाँए लाजर नाम केर एकझन दीन दुखी उकार द्वार में पईड रहत राहे। उकार शरीर घावमान से भराल राहे। २१उ धनी पुरुष केर जूटा से हे उ अपन पेट भरेक लाई तरसत राहे। एतना तक कि कुकुरमान भी आएके उकार घावमान के चाटात रहाँए।

२२“आउर ऐसान होलाक कि उ दीन-हीन व्यक्ति मोईर गेलाक। सेहे सोरगदूतमान लेई जाएके उके ईब्राहीम केर गोद में बैठाए देलाँए।आउर उ धनी पुरुष भी मोईर गेलाक आउर उके दफनाए देवाल गेलाक। २३नरक में तडपते तडपते उ जेखान आँईख उठाए के देखलक होले ईब्राहीम उके बहुत दूर में देखलक आउर उ लाजर के उकार गोद में देखलक। २४सेखान उ पुकाईर के कहलक, ‘आबा ईब्राहीम, मोके दया कर आउर लाजर के भेज कि उ पानी में अपन उँगली डुबाए के मोर जीभ के ठंडा कईर देओक, काहेकि मोंग्रं ई आगुन में तडपाथों।’

२५“किन्तु ईब्राहीम कहलक, ‘हे मोर बेटा, याईद कर, तोग्रं तोर जीवन काल में अपन अच्छा वस्तुमान के पाए गेले जबकि लाजर के बुरा वस्तुमान हे मिललक। सेहेसे एखान उ हियाँ आनन्द भोग कराथे आउर तोग्रं यातना। २६आउर ई सोब केर अतिरिक्त हमार आउर तोर बीच में एकटु बड़का गड़ा स्थिर कराल आहे ताकि हियाँ से यदि केहो तोर टिन जाएक खोजलो से, उ जाएक नी सकी आउर हुवाँ से केहो हियाँ आवेक नी सकबाँए।’

२७“उ धनवानझन कहलक, ‘होले हे आबा, मोंग्रं तोके प्रार्थना कराथों कि तोग्रं लाजर के मोर आबा केर घर भेईज दे २८काहेकि मोर पाँचझन भाई आहाँए, उ उमान के चेतावनी देओक ताकि उमान के ई यातना केर जगह में न आवेक होक।’

२९“किन्तु ईब्राहीम कहलक, ‘उमान टिन मूसा आहे आउर नबी आहाँए। उमान के उसोउब केर बात सुनेक दे।’

३०“धनवानझन कहलक, ‘नई, आबा ईब्राहीम, यदि केहो मोरालमान में से उमान टिन गेलेसे उमान मन फिराबाँए।’

३१“ईब्राहीम उके कहलक, ‘यदि उमान मूसा आउर नबीमान केर बात नी सुनेना होले, यदि केहो मोरालमान में से उईठके उमान टिन गेले भी उमान नी मानबाँए।’”

पाप आउर क्षमा

(मती १८:६-७, २१-२२; मरकुस ९:४२)

१७

१यीशु अपन चेलामान के कहलक, “जेकार से आदमीमान भटकेना, ऐसान बातमान तो होबे घारी किन्तु धिक्कार आहे उ व्यक्ति के जेकार द्वारा आदमीमान भटकेना। २जे छोटोमान के कोनो पाप करेक लाई प्रेरित करेला, उ जाते आउर केखो ई छोटोमान के पाप करवाएक नई पारोक, उकार लाई अधिक अच्छा एहेठु होताक कि, उकार घेचां में चक्की केर पाटा टईंग के उके सागर में टेकाईल देवाल जाताक। ३सावधान रहा! “यदि तोर भाई पाप करी होले उके धमकाओ आउर यदि उ अपन करल में पछताई होले उके क्षमा कईर दे। ४यदि हर दिन उ तोर विरुद्ध सात बार पाप करी आउर सातो बार घुईर आपके तोके कही कि मोके पछतावा आहे होले तोय उके क्षमा कईर दे।”

तोहरे केर विश्वास केतना बड़का आहे?

५एहे से चेलामान प्रभु के कहलाँए, “हमारे केर विश्वास के बढ़ोतरी कईर दे।”

६प्रभु कहलक, “यदि तोहरे में सरसों केर दाना ओतना भी विश्वास होताक होले तोहरे ई शहतूत केर गाछ के कहेक सकवा ‘उखईइ जा आउर समुद्र में जाएके रोपाए जा।’ आउर उ तोहार बात माईन लेताक।

उत्तम सेवक बना

७“माना कि तोहरे में से केकरो टिन एकझन दास आहे जे हल जोतेला या भेड़मान के चराएला। उ जेखान खेत से घुईर के आवी होले का उकार मलिक उके कही कि, ‘तुरथे आव आउर खाना खाएक बैठ जा?’ ८किन्तु बजाय ईकार का उ उके ईके नी कही जानों, ‘मोर भोजन तैयार कर, अपन पोशाक पिन्धके जेखान तक मोंय खाए-पी नी लेबों, मोर सेवा कर; ईकार पिछे तोयं भी खाए पी सकिसिला?’ ९अपन आज्ञा पूरा करल से का उ मलिक उ सेवक के धन्यवाद करेला। १०तोहरे साथे भी ऐसाने हे होक। जे कोनो तोहरे के करेक लाई कहाल जाहे, उके कईर चुकाल पिछे तोहरे के कहेक लगे, ‘मोंय तो दास हेंकों, हमरे कोनो बड़ाई केर अधिकारी न लगी। मोंय तो बस अपन कर्तव्य निभालों।’”

आभारी रहा

११आउर जेखान यीशु यरूशलेम जात राहे होले उ सामरिया आउर गलील केर बीच केर सीमा टिन से निकललक। १२जेखान उ एकठु गाँव में जात राहे सेखने उके दसझन कोढ़ी मिललाँए। उ थोड़ा दूर में खाड़ा राहे। १३उमान ऊँचा स्वर में पुकाईर के बोललाँए, “हे यीशु! हे स्वामी! हमरे के दया कर!”

१४आउर जेखान उ उमान के देखलक होले उ बोललक, “जावा आउर अपन के याजकमान के देखावा।”

उमान जेखान जात हाँए कि उमान कोढ़ से मुक्त होए गेलाँए। १५किन्तु उमान में से एकझन जेखान ईके देखलक कि उ शुद्ध होए गेलाक, होले उ वापस घुईर आलक आउर ऊँचा स्वर में परमेश्वर केर स्तुति करेक लगलक। १६उ हपकुरिया यीशु केर चरण में गिरलक आउर उकार आभार व्यक्त करलक। (आउर देखा, उ एकझन सामरी राहे।) १७यीशु उके पूछलक, “का सोभे दसोझन कोढ़ से मुक्त नी होलाँए जानों? होले उ नौझन कहाँ आहाँए? १८का ई परदेसी के छोईइ के उमान केर केहो भी परमेश्वर केर स्तुति करेक वापस नी आलाँए।” १९आउर यीशु उके कहलक, “खड़ा हो आउर चईल जा, तोर विश्वास से तोके अच्छा करलक।”

परमेश्वर केर राईज तोहरे केर भीतरेहे आहे

(मती २४:२३-२८, ३७-४१)

२०एक बार जेखान फरीसीमान यीशु के पूछलाँए, “परमेश्वर केर राईज केखान आवी?”

होले उ उमान के उत्तर देलाक, “परमेश्वर केर राईज ऐसाने दिसतार रूप में नी आवी। २१आदमीमान ऐसान नी कहबाँए, ‘उ हियँ आहे’, या ‘उ हुवाँ आहे’, काहेकि परमेश्वर केर राईज तो तोहरे केर भीतरेहे आहे।”

२२किन्तु उ चेलामान के बतालक, “ऐसान समय आवी जेखान तोहरे मनुष्य केर बेटा केर दिनमान में से एको दिन के भी देखेक लाई तरसबा किन्तु, उके देखेक नी पाबा। २३आउर आदमीमान तोहरे के कहबाँए, ‘देखा, हियँ!’ या ‘देखा, हुवाँ!’ तोहरे हुवाँ न जाबा या उमानक अनुसरण न करबा।

२४“वैसानेहे जैसान बिजली चमईक के एक छोर से दोसरा छोर तक आकाश के चमकाए देवेला, वैसानेहे मनुष्य केर बेटा भी अपन दिन में होई। २५किन्तु पहिले उके बहुत यातना भोगेक होई आउर ई पीढ़ी द्वारा उ निश्चय नकाईर देवाल जाई।

२६“वैसानेहे जैसान नूह केर दिन में होए राहे, मनुष्य

केर बेटा केर दिनों में भी होई।^{१७} उ दिन तक जेखान नूह नौका में प्रवेश करलक, आदमीमान खाते-पीते रहाँए, ब्याह रचात रहाँए आउर शादी देवाल जात रहाँए। आउर जल प्रलय आलक आउर उ सोउबके नष्ट कई देलाक।

^{१८}“एहे प्रकार लूत केर दिन में भी ठीक ऐसानेहे होए राहे। आदमीमान खाते-पीते, किन्ते, बेचते खेती करते आउर घर बनाते रहाँए।^{१९}किन्तु उ दिन जेखान लूत सदोम से बाहिर निकललक होले आकाश से अग्नि आउर गंधक बरसेक लगलक आउर उ सोब नष्ट होए गेलाक।^{२०} उ दिन भी जेखान मनुष्य केर बेटा प्रकट होई, ठीक ऐसानेहे होई।

^{२१}“उ दिन यदि कोनो व्यक्ति छत में रही आउर उकार सामान घर केर भीतरे रही होले उके लेगेक उ नीचे न उतरोक। एहे प्रकार यदि कोनो व्यक्ति खेत में रही होले उ पीछे न घुरोक।^{२२}लूत केर पत्नी के याईद करा,

^{२३}“जे केहो अपना जीवन बचाएक केर यत्न करी, उ उके हराए देवी आउर जे अपन जीवन हेराई, उ उके बचाए लेवी।^{२४}मोंय तोहरे के बताथों, उ राईत एकठु चारपाई में जे दुईइन मनुष्य रहबाँए, उमान में से एकइन के उठाए लेवाल जाई आउर दोसरा के छोईइ देवाल जाई।^{२५}दुईइन स्त्रीमान जेमान एके सागों चक्की पीसते रहबाँए, उमान में से एकइन के उठाए लेवाल जाई आउर दोसरा के छोईइ देवाल जाई।”^{२६}^a

^{२७}आउर यीशु केर चेलामान उके पूछलाँए, “हे प्रभु, ऐसान कहाँ होई?”

उ उमान के कहलक, “जहाँ लाश पड़ाल रही, गिद्ध भी हुवाँए ईकड़ा होबाँए।”

परमेश्वर अपन भक्त मान केर अवश्य सुनी

१८ ^१आउर उ उमान के ईके बताएक केर लाई कि उमान निरन्तर प्रार्थना करते रहोक आउर निराश न होक, ई दृष्टान्त कथा सुनालक: ^२उ बोललक: “कोनो नगर में एकइन न्यायाधीश रहे। उ न तो परमेश्वर के डरत राहे आउर न ही मनुष्यमान केर परवाह करत राहे।^३ओहे नगर में एकइन विधवा भी रहात राहे। आउर उ न्यायाधीश टिन घाने घाने आएके कहत राहे, “देख, मोके मोर प्रति करल अन्याय केर विरुद्ध न्याय मिलेके लगी।”^४सेहेसे एकठु लम्बा समय तक तो उ न्यायाधीश आनाकानी करते रहलक लेकिन आखिरीमें उ अपन मन

^a १७:३६ कोनो कोनो यूनानी प्रतिमान में पद ३६ जोड़ाल जाहे: “दुईइन पुरुष जेमान खेत में रहबाँए, उमान में से एकइन के उठाए लेवाल जाई आउर दूसराइन के छोईइ देवाल जाई।”

में सोचलक, “न तो मोंय परमेश्वर के डराओना आउर न आदमीमान केर परवाह करोना। “होले भी काहेकि ई विधवा मोर कान खाए देथे, सेहे मोंय देखबों कि उके न्याय मिल जाओक ताकि ई मोर टिन घाने-घाने आएके मोके हे न थकुवाए देओक।”

^५आउर प्रभु कहलक, “देखा उ दुष्ट न्यायाधीश का कई राहे।^६सेहेसे का परमेश्वर अपन चुनाल आदमीमान के ध्यान नी देई कि उमान के, जे उके राईत दिन पुकारते रहेना, न्याय मिलोक कईके? का उ उमान के सहायता करेक में देरी लगाई कि? “मोंय तोहरे के कहाथों कि उ देखी कि उमान के न्याय मिल चुईके आउर शीघ्र हे मिल चुईके। आउर भी जेखान मनुष्य केर बेटा आवी होले का उ ई धरती में विश्वास के पावी?”

दीनता केर सागों परमेश्वर केर उपासना

^१आउर यीशु उ आदमीमान केर लाई भी जेमान अपने के तो नेक मानात रहाँए, आउर दोसरामान के कोनो नी समझत रहाँए, ई दृष्टान्त कथा सुनालक: ^२“मन्दिर में दुईइन व्यक्ति प्रार्थना करेक गेलाँए, एकइन फ़रीसी राहे आउर दोसराइन मासुल वसूलेक वाला।^३उ फ़रीसी अलग खड़ा होएके ऐसान प्रार्थना करेक लगलक, “हे परमेश्वर, मोंय तोर धन्यवाद कराथों कि मोंय दोसरा आदमीमान केर जैसान डाकू, ठग आउर व्यभिचारी नैखों आउर न ही ई मासुल वसूलेक वाला जैसान आहों।^४मोंय सप्ताह में दुई बार उपवास रखेना आउर अपन समूचा आय केर दसवाँ भाग दान देवना।”

^५“किन्तु उ मासुल वसूलेक वाला जे दूरे खड़ाए राहे आउर एतना तक केर सोरग दिगे अपन आँईख तक नी उठाए राहे, अपन छाती पीटते पीटते बोललक, “हे परमेश्वर, मोके पापी के दया कर।”^६मोंय तोहरे के बताथों, एहे मनुष्य नेक ठहराए जाएके अपन घर घुरलक, न कि उ दोसराइन। काहेकि हर उ व्यक्ति जे अपने के बड़का समझी, उके छोटे बनाए देवाल जाई आउर जे अपने के दीन सोची, उके बड़का बनाए देवाल जाई।”

छौवामान सोरग केर सच्चा अधिकारी हँकाँए

(मत्ती १९:१३-१५; मरकुस १०:१३-१६)

^१आदमीमान अपन छौवामान के यीशु केर टिन आनात रहाँए कि उ उमान के बस छूई भईर देओक कईके। किन्तु जेखान उकार चेलामान ईके देखलाँए होले उमान के गरीयालाँए।^२किन्तु यीशु छौवामान के अपन टिन बोलालक आउर चेलामान के कहलक, “ई छोटे

छोवामान के मोर टिन आवेक देवा, ईमान के माना न करा, काहेकि परमेश्वर केर राईज ऐसानेमान केर हेके।
 १७मोंय सच्चाई केर साथ तोहरे के कहाथों कि ऐसान केहो भी जे परमेश्वर केर राईज के एकझन अबोध छोवा केर रकाम ग्रहण नी करी, उकार में कभी प्रवेश करेक नी पावी!”

एकझन धनिक केर यीशु के प्रश्न

(मती १९:१६-३०; मरकुस १०:१७-३१)

१८आउर कोनो एकझन यहूदी नेता यीशु के पूछलक, “हे उत्तम गुरु, अनन्त जीवन केर अधिकार पावेक लाई मोके का करेक लागी?”

१९यीशु उके कहलक, “तोयं मोके उत्तम काहे कहाथिस? केवल परमेश्वर के छोईड के आउर केहो भी उत्तम नैखाँए। २०तोयं व्यवस्था केर आदेशमान के तो जानिसिला, ‘व्यभिचार न कर, हत्या न कर, चोरी न कर, झूठी गवाही न दे, अपन आबा आउर माए के आदर कर।’”

२१उ यहूदी नेता बोललक, “मोंय ई सोब बातमान के अपन लड़कपन सेहे मानते आहों।”

२२यीशु जेखान ईके सुनलक होले उ उके बोललक, “एखनो भी एकठु बात आहे जेकार तोर में कमी आहे। तोर टिन जे कुछ आहे, सोबके बेईच दे आउर जे मिली, उके गरीबमान में बाँईट दे। ईकार से तोके सोरग में भण्डार मिली। आउर आपके मोर पीछे होए ले।” २३सेहे जेखान उ यहूदी नेता ईके सुनलक होले उ बहुत दुखी होलाक, काहेकि उकार टिन बहुत सारा सम्पत्ति राहे।

२४यीशु जेखान ईके देखलक कि उ बहुत दुखी होलक होले उ कहलक, “उ आदमीमान केर लाई जेमान टिन धन आहे, परमेश्वर केर राईज में प्रवेश कईर पाएक कितना कठिन आहे! २५हाँ, कोनो ऊँट केर लाई सूई केर टोंका से निकईल जाएक तो सम्भव आहे लेकिन कोनो धनिक केर परमेश्वर केर राईज में प्रवेश कईर पावेक असम्भव आहे।”

उद्धार केकार होई

२६उ आदमीमान जेमान ईके सुनलाँए, बोललाँए, “होले तो उद्धार केकार होई?”

२७यीशु कहलक, “उसोउब बात जे मनुष्य केर लाई असम्भव आहे, परमेश्वर केर लाई सम्भव आहे।”

v १८:२० उद्धरण निर्गमन २०:१२-२६; व्यवस्था ५:१६-२०

२८आउर पतरस कहलक, “देख, हमार टिन जे कुछ राहे, तोर पीछे चलेक केर लाई हमरे उ सोउब कुछ त्याईग देली।”

२९सेखान यीशु उमान के बोललक, “मोंय सच्चाई केर साथ तोहरे के कहाथों, ऐसान क्रियो नैखाँए जेहार परमेश्वर केर राईज केर लाई घर-बार या पत्नी या भाई-बंधु या माए-बाप या संतान के त्याग कईर देहाँए, ३०आउर उके एहे वर्तमान युग में कई गुणा अधिक नी मिली आउर आवेक वाला काल में उ अनन्त जीवन के नी पाए सकी।”

यीशु मोईर के जी उठी

(मती २०:१७-१९; मरकुस १०:३२-३४)

३१आउर यीशु उ बारहझन प्रेरितमान के एक दिगे लेई जाएके उमान के बोललक, “सुना, हमरे यरूशलेम जाथी। मनुष्य केर बेटा केर विषय में नबिमान केर द्वारा जे कुछ लिखाल जाहे, उसोउब पूरा होई। ३२हाँ, उ अधर्मिमान के सौपाल जाई, उकार हँसी उडाल जाई, उके अपमान कराल जाई आउर उकार में थूकाल जाई। ३३आउर उमान उके पीटबाँए आउर मोराए देवाँए आउर तीसरा दिन उ फिर जी उठी।” ३४ई बात मान के केहो भी उमान नी समईझ पालाँए। ई बात उमान से छिपालहे रई गेलाक। उमान समझेके नी पारलाँए कि उ कोन विषय में बताथे सेके।

अंधरा के आँईख

(मती २०:२९-३४; मरकुस १०:४६-५२)

३५यीशु जेखान यरीहो टिन पहुँचात राहे होले भीख माँगते माँगते एकझन अंधरा, हुवाँए रास्ता किनार में बैठ राहे।

३६जेखान अंधराझन समने से आदमीमान केर जाएक केर आवाज सुनलक होले उ पूछलक, “का होवाथे?”

३७सेहे आदमीमान उके कहलाँए, “नासरी यीशु हिय्राँ से जाथे।”

३८सेहेसे अंधराझन ईके कईके पुकाईर उटलक, “दाऊद केर बेटा यीशु! मोके दया कर।”

३९उ जेमान आगे जात रहाँए उमान उके चुपे रहेक कहलाँए। किन्तु उ आउर अधिक पुकारेक लगलक, “दाऊद केर बेटा, मोके दया कर।”

४०यीशु रुईक गेलाक आउर उ आज्ञा देलाक कि नेत्रहीन के उकार टिन आनाल जाओक। सेहे जेखान उ सामने आलक होले यीशु उके पूछलक, ४१“तोयं का खोजाथिस? मोंय तोर लाई का करबों?”

उ कहलक, “हे प्रभु, मोंय आउर देखेक खोजाथों।”

४१एहे से यीशु कहलक, “तोके ज्योति मिलोक, तोर विश्वासे तोके उद्धार करलक।”

४२आउर तुरथे हे उ देखेक लगलक। उ परमेश्वर केर महिमा केर बखान करते यीशु केर पीछे होए लेलाक। जेखान सोब आदमीमान ईके देखलाँए होले उमान परमेश्वर केर स्तुति करेक लगलाँए।

जक्कई

१९

१यीशु यरीहो में प्रवेश कइके नगर बाटे से होएके जात राहे ?हुवाँ जक्कई नाम केर एकइन व्यक्ति भी राहे। उ मासुल वसूलेक वाला मान केर मुखिया राहे। सेह उ बहुत धनी राहे। ईके देखेक केर जतन करत राहे कि यीशु के हेके सेके, लेकिन भीड़ केर कारण उ देखेख नी पावात राहे काहेकि उकार उंचा छोटो राहे। २सेहेसे उ सोउब से आगे कुदलक एकटु दुम्बाईर केर गाछ में जाएके चढ़लक ताकि, उ उके देखेख सकी काहेकि यीशु के ओहे रास्ता से होएके निकलेक राहे।

३आउर जेकान यीशु उ जगह में आलक होले उ ऊपरे देखेखके जक्कई के कहलक, “जक्कई, जल्दी से नीचे उतरई आव काहेकि मोके आईज तोर घर में ठहरेक आहे।”

४सेहेसे उ झटपट नीचे उतरलक खुशी से उकार स्वागत करलक। ५जेखान सोब आदमीमान ईके देखलाँए होले उमान बड़बड़ाएक लगलाँए आउर कहेक लगलाँए, “ई एकइन पापी केर घर में गुतिया बनेक जाथे!”

६किन्तु जक्कई खड़ा होलाक आउर प्रभु के बोललक, “हे प्रभु, देख, मोंय अपन सारा सम्पत्ति केर आधा गरीबमान के देई देबों आउर यदि मोंय केकरो छल से कोनो भी लेईहों होले उके चौगुना कइके घुराए देबों!”

७यीशु उके कहलक, “ई घर में आईज उद्धार आहे, काहेकि ई व्यक्ति भी ईब्राहीम केरे एकइन सन्तान हेके। ८काहेकि मनुष्य केर बेटा जेमान हेराए जाहाँए, उमान के खोजेक आउर उमान केर रक्षा केर लाई आहे।”

परमेश्वर जे देवेला उकार उपयोग करा

(मती २५:१४-३०)

११उमान जेखान ई बातमान के सुनात रहाँए होले यीशु उमान के एकटु आउर दृष्टान्त-कथा सुनालक काहेकि यीशु यरूशलेम केर सामने राहे आउर उमान सोंचात रहाँए कि परमेश्वर केर राईज तुरथे ही प्रकट होवेक वाला आहे कइके। १२सेहेसे यीशु कहलक, “एकइन उच्च कुलीन व्यक्ति राजा केर पद प्राप्त कइके आनेक

लाई कोनो दूर देश में गेलाक। १३सेहे उ अपन दसइन सेवकमान के बोलालक आउर उमान के हर एक के दस दस थैला देलाक आउर उमान के कहलक, “जेखान तक मोंय घुईर आबों, ईकार से कोनो व्यापार करा।” १४किन्तु उकार नगर केर दोसरा आदमीमान उके घृणा करात रहाँए, ईकरे लाई उमान उकार पीछे ईके कहेक लाई एकटु प्रतिनिधि मंडल भेजलाँए, “हमरे नी खोजाथी कि ई व्यक्ति हमरे के राज करोक।”

१५“किन्तु उ राजा केर पदवी पाए गेलाक। आउर जेखान उ वापस घर घुरलक होले जे सेवकमान के उ धन देई राहे उमान के ईके जानेक केर लाई कि उमान केतना लाभ कमालाँए सेके, उमान के बोलाए भेजलक। १६पहिलाइन आलक आउर बोललक, ‘हे स्वामी, तोर थैला से मोंय दस थैला आउर कमालों।’ १७सेहेसे उकार स्वामी उके कहलक, ‘उत्तम सेवक, तोय अच्छा करले। काहेकि तोय ई छोटो बात में विश्वास केर योग्य रहले। तोय दसटु नगर केर अधिकारी होबे।’

१८“आउर दूसरा सेवक आलक आउर उ कहलक, ‘हे स्वामी, तोर थैला से पाँच थैला आउर कमालों।’ १९आउर उ ईके कहलक, ‘तोय पाँचटु नगर केर ऊपरे होबे।’

२०“आउर उ दोसरा सेवक आलक आउर कहलक, ‘हे स्वामी, येदे रहलक तोर थैला जेके मोंय गमछा में बाँईध के रईख देई राहों। २१मोंय तोके डरात राहों, काहेकि तोय, एकइन कठोर व्यक्ति हेकिस। तोय जेके नी रखीसिला तोय उके भी लेवीसिला आउर जेके तोय नी बुनिसिला तोय उके काटिसिला।’

२२“स्वामीइन उके कहलक, ‘अरे दुष्ट सेवक, मोंय तोर अपन शब्द केर आधार में तोर न्याय करबों। तोय तो जानिसिला कि मोंय जेके नी रखेना, उके भी लेई लेवेक वाला आउर जेके नी बुनोना, उके भी काटेकवाला एकइन कठोर व्यक्ति हेकों? २३होले तोय मोर धन शुद में काहे नी राखले, ताकि जेखान मोंय वापस आतों होले शुद समेत उके लेई लेतों।’ २४आउर सामने खड़ा आदमीमान के उ कहलक, ‘ईकार थैला ईकार से लेई लेवा आउर जेकार ठिन दस थैला आहे उके देई देवा।’

२५“एहेसे उमान उके कहलाँए, ‘हे स्वामी, उकार ठिन तो दस थैला आहे।’

२६“स्वामीइन कहलक, ‘मोंय तोहरे के कथाथों प्रत्येक उ व्यक्ति के जेकार ठिन आहे आउर अधिक देवाल जाई

१९:१३ थैला शाब्दिक, मीनार। एक मीनार बराबर उ समय केर तीन महीना केर वेतन।

आउर जेकार टिन नैखे, उकार जे भी उकार टिन आहे, उके भी छीन लेवाल जाई। २७किन्तु मोर उ शत्रु जेमान नी खोजात रहाँए कि मोंग्र उमान के शासन करेक के उमान के हिय्राँ मोर सामने आना आउर मोराए देवा।”

यीशु केर यरूशलेम में प्रवेश

(मत्ती २१:१-११; मरकुस ११:१-११; यूहन्ना १२:१२-११)

२८ई बातमान के कहाल पिछे यीशु आगे चलते चलते यरूशलेम दिगे बदेक लगलक। २९आउर जेखान उ बैतफगे आउर बैतनिय्याह में उ पहाड़ केर सामने पहुँचलक जेके जैतून केर पहाड़ कहल जाएला होले उ अपन दुईझन चेलामान के ईके कईके भेजलक, ३०“ई जे गाँव तोहरे केर सामने आहे हुवाँ जावा। जैसाने तोहरे हुवाँ जाबा, तोहरे के गधी केर बच्चा हुवाँ बँधाल मिली जेकार में केहो कभी सवारी नी कईराँए साएद, उके खोईलके हिय्राँ लेई आना ३१आउर यदि केहो तोहरे के पूछबाँए कि तोहरे ईके काहे खोलाथा कईके, होले तोहरे उके कहबा कि, “प्रभु के लगी।”

३२आउर जेमान के भेजाल जाए राहे, उमान गेलाँए आउर यीशु उमान के जैसान बताए राहे, उमान के वैसेने मिललक। ३३सेहे जेखान उमान उ गधी केर बच्चा के खोलात रहाँए, उकार मलिकझन उमान के पूछलक, “तोहरे ई गधी केर बच्चा के काहे खोलाथा?”

३४उमान कहलाँए, “ईके प्रभु के लगे।” ३५आउर उमान उके यीशु केर टिन लेई आनलाँए। उमान अपन लुगा उ गधी केर बच्चा में डिसालाँए आउर यीशु के उकार में बैठाए देलाँए। ३६जेखान यीशु जात राहे होले आदमीमान अपन लुगा सड़क में डिसाते जात रहाँए।

३७आउर जेखान उ जैतून केर पहाड़ से नीचे उतरेक टिन आलक होले चेलामान केर समूचा भीड़ उ सोभे अद्भुत काममान केर लाई, जे सोउब के उमान देखेख रहाँए, ऊँचा आवाज में खुशी केर साथ परमेश्वर केर स्तुति करेक लगलाँए। ३८उमान पुकाईर उठलाँए:

“धन्य हेके उ राजा, जे प्रभु केर नाम में आवाथे।”

भजन संहिता ११८:२६

सोरग में शान्ति होक, आउर आकाश में परम परमेश्वर केर महिमा होक।”

३९भीड़ में खडाल काएझन फरीसीमान उके कहलाँए, “गुरु, चेलामान के मना कर।”

४०सेहे उ उत्तर देलाक, “मोंग्र तोहरे के कहाथोँ यदि ईमान चुपे होए भी जाबाँए होले ई पत्थर चिल्लाए उठबाँए।”

यीशु केर यरूशलेम केर लाई कान्देक

४१जेखान उ सामने आएके नगर के देखलक होले उ कान्दलक। ४२आउर बोललक, “यदि तोयं आईज ईके जानते कि शान्ति तोके केकार से मिली किन्तु उठु एखान तोर आँईख से छिपाल आहे। ४३उ दिन तोरमें आए जाए जेखान तोर शत्रु चाईरोँ दिगे बाधा खड़ा कईर देबाँए। उमान तोके घेईर लेबाँए आउर चाईरोँ दिगे से तोके दबाव डालबाँए। ४४उमान तोके धूल में मिलाए देबाँए-तोके आउर तोर भीतरे रहेक वाला तोर छौवामान के। तोर चाईरदीवारी केर भीतरे उमान एकठु पत्थर के दोसरा पत्थर में रहेक नी देबाँए। काहेकि जेखान परमेश्वर तोर टिन आलक, तोयं उ घड़ी के नी चिन पाले।”

यीशु मन्दिर में

(मत्ती २१:१२-१७; मरकुस ११:१५-१९;

यूहन्ना २:१३-२२)

४५आउर यीशु मन्दिर में प्रवेश करलक आउर जे हुवाँ दोकानदारी करत रहाँए उमान के बाहिरे निकलाएक लगलक। ४६उ उमान के कहलक, “लिखाल जाहे, ‘मोर घर प्रार्थना केर घर होई।’”^a किन्तु तोहरे ईके ‘डाकुमान केर अड्डा बनाए देहा।’^b

४७सेहेसे सेखान से उ हर दिन मन्दिर में उपदेश देवेक लगलक। प्रमुख याजक, यहूदी धर्मशास्त्री आउर मुखिया मान उके मोराएक केर ताक में रहेक लगलाँए। ४८किन्तु उके ऐसान करेक लाई उमान के कोनो अवसर नी मिललक काहेकि आदमीमान उकार वचनमान के बहुत महत्त्व देवात रहाँए।

यीशु के यहूदिमान केर एकठु प्रश्न

(मत्ती २१:२३-२७; मरकुस ११:२७-३३)

२० १एक दिन जेखान यीशु मन्दिर में आदमीमान के उपदेश देईके सुसमाचार सुनात राहे होले प्रमुख याजक आउर यहूदी धर्मशास्त्री बुजुर्ग यहूदी नेतामान केर सागों उकार टिन आलाँए। २उमान उके पूछलाँए, “हमरे के बताओ तोयं ई काम का अधिकार से कराथिस? उ के हेके जेहार तोके ई अधिकार देहे?”

^a १९:४६ उद्धरण यशा. ५६:७

^b १९:४६ उद्धरण यिर्म. ७:११

यीशु उमान के उतर देलाक, “मोंयं भी तोहरे के एकटु प्रश्न पूछाथों, तोहरे मोके बतावा य्यूहन्ना के बपतिस्मा देवेक केर अधिकार सोरग से मिल राहै या मनुष्य से?”

ईकार से आपस में विचार विमर्श कईरके उमान कहलाँए, “यदि हमरे कहबोई, ‘सोरग से’ होले ई कही, ‘होले तोहरे उके विश्वास काहे नी करला?’ ६आउर यदि हमरे कहबोई, ‘मनुष्य से’ होले सोभे आदमीमान हमर में पत्थर लेबदाबाँए। काहेकि उमान ईके मानेना कि य्यूहन्ना एकझन नबी राहै।” ७सेहेसे उमान उतर देलाँए कि उमान नी जानेना कि उके कहाँ से मिललक।

“आउर यीशु उमान के कहलक, “होले मोंयं भी तोहरे के नी बताबों कि ई काम मोंयं का अधिकार से करोना?”

परमेश्वर अपन बेटा के भजेला

(मती २१:३३-४६; मरकुस १२:१-१२)

१आउर यीशु आदमीमान के ई दृष्टान्त कथा कहेक लगलक: “कोनो एकझन व्यक्ति अंगूर केर एकटु बारी लगाएके उके काईझन किसानमान के किराया में देलाक आउर उ लम्बा समय केर लाई कोनो दिगे चईल गेलाक।

२जेखान फसल उताराएक केर समय आलक, होले उ एकझन सेवक के किसानमान टिन भेजलक ताकि उमान उके अंगूर केर बारी से थोड़ा फल देई दोंक। किन्तु किसानमान उके माईर-पीट के खाली हाथ घुराए देलाँए।

३होले उ एकझन दोसरा सेवक के हुवाँ भेजलक। किन्तु उमान उके भी पिटाई करलाँए। उमान उकार सागें बहुत बुरा व्यवहार करलाँए आउर उके भी खाली हाथ घुराए देलाँए। ४ऐसाने उ एकझन तीसरा सेवक के भेजलक किन्तु उमान ईके भी घायल कईरके बाहिरे ढेकाईल देलाँए।

५“सेखान बारी केर स्वामी कहेक लगलक, ‘मोंयं का करबों? मोंयं अपन प्यारा बेटा के भेजबों।’ ६किन्तु किसानमान जेखान उकार बेटा के देखलाँए होले आपस में सोच विचार कईरके उमान बोललाँए, ‘ई तो उत्तराधिकारी हेके, आवा हमरे ईके मोराए देबोई ताकि उत्तराधिकार हमार होए जाई।’ ७आउर उमान उके बारी से बाहिरे खदेईद के मोराए देलाँए।

“होले बारी केर स्वामी उमान केर सागें का करी? ८उ आवी आउर उ किसानमान के मोराए देई आउर अंगूर के बारी के दोसरामान के सौँइप देई।”

उमान जेखान ईके सुनलाँए होले उमान बोललाँए, “ऐसान कभी न होक।” ९सेखान यीशु उमान दिगे देईख के कहलक, “होले ई जे लिखाल आहे उकार अर्थ का हेके:

‘जे पत्थर के कारीगरमान बेकार समईझ ले रहाँए ओहोहु कोना केर मूल पत्थर बईन गेलाक?’

भजन संहिता ११८:२२

१०जे केहो उ पत्थर में गिरबाँए टुकड़ा-टुकड़ा होए जाबाँए आउर जेकार में उटु गिरी उझन चकना चूर होए जाई।”

११ओहे बेरा यहूदी धर्मशास्त्री आउर प्रमुख याजकमान कोनो रास्ता निकलाए के उके धारेक खोजात रहाँए काहेकि उमान जाईन गेलाँए कि उ ई दृष्टान्त कथा उमान केर विरोध में कई राहे। किन्तु उमान आदमीमान के डरात रहाँए।

यहूदी नेतामान केर चाल

(मती २२:१५-२२; मरकुस १२:१३-१७)

२०सेहेसे उमान सावधानी से उकार ऊपरे नजाईर रखेक लगलाँए। उमान ऐसान गुप्तचर भेजलाँए जेमान ईमानदार होवेक केर ढोंग करत रहाँए। (ताकि उमान उके उकरे कहल कोनो बात में फँसाए के राईजपाल केर शक्ति आउर अधिकार केर अधीन कईर देवेक पारबाँए।) २१सेहे उमान उके पूईछ के कहलाँए, “गुरु, हमरे जानिला कि तोयं जे उचित हेके उखे कहिसिला आउर उकरे उपदेश देईसिला आउर न ही तोयं केकरो पक्ष लेईसिला। लेकिन तोयं तो सच्चाई से परमेश्वर केर मार्ग केर शिक्षा देवीसिला। २२होले बताओ कैसर के हमार कर चुकाएक उचित हेके या नी चुकाएक?”

२३यीशु उमान केर चाल के समईझ जाए राहे। सेहे उ उमान के कहलक, २४“मोके एकटु दीनार देखावा, ईकार में मूरत आउर लिखावट केकार हेके?”

उमान कहलाँए, “कैसर केर।”

२५एहे से उ उमान के कहलक, “होले जे कैसर केर हेके, उके कैसर के देवा आउर जे परमेश्वर केर हेके उके परमेश्वर के देवा।”

२६उमान उकार उतर में चकित होएके चुपे रई गेलाँए आउर उ आदमीमान केर सामने जे कुछ कहात राहे, उकार से उके धारेक नी पारलाँए।

यीशु के धारेक लाई सदूकीमान केर चाल

(मती २२:२३-३३; मरकुस १२:१८-२७)

२७जेखान देखा काईझन सदूकीमान उकार टिन आलाँए। (ई सदूकीमान उमान रहाँए जेमान पुनरुत्थान के नी मानेना।) उमान उके पूईछके कहलाँए, २८“गुरु, मूसा हमार लाई लिखे कि यदि केकरो भाई मोईर जाई आउर

उकार कोनो छौवा नी रहबाँए आउर उकार पत्नी राही होले उकार भाई उ विधवा के ब्याह कईरके अपन भाई केर लाई, उकार से संतान उत्पन्न करी। ^{१९}एखान देख, सात भाई रहँए। पहिले भाई कोनो स्त्री के शादी करलक आउर उ बिना कोनो संतान केर मोईर गेलाक। ^{२०}आउर दोसरा भाई उके शादी करलक, ^{२१}आउर ऐसानेहे तीसरा भाई भी। सोब कार सागें एके जैसान होलक। उमान बिना कोनो संतान छोईड़ के मोईर गेलाँए। ^{२२}पिछे उ स्त्री भी मोईर गेलाक। ^{२३}एखान बताओ, पुनरुत्थान होई होले उ केकार पत्नी होई काहेकि उके तो सातोझने शादी कईर रहँए?”

^{२४}सेखान यीशु उमान के कहलक, “ई युग केर आदमीमान शादी करेना आउर शादी कईरके विदा होवेना। ^{२५}किन्तु उ आदमीमान जेमान उ युग केर कोनो भाग केर योग्य हेकाँए आउर मोराल मान में से जी उठेक केर लाई ठहराय जाहाँए, उमान न तो शादी करबाँए आउर न ही शादी कईरके विदा करल जाई। ^{२६}आउर उमान कभी नी मोरबाँए, काहेकि उमान सोरगदतमान केर समान हेकाँए, उमान परमेश्वर केर संतान हेकाँए काहेकि उमान पुनरुत्थान केर बेटा हेकाँए। ^{२७}किन्तु मूसा केर झाड़ी से सम्बन्धित अनुच्छेद में दिखाल जाहे कि मोरालमान जियाए जाहाँए, जबकि उ कई राहे प्रभु, ‘ईब्राहीम केर परमेश्वर हेके, ईसहाक केर परमेश्वर हेके आउर याकूब केर परमेश्वर हेके।’^{२८} उ मोरालमान केर नई, लेकिन जीवितमान केर परमेश्वर हेके। उ सोभे मान जेमान उकार हेकाँए जीवित आहाँए।”

^{२९}काईझन यहूदी धर्मशास्त्रिमान कहलाँए, “गुरु, अच्छा कहलक।” ^{३०}काहेकि आउर उके कोनो आउर प्रश्न पूछेक केर साहस नी करेक पारलाँए।

का मसीह दाऊद केर बेटा या दाऊद केर प्रभु हेके?

मती २२:४१-४६; मरकुस १२:३५-३७)

^{४१}यीशु उमान के कहलक, “उमान कहेना कि मसीह दाऊद केर बेटा हेके। ई कैसान होए सकेला? ^{४२}काहेकि भजन संहिता केर पुस्तक में दाऊद स्वयं कहेला कि,

‘प्रभु परमेश्वर मोर प्रभु के कहलक:

मोर दाहिना हाथ दिगे बैठ,

^{४३} जेखान तक कि मोंग्रं तोर विरोधिमान के तोर

गोढ़ रखेक केर चौकी नी बनाए देतले।’

भजन संहिता ११०:१

^{४४}ऐसान से जेखान दाऊद मसीह के ‘प्रभु’ कहेला होले मसीह दाऊद केर बेटा कैसान होए सकेला?”

यहूदी धर्मशास्त्रिमान केर विरोध में यीशु केर चेतावनी

(मती २३:१-३६; मरकुस १२:३८-४०;

लूका ११:३७-५४)

^{४५}सोभे आदमीमान केर सुनते उ अपन अनुयायिमान के कहलक, ^{४६}‘यहूदी धर्मशास्त्रीमान से सावधान रहा। उमान लम्बा चोगा पिन्धके हियाँ-हुवाँ धुरेक खोजेना, हाट-बाजारमान में उमान आदर केर साथ स्वागत-सन्मान पाएक खोजेना। आउर यहूदी आराधनालयमान में उमान सोबसे अधिक महत्त्वपूर्ण आसन केर लालसा करेना। नेवोता में उमान आदर-पूर्ण जगह खोजेना। ^{४७}उमान विधवामान केर घर-बार लूईट लेवेना। दिखावे केर लाई उमान लम्बा-लम्बा प्रार्थना करेना। ई आदमीमान के कठिन से कठिन दण्ड भुगतके होवी।”

सच्चा दान

(मरकुस १२:४१-४४)

२१ यीशु आँईख उठाए के देखलक कि धनी आदमीमान दान पात्र में अपन अपन भेंट डालाथाँए। ^२सेखने उ एकझन गरीब विधवा के उ पात्र में ताँबा केर दुईठु छोटे छोटे सिक्का डालेक देखलक। ^३उ कहलक, “मोंग्रं तोहरे के सच कहाथों कि दोसरे सोभे आदमीमान से ई गरीब विधवाझन अधिक दान देलाक। ^४इके मोंग्रं ईकार लाई कहाथों काहेकि ई सोभे आदमीमान तो अपन उ धन में से जेके उमान के आवश्यकता नी राहे, दान देई रहँए किन्तु उ विधवाझन गरीब होए के भी जीवित राहेक केर लाई जे कुछ उकार ठिन राहे, सोब के देई देलाक।”

मन्दिर के विनाश

(मती २४:१-१४; मरकुस १३:१-१३)

^५के केमान मन्दिर केर विषय में चर्चा करात रहँए कि उठु सुन्दर पत्थरमान आउर परमेश्वर के अर्पित करल मनौती केर भेंट से कैसान सजाल जाहे कईके।

^६सेखने यीशु कहलक, “ऐसान समय आवी जेखान, ई जे कुछ तोहरे देखाथा, उकार में एकठु पत्थर दोसरा

^२ २०:३७ ‘ईब्राहीम ... हेके’ देखांब निर्गमन ३:६

पत्थर में टिकाल नी राहेक पारि। उ सोभे ढसाए देवाल जाई।”

७उमान उके पूईछके बोललाँए, “गुरु, ई बातमान केखान होई? आउर ई बातमान जे होवेक वाला आहे, उकार का चिन्हा होई?”

८यीशु कहलक, “सावधान रहा, कहीं केहो तोहरे के फुसलाए न लेओक। काहेकि मोर नाम से बहुत आदमीमान आपके कहबाँए, ‘उझन मोंयं हेंकों’ आउर ‘समय आए पहुँईचे।’ उमान केर पीछे न जाबा। ९लेकिन जेखान तोहरे लड़ाई आउर झगड़ा के चर्चा सुनबा होले न डराबा काहेकि ई सोउब बातमान तो पहिले घटबे घारी। आउर उसोउब केर अन्त तुरथे नी होई।”

१०उ उमान के आउर कहलक, “एकठु जाति दोसरा जाति केर विरोध में खड़ा होबाँए आउर एकठु राईज दोसरा राईज केर विरोध में। ११बड़का-बड़का भूकम्प होई आउर अनेक जगह में अकाल पड़ी आउर महामारिमान होवी। आकाश में भयानक घटनामान घटी आउर महान संकेत प्रकट होवी।

१२“किन्तु ईसोउब बातमान घटेक से पहिले उमान तोहरे के बंदी बनाए लेबाँए आउर तोहरे के यातनामान देबाँए। उमान तोहरे ऊपरे अभियोग चलाएक लाई तोहरे के यहूदी आराधनालयमान में सौँईप देबाँए आउर तोहरे के बन्दीगृह में भेईज देवाल जाई। आउर मोर नाम केर कारण उमान तोहरे के राजा आउर राईजपालमान केर सामने लेई जाबाँए। १३एहेसे तोहरे के मोर विषय में साक्षी देवेक केर अवसर मिली। १४ईकार लाई पहिले से हे ईसोउब केर चिन्ता नी करेक केर निश्चय कईर लेवा कि अपन बचाव में तोहरे कैसान करबा। १५काहेकि मोंयं तोहरे के ऐसान बुद्धि आउर ऐसान शब्द देबों कि तोहरे के कोनो भी विरोधी तोहार सामना आउर तोहरे के खण्डन नी करेक सकबाँए। १६किन्तु तोहरे केर माए-बाप, भाई बन्धु, सम्बन्धी आउर साथीमाने तोहरे के धोखा से धारुवाबाँए आउर तोहरे केर से केखो केखो के तो मोरुवाए देबाँए। १७मोर कारण सोबकोई तोहरे के बेया पावाँए। १८किन्तु तोहरे केर मुढ़ केर एकोठु केशं तक पाका नी होई। १९तोहरे केर सहनशीलता, तोहार प्राण केर रक्षा करी।

यरूशलेम केर नाश

(मत्ती २४:१५-२१; मरकुस १३:१४-१९)

२०“आउर देखा जेखान यरूशलेम के तोहरे सेनामान से घेराल देखबा सेखान समईझ लेबा कि उकार तहस नहस

होए जाएक निकट आहे। २१सेखान जेमान यहूदिया में राहबाँए, उमान पहाड़मान में भाईग जाओक आउर उ जेमान नगर केर भीतरे राहबाँए, बाहिरे निकईल आओक आउर उजेमान गाँव में राहबाँए उमान नगर में नी जाएक लगी। २२काहेकि उसोउब दिन दण्ड देवेक केर लाई होई। ताकि जे लिखल जाहे, उ सोभे बातमान पूरा होक। २३उ स्त्रीमान केर लाई, जेमान गर्भवती राहबाँए आउर उमान केर लाई जेमान दूध पियाते राहबाँए, उसोउब दिन कितना भयानक होई। काहेकि उ दिनमान में ई धरती में बहुत बड़का विपत्ति आवी आउर ई आदमीमान केर ऊपरे परमेश्वर केर क्रोध होवी। २४उमान तलवार केर धार से गिराए देवाल जाबाँए। आउर बंदी बनाए के सोब देशमान में पहुँचाए देवाल जाबाँए आउर यरूशलेम गैर यहूदीमान केर गोढ़ नीचे सेखान तक रौंदाल जाई जेखान तक कि गैर यहूदीमान केर समय पूरा नी होए जाई।

न डरावा

(मत्ती २४:२९-३१; मरकुस १३:२४-२७)

२५“सूरज, चाँद आउर तारिगान में संकेत प्रकट होई आउर धरती केर सोभे जातिमान में विपत्तिमान आवी आउर उमान सागर केर उथल-पुथल से घबराए जाबाँए। २६आदमीमान डर आउर संसार में आवेक वाला विपत्तीमान केर डर से मोराल रकाम होए जाबाँए काहेकि सोरगिक शक्तिमान के हिलाई देवाल जाई। २७आउर सेखान उमान मनुष्य केर बेटा के अपन शक्ति आउर महान महिमा केर सागें एक बादल में आवेक के देखबाँए। २८आउर देखा, ई बातमान जेखान घटेक लगी होले तोहरेमान खड़ा होएके अपन मुढ़ ऊपरे उठाए लेवा। काहेकि तोहरे केर छुटकारा सामने आते राही।”

मोर वचन अमर आहे

(मत्ती २४:३२-३५; मरकुस १३:२८-३१)

२९आउर उ उमान के एकठु दृष्टान्त-कथा कहलक: “आउर सोभे गाछ तथा अंजीर केर गाछ के देखा। ३०उकार में जैसानेहे कली फूटेला, तोहरे अपनेमान जाईन जावाला कि गर्मी केर ऋतु आए पहुँचलक कईके। ३१वैसानेहे तोहरे जेखान ईसोउब बातमान के घटेक देखबा होले जाईन लेबा कि परमेश्वर केर राईज निकट आहे।

३२“मोंयं तोहरे के सच कहाथों कि जेखान तक ई सोब बातमान नी घटी, ई पीढ़ी केर अंत नी होई। ३३धरती आउर आकाश नष्ट होए जाई, लेकिन मोर वचन सोभे समय अटल रही।

सदा तैयार रहो

३४“अपन ध्यान रखा, ताकि तोहरे केर मन कोनो डट केर पीएक पियाएक आउर सांसारिक चिंतामान से जड़ित न होए जाओक। आउर उ दिन एकठु फंदा केर रकाम तोहार में अचानक न आए जाओक। ३५निश्चय उसोउब ई समूचा धरती में राहेक वालामान में एसानेहे आए गिरी। ३६हर समय सतर्क रहा, आउर प्रार्थना करा कि तोहरे उ सोभे बातमान से, जे घटेक वाला आहे, बचेक केर शक्ति पाए जाबा। आउर आत्म-विश्वास केर साथे मनुष्य केर बेटा केर सामने खड़ा होए सकबा।”

३७प्रतिदिन उ मन्दिर में उपदेश देवात राहे किन्तु, राईत बिताएक केर लाई उ हर साँझ के जैतून नामक पहाड़ में चईल जात राहे। ३८सोभे आदमीमान उकार बातमान के फाजिर होते कि उईठके मन्दिर में उकार ठिन जाएके, सुनात रहाँ।

यीशु के हत्या केर षड्यन्त्र

(मत्ती २६:१-५, १४-१६; मरकुस १४:१-२, १०-११;

यूहन्ना ११:४५-५३)

२२

१जेखान फ़सह नाम केर बिना खमीर केर रोटी केर पर्व आवेक राहे। २उदियो प्रमुख याजक तथा यहूदी धर्मशास्त्रीमान, काहेकि आदमीमान के डरात रहाँ ईकार से कोनो ऐसान सुबिधा केर ताक में रहाँ। जेकार से उमान यीशु के मोराएक पारबाँ।

यहूदा केर षड्यन्त्र

(मत्ती २६:१४-१६; मरकुस १४:१०-११)

३आउर ईस्करियोती कहलाएक वाला उ यहूदा में, जे उ बारहइन में से एकइन राहे, शैतान आपके समाए गेलक। ४उ प्रमुख याजकमान आउर अधिकारिमान केर ठिना गेलाक आउर उमान सागें यीशु के उ कैसान धारुवाए, ईकार बारे में बातचीत करलक। ५उमान बहुत खुशी होलाँ आउर ईकार लाई उके धन देवेक केर सहमत होए गेलाँ। ६उ भी राजी होए गेलाक आउर उ ऐसान अवसर केर ताक में राहेक लगलक जेखान भीड़-भाड़ नी राहबाँ आउर उ उके उमान केर हाथ में सौँईप देई।

फ़सह की तैयारी

(मत्ती २६:१७-२५; मरकुस १४:१२-२१;

यूहन्ना १३:२१-३०)

७आउर बिना खमीर केर रोटी केर उ दिन आलक जेखान फ़सह केर मेमना के बली देवेक होएला। ८सेहेसे उ ईके

कईके पतरस आउर यहून्ना के भेजलक, “जावा आउर हमार लाई फ़सह केर भोज तैयार करा ताकि हमरे उके खाए सकबोई।”

९उमान उके पूछलाँ, “हमरे उकार तैयारी कहाँ करबोई तोय्रं कहाँ करेक के खोजाथिस?”

उ उमान के कहलक, १०“तोहरे जैसानेहे नगर में प्रवेश करबा तोहरे के पानी केर कलसी लेई जाएकवाला एकइन व्यक्ति मिली, उकार पीछे पीछे जाबा आउर जे घर में उ जाई तोहरेमान भी चईल जाबा। ११आउर घर केर मालिक के कहबा, ‘गुरु तोके पूछेक भेजाहे कि उ अतिथि-कमरा कहाँ आहे जहाँ मोंय अपन चेलामान केर सागें फ़सह पर्व केर भोजन कईर सकबों।’ १२आउर उ व्यक्ति तोहरे के सीढ़ि केर ऊपरे सजा-सजाया एकठु बड़का कमरा देखाई, हुवाँ तैयारी करबा।”

१३उमान चईल गेलाँ आउर वैसानेहे पालाँ जैसान उ उमान के बताए राहे। आउर उमान फ़सह भोज केर तैयार करलाँ।

प्रभु केर अन्तिम भोज

(मत्ती २६:२६-३०; मरकुस १४:२२-२६;

१ कुरिन्थियो ११:२३-२५)

१४आउर उ समय आलक जेखान यीशु अपन चेलामान केर सागें भोजन करेक बैठलक। १५उ उमान के कहलक, “यातना उठाएक पहिले ई फ़सह केर भोजन तोहार सागें करेक केर मोर बहुत ईच्छा राहे। १६काहेकि मोंय तोहरे के कहाथों कि जेखान तक परमेश्वर केर राईज में ईसोउब पूरा नी होए जाई तब तक मोंय ईके दुबारा नी खाबों।”

१७आउर उ कटोरा उठाएके धन्यवाद देलाक आउर कहलक, “लेवा ईके आपस में बाँईट लेवा। १८काहेकि मोंय तोहरे के कहाथों आज केर बाद जेखान तक परमेश्वर केर राईज नी आए जाई मोंय कोनो भी दाखरस कभी नी पिबों।”

१९आउर उ थोड़ा रोटी लेलाक आउर धन्यवाद देलाक। उ उके टुकड़ा करलक आउर उमान के देई के कहलक, “ईठु मोर शरीर हेके जे तोहार लागिन देवाल जाहे। मोर याईद में एसानेहे करबा।” २०एसानेहे जेखान उमान भोजन कईर चुकलाँ होले उ कटोरा उठालक आउर कहलक, “ई प्याला मोर उ लोहू केर रूप में एकठु नौतून प्रतिज्ञा केर प्रतीक हेके जेके तोहार लागिन उँडेल देवाल जाहे।”^a

^a २२:२० कोनो कोनो यूनानी प्रति में पद १९ केर अन्तिम शब्द आउर पद २० नी पावाए जाएला।

यीशु केर विरोधी केहार होई?

११“किन्तु देखा, मोके जे घोखा से धारुवाई, उकार हाथ हियाँए टेबल में मोर सागों आहे। १२काहेकि मनुष्य के बेटा तो माराए जाईये जैसान कि सुनिश्चित आहे किन्तु धिक्कार आहे उ व्यक्ति के जेकार द्वारा उ धारुवाल जाई।”

१३एहे से उमान आपस में एक दूसरे के पुच्छेक लगलाँए, “उमान में से उ के होए सकेला जेहार ऐसान करेक खोजाथे?”

सेवक बना

१४आउर उमान में ई बात भी उठलक कि उमान में से सोबसे बड़का केके समझल जाई। १५किन्तु यीशु उमान के कहलक, “गैर यहूदीमान केर राजा उमान में प्रभुत्वा रखेना आउर उमान जे उसोउब में अधिकार केर प्रयोग करेना, ‘स्वयं के आदमीमान के उपकारक’ कहुवाएक खोजेना। १६किन्तु तोहरे वैसान न होबा लेकिन तोहार माझे होले सोउबसे बड़काइन सोउबसे छोटो जैसान होएक लगे आउर जे प्रमुख हेके उ सेवक केर समान होवेक लगे। १७काहेकि बड़का के हेके: उ जेइन खाएक लाई टेबन में बैठे या उ जेइन उके परोसेला? का ओहेइन नाए जानों जे टेबल में आहे किन्तु तोहरे केर बीच मोंयं वैसाने आहों जेइन परोसेला।

१८“किन्तु तोहरे उमान हेका जेमान मोर परिक्षामान में मोर साथ देला। १९आउर मोंयं तोहरे के वैसानेहे एकटु राईज देवाथों जैसान मोर परम पिता ईके मोके देई राहे। २०ताकि मोर राईज में तोहरेमान मोर टेबल में खावा आउर पिया आउर ईसाएल केर बारह जनजातिमान केर न्याय करते सिंहासनमान में बैठा।

विश्वास बनाए रखा

(मती २६:३१-३५; मरकुस १४:२७-३१;

यूहन्ना १३:३६-३८)

२१“शमौन, हे शमौन, सुन, तोहरे सोब के गेहूँ केर रकाम पटकेक केर लाई शैतान चुईन लेहे। २२किन्तु मोंयं तोहार लागिन प्रार्थना कईरों कि तोहरे केर विश्वास न डगमगाओक आउर जेखान तोयं वापस आबे होले तोर संगमान केर शक्ति बढ़ोक।”

२३किन्तु शमौन उके कहलक, “हे प्रभु, मोंयं तोर सागों जेल जाएके आउर मोरेक लाई भी तैयार आहों।”

२४आउर यीशु कहलक, “पतरस, मोंयं तोके बताथों कि आईज जेखान तक मुर्गा नी डाकिं सेखान तक तोयं तीन बार मना कईर देबे कि तोयं मोके नी जानोन काईके।”

यातना झेलेक लाई तैयार राहा

२५आउर यीशु अपन चेलामान के कहलक, “मोंयं जेखान तोहरे के बिना बटुवा, बिना थैला या बिना चप्पल से भेईज राहों होले का तोहरे केर कोनो वस्तु केर कमी होए राहे?”

उमान कहलाँए, “कोनो वस्तु केर नई।”

२६उ उमान के कहलक, “किन्तु एखान जेकारो टिन कोनो भी बटुआ आहे, उ उके लेई लयेओक आउर उ थैला भी लेई चालोक। आउर जेकार टिन तलवार नैखे, उ अपन कुर्ता के बेईच के उके किन लेओक। २७काहेकि मोंयं तोहरे के बताथों कि शास्त्र केर ई लिखाल मोर में निश्चय ही पूरा होई:

‘उ एकइन अपराधी समझाए जाए राहे।’

यशायाह ५३:१२

हाँ मोर सम्बन्ध में लिखाल ई बात पूरा होएक लाई होवाथे।”

२८उमान बोललाँए, “हे प्रभु, देख, हियां दुईटु तलवार आहे।”

एहेसे उ उमान के कहलक, “बस बहुत आहे।”

प्रेरितमान के प्रार्थना केर आदेश

(मती २६:३६-४६; मरकुस १४:३२-४२)

२९-४०आउर उ हुवाँ से उईठ के सोउबदिन केर जैसान जैतून — पर्वत में चईल गेलाक। आउर उकार चेलामान भी उकार पीछे पीछे गेलाँए। उ जेखान उ जगह में पहुँचलक होले उ उमान के कहलक, “प्रार्थना करा कि तोहरे के परीक्षा में पड़ेक न होक।”

४१आउर उ कोनो पत्थर के जेतना दूर तक फेंकेक सकाएला, लगभग ओतने दूर अलगे चईल गेलाक। आउर उ घुटना टेईक के निर्हारलक आउर प्रार्थना करेक लगलक, ४२“हे परम पिता, यदि तोर ईच्छा आहे होले ई प्याला के मोरसे दूर हटाए दे किन्तु फिर भी मोर नई, लेकिन तोर ईच्छा पूरा होक।” ४३सेखने एकइन सोरगदूत हुवाँ प्रकट होलाक आउर उके शक्ति प्रदान करेक लगलक। ४४हुने यीशु बड़ी बेचैन केर साथ आउर अधिक तीव्रता से प्रार्थना करेक लगलक। उकार पसीना खुन केर बूँद केर समान धरती में गिरात राहे। ४५आउर जेखान उ प्रार्थना से उईठके अपन चेलामान केर टिन आलक होले उ उमान के शोक में थईकेके निन्दाल पालक। ४६सेहेसे उ उमान के कहलक, “तोहरे काहे

v २२:४४ कोनो यूनानी प्रतिम में पद ४३ आउर ४४ नैखे।

निन्दाए आहा? उठा आउर प्रार्थना करा कि तोहरे कोनो परीक्षा में न गिरबा।”

यीशु के बंदी बनाएक

(मती २६:४७-५६; मरकुस १४:४३-५०;

यूहन्ना १८:३-११)

४७उ सेखान बोलते राहे कि एकटु भीड़ आए जमान होलाँए। यहूदा नाम केर एकझन व्यक्ति जे बारह चेलामान में से एकझन राहे, उमान केर अगुवाई करत राहे। उ यीशु के चूमा करेक लाई उकार ठिन आलक।

४८लेकिन यीशु उके कहलक, “हे यहूदा, का तोयं एक चुम्बन केर द्वारा मनुष्य केर बेटा के धोखा से धाक्वाएक जाथिस।” ४९जे घटना घटेक जात राहे, उके देखेके उकार आसपास केर आदमीमान कहलाँए, “हे प्रभु, का हमरे तलवार से वार करबोई?” ५०आउर उमान में से एकझन तो प्रमुख याजक केर दास के वार कईके उकार दाहिना कान के काईटे देलाक।

५१किन्तु यीशु तुरथे कहलक, “उमान के ईके भी करेक देवा।” आउर यीशु उकार कान के छूई के चंगा कईर देलाक।

५२आउर यीशु उकार ऊपरे चढ़ाई करेक आवाल प्रमुख याजकमान, मन्दिर केर अधिकारिमान आउर बुजुर्ग यहूदी नेतामान के कहलक, “का तोहरे तलवार आउर लाठिमान के लेई के कोनो डाकू के सामना करेक निकईला कि? ५३मन्दिर में मोंयं हर दिन तोहारे सागें राहों, किन्तु तोहरे मोर में हाथ तक नी लगाला। लेकिन ईटु समय तोहरे केर हेके। अन्धकार केर शासन काल।”

पतरस केर ईन्कार

(मती २६:५७-५८, ६९-७५; मरकुस १४:५३-५४,

६६-७२; यूहन्ना १८:१२-१८, २५-२७)

५४उमान उके बंदी बनाए लेलाँए आउर हुवाँ से लेई गेलाँए। आउर उमान उके प्रमुख याजक केर घर लेई गेलाँए। पतरस थोड़ा दूरे से उकार पीछे पीछे आवात राहे। ५५आँगना केर बीच में उमान आगुन सुलगालाँए आउर एके सागें नीचे बैठ गेलाँए। पतरस भी हुवाँए ओहेमान संग में बैठ राहे। ५६आगुन केर इजोत में एकझन दासी उके हुवाँ बैठाल देखलक। उ उके भाल से देखेके कहलक, “ई आदमी भी उकार सागें राहे।”

५७किन्तु पतरस ईन्कार कईके कहलक, “हे स्त्री, मोंयं उके नी जानोना।” ५८थोड़ा देरी पीछे एकझन दोसरा

व्यक्ति उके देखलक आउर कहलक, “तोयं भी ओहेमान में से एकझन हेकिस।”

किन्तु पतरस बोललक, “भाला आदमी, मोंयं उझन न लगों।”

५९लगभग एक घन्टा बीत राहे कि कोनो आउर एकझन भी जोरसे कहेक लगलक, “निश्चय ई व्यक्ति उकार सागें भी राहे। काहेकि देखा ई गलील वासी भी हेके।”

६०किन्तु पतरस बोललक, “भला आदमी, मोंयं नी जानार्थो तोयं केकार बारे में बात कराथिस।”

ओहे समय, उ जेखान बात करत राहे कि एकटु मुर्गे डांकलक। ६१आउर प्रभु घुईर के पतरस के देखलक। सेखने पतरस के प्रभु केर उ वचन याईद आलक जे उ उके कई राहे, “आईज मुर्गे डांकेक से पहिले तोयं मोके तीन बार नकाईर चुकबे।” ६२सेखान उ बाहिरे चईल गेलाक आउर हुकाईर-हुकाईर के कान्दलक।

यीशु के उपहास

(मती २६:६७-६८; मरकुस १४:६५)

६३जे व्यक्तिमान यीशु के धाईर रहाँए उमान उकार उपहास करेक आउर उके पीटेक लगलाँए। ६४उकार आँईख में पट्टी बाँईध देलाँए आउर उके ई कईके पूछेक लगलाँए कि, “बताओ जेझन तोके मारलक उ के हेके?” ६५उमान उकार अपमान करेक केर लाई उके आउर भी बहुत से बातमान कहलाँए।

यीशु यहूदी नेतामान केर सामने

(मती २६:५९-६६; मरकुस १४:५५-६४;

यूहन्ना १८:१९-२४)

६६जेखान दिन होलाक होले प्रमुख याजक आउर धर्मशास्त्रिमान समूचा आदमीमान आउर बुजुर्ग नेतामान केर एकटु सभा होलक। आउर उ आदमीमान उके अपन महासभा में लेई गेलाँए। ६७उमान पूछलाँए, “हमरे के बताओ का तोयं मसीह हेकिस?”

यीशु उमान के कहलक, “यदि मोंयं तोहरे के कहबों होले तोहरे मोर विश्वास नी करबा। ६८आउर यदि मोंयं पूछबों होले तोहरे उत्तर नी देबा। ६९किन्तु एखान से मनुष्य के बेटा सर्वशक्तिमान परमेश्वर केर दाहिना दिगे बैठाल जाई।”

७०उमान सोभे बोललाँए, “होले का तोयं परमेश्वर केर बेटा हेकिस?” उ उमान के कहलक, “हाँ, मोंयं हेको।”

७१आउर उमान कहलाँए, “एखान हमरे के आउर कोनो प्रमाण केर आवश्यकता का आहे? हमरे स्वयं ईकार अपन मुँख से ई बात के सुईन तो लेली।”

पिलातुस द्वारा यीशु के पूछताछ

(मत्ती २७:१-२, ११-१४; मरकुस १५:१-५;

यूहन्ना १८:२८-३८)

२३

१आउर उमानक सारा पंचायत उईठ खड़ा होलाँए आउर उमान उके पिलातुस केर सामने लेई गेलाँए। २उमान उकार ऊपरे अभियोग लगाएक लगाँए। उमान कहलाँए, “हमार आदमीमान के बहकाएक समय ई व्यक्ति के हमरे धार्डीरी। ई कैसर के मासुल चुकाएक केर विरोध करेला आउर अपन के मसीह आउर एकइन्न राजा कहेला।”

३एहे से पिलातुस यीशु के पूछलक, “का तोयं यहूदीमान केर राजा हेकिस?”

यीशु उके उत्तर देलाक, “तोय्रे तो कहाथिस, मॉयं ओहेइन्न हेकों।”

४एहे से पिलातुस प्रमुख याजकमान आउर भीड़ के कहलक, “मोके ई व्यक्ति में कोनो आरोप केर कोनो आधार नी देखाई देथे।”

५लेकिन उमान ईके कहते जोर करात रहाँए कि, “ई समूचा यहूदिया में आदमीमान के अपन उपदेशमान से भडकाए देहे। ईके ई गलील में शुरु कइरे राहे आउर एखान समूचा रास्ता पार कइरेके हिय्राँ तक आए पहुँचैवे।”

यीशु के हेरोदेस टिन भेजेक

६पिलातुस ईके सुईनके पूछलक, “का ई व्यक्ति गलील केर हेके?” ७आउर जेखान उके ई पता चललक कि उ हेरोदेस केर अधिकार क्षेत्र केर अधीन आहे होले उ के हेरोदेस टिन भेईज देलाक जे उ समय यरूशलेम में राहे।

८सेहेसे हेरोदेस जेखान यीशु के देखलक होले उ बहुत खुश होलक काहेकि बरसों से उ उके देखेक खोजात राहे। काहेकि उ उकार विषय में सुईन चुईक राहे आउर उकार कोनो अद्भुत काम करेक के देखेक केर आशा करात राहे। ९उ यीशु के बहुत प्रश्न पूछलक किन्तु यीशु उके कोनो उत्तर नी देलाक। १०प्रमुख याजक आउर यहूदी धर्म शास्त्रीमान हुवाँए खड़ा रहाँए आउर उमान उकार ऊपरे बिना-मिछा केर दोष लगात रहाँए। ११हेरोदेस भी अपन सैनिकमान समीत उकार साथे अपमानपूर्ण व्यवहार करलक आउर उकार हँसी उड़ाकलक। आउर उमान उके एकठु उत्तम कुर्ता पिन्धाएके पिलातुस टिन वापस भेईज देलाक। १२उ दिन से हेरोदेस आउर पिलातुस एक दूसरा केर सागीं बईन गेलाँए। ईकार पहिले तो उमान एक दूसरा केर शत्रु रहाँए।

यीशु के मोरेक होई

(मत्ती २७:१५-२६; मरकुस १५:६-१५;

यूहन्ना १८:३९-१९:१६)

१३आउर पिलातुस प्रमुख याजकमान, यहूदी नेतामान आउर आदमीमान के एके सागें बोलालक। १४उ उमान के कहलक, “तोहरे ईके आदमीमान के भटकाएक वाला एकइन्न व्यक्ति केर रूप में मोर टिना आईनहा। आउर मॉयं हिय्रां एखान तोहरे केर सामनेहे ईकार जाँच पड़ताल करलों आउर तोहरे ईकार ऊपरे जे दोष लगाएहा उकार न तो मोके कोनो आधार मिले आउर १५न ही हेरोदेस के काहेकि उ ईके वापस हमार टिन भेईज देईहे। जैसान कि तोहरे देखेक सकला कि ई ऐसान कोनो नी कइरे कि ई मौत केर भागी बनी। १६ईकार लाई मॉयं ईके कोड़ा मरुवाए के छोईड देवों।” १७^v

१८किन्तु उमान सोभे एके सागें चिल्लाँए, “ई आदमी के लेई जा। हमार लाई बरअब्बा के छोईड दे।” १९(बरअब्बा के शहर में मार धाड़ आउर हत्या करेक केर जुर्म में जेल में डालाल राहे।)

२०पिलातुस यीशु के छोईड देवेक खोजात राहे, सेहेसे उ उमान के फिर से समझालक। २१लेकिन उमान नारा लगाते रहाँए, “ईके क्रूस में चढ़ाए दे, ईके क्रूस में चढ़ाए दे।”

२२पिलातुस उमान के तीसरा बार पूछलक, “किन्तु ई व्यक्ति का अपराध कइरेहे? मोके ईकार विरुध में कोनो नी मिले जे ईके मृत्यु दण्ड केर भागी बनाई। ईकारलाई मॉयं कोड़ा लगुवाएके ईके छोईड देवों।”

२३लेकिन उमान ऊँचा स्वर में नारे लगाए लगाए के माँग करात रहाँए कि उके क्रूस में चढ़ाए देवाल जाओक। आउर उमान केर नारा केर हुलुस्तुल ईतना बईड गेलाक कि २४पिलातुस निर्णय देई देलाक कि उमान केर माँग माईन लेवाल जाओक। २५पिलातुस उ व्यक्ति के छोईड देलाक जेके मार धाड़ आउर हत्या करेक केर जुर्म में जेल में डालाल जाए राहे (ई ओहे राहे जेके छोईड देवेक केर उमान माँग करात रहाँए) आउर यीशु के उमान केर हाथ में सौँईप देलाक कि उमान जैसान खोजबाँए, करोक।

यीशु के क्रूस में चढ़ाव जाएक

(मत्ती २७:३२-४४; मरकुस १५:२१-३२;

यूहन्ना १९:१७-१९)

२६जेखान उमान यीशु के लेई जात रहाँए होले उमान

^v २३:१७ कोनो यूनानी प्रति में पद १७ जोड़ाल जाहे: “पिलातुस के फ्रसह पर्व में हर साल जनता केर लाई कोनो एकइन्न बंदी के छोडेक होआत राहे।”

कुरैन केर रहेक वाला शमौन नाम केर एकड़न व्यक्ति के, जे अपन खेत से आवात राहे, धाईर लेलाँए आउर उकार ऊपरे क्रूस लाईद के उके यीशु केर पीछे पीछे चलेक लाई वेवश करलाँए।

२०आदमीमान केर एकठु बड़का भीड़ उकार पीछे पीछे जात रहाँए। ईमान में काईड़न ऐसान स्त्रीमान भी रहाँए जेमान उकार लागिन कान्दते रहाँए आउर शोक करात रहाँए। २१यीशु उमान दिगे मुडलक आउर बोललक, “यरूशलेम केर बेटीमान, मोर लाई न कन्दा लेकिन स्वयं अपन लागिन आउर अपन संतानमान केर लाई शोक करा। २२काहेकि ऐसान दिन आवाथे जेखान आदमीमान कहबाँए, “उ स्त्रीमान धन्य आहाँए, जेमान बाँझ आहाँए आउर केखनो केखो भी जन्म नी देवाल गर्भ धन्य है। धन्य आहाँए जेमान स्तन केर कभी दूध नी पियाहाँए।” ३०आउर उमान पर्वतमान के कहबाँए, “हमार ऊपरे गिर जा” आउर पहाड़मान के कहबाँए “हमेरे के ढाँईप दे।” ३१काहेकि आदमीमान जेखान काचा गाछ, उकार साथे ऐसान कराथाँए होले जेखान गाछ सूईख जाई सेखान का होई?”

३२दुईड़न आउर व्यक्तिमान, जे दुनोंड़न अपराधी रहाँए, उकार सागें मृत्यु दण्ड केर लाई बाहिर लेई जात रहाँए। ३३आउर जेखान उमान उ जगह में आलाँए जे “खोपड़ी” कहाल जात राहे होले उमान उ दुनों अपराधिमान केर सागें उके क्रूस में चढ़ाए देलाँए, एकड़न अपराधी के उकार दाहिना दिगे दूसरा के बाँयें दिगे।

३४एहसे यीशु बोललक, “हे परम पिता, ईमान के क्षमा कर काहेकि ईमान नी जानाथाँए कि ईमान का कराथाँए सेके।”

आउर उमान पासा फेंईक के उकार कपड़ा केर बटवारा कइर लेलाँए। ३५हुवाँ खडाल आदमीमान देखात रहाँए। यहूदी नेतामान उकार उपहास कइरके बोललाँए, “ई दोसरामान केर उद्धार करलक। यदि ई परमेश्वर केर चुनाल मसीह हेके होले ईके अपन के अपनेहेके रक्षा करेके देवा।”

३६सैनिकमान भी आएके उकार उपहास करलाँए। उमान उके सिरका पीथेक लाई देलाँए ३७आउर कहलाँए, “यदि तोयं यहूदीमान केर राजा हेकिस होले अपने के बचाए ले।” ३८(उकार ऊपरे ई सूचना लिखाल जाए राहे, “ई यहूदीमान केर राजा हेके।”)

३९हुवाँ टांगाए देवाल अपराधिमान में से एकड़न उकार अपमान कइरके कहलक, “का तोयं मसीह ना लागिस जानों? हमरे के आउर अपने के बचाए ले।”

v २३:३४ यीशु बोललक, “हे परमपिता ... कराथाँए” पहिले केर कोनो यूनानी प्रति में ई भाग नखे।

४०किन्तु दोसरान उ पहिला अपराधी के गारियाए के कहलक, “का तोयं परमेश्वर के नी डराईसिला? तोके भी ओहे दण्ड मिलाथे। ४१किन्तु हमार दण्ड तो न्याय पूर्ण हेके काहेकि हमरे जे कुछ करली, उकार लागिन जे हमरे के मिलेक राहे, ओहेतु मिलाथे लेकिन ई व्यक्तिड़न तो कोनो भी बुरा नी कइरह।” ४२आउर उ बोललक, “यीशु जेखान तोयं अपन राईज में आवे होले मोखो याईद रखबे।”

४३यीशु उके कहलक, “मोंयं तोके सच कहायों, आईजे तोयं मोर सागें सोरगलोक में राहबे।”

यीशु केर देहान्त

(मत्ती २७:४५-५६; मरकुस १५:३३-४१;

यूहन्ना १९:२८-३०)

४४उ समय दिन के बारह बईज राहे सेखाने तीन बजे तक समूचा धरती में गहरा अंधकार छाए गेलाक। ४५सूरज भी नी चमकत राहे। हुने मन्दिर में परदा फईट के दुई टुकड़ा होए गेलाक। ४६यीशु ऊँचा आवाज में पुकारलक, “हे परम पिता, मोंयं अपन आतमा तोर हाथ में सौईप देवाथों।” ईके कइके उ अपन प्राण छोईड देलाक।

४७जेखान रोमी सेनानायकड़न, जे कुछ घटालक, उके देखलक होले परमेश्वर केर प्रशंसा कइरके उ कहलक, “ई निश्चय ही एकड़न अच्छा मनुष्य राहे।”

४८जेखान हुवाँ देखेक आवाल जमा आदमीमान, जे कुछ होलाक, उके देखलाँए होले उमान अपन छाती पीटते पीटते घुईर गेलाँए। ४९किन्तु उमान सोभे जेमान उके जानात रहाँए, उ स्त्रीमान समेत, जेमान गलील से उकार पीछे पीछे आवात रहाँए, ई घटना के देखेक लाई थोड़ा दूरे में खड़ाए रहाँए।

अरमतियाह केर यूसुफ

(मत्ती २७:५७-६१; मरकुस १५:४२-४७;

यूहन्ना १९:३८-४२)

५०-५१हुवाँ यूसुफ नाम केर एकड़न पुरुष राहे जे यहूदी महासभा केर एकड़न सदस्य राहे। उ एकड़न अच्छा धर्मी पुरुष राहे। उ उमान केर निर्णय आउर उके काम में लानेक केर लाई सहमत नी राहे। उ यहूदीमान केर एकठु नगर अरमतियाह केर निवासी राहे। उ परमेश्वर केर राईज केर बाट जोहात राहे। ५२उ व्यक्ति पिलातुस केर ठिन गेलाक आउर यीशु केर शव के मांगलक। ५३उ शव के क्रूस से नीचे उतारालक आउर सन केर उत्तम रेशमी केर बनाल कपड़ा में उके लपेईट देलाक। आउर उ उके चट्टान

में काटाल एकटु कबर में रईख देलाक, जेकार में पहिले कभी केखो नी रखाल जाए राहे। ५४उठु शुक्रवार केर दिन राहे आउर सब्त केर शुरु होवेक वाला राहे।

५५उ स्त्रीमान जेमान गलील से यीशु केर सागें आए रहौए, यूसुफ केर पीछे गेलौए। उमान उ कबर के देखलौए, आउर देखलौए कि उकार शव कबर में कैसान रखाल जाहे। ५६आउर उमान घर घुईर के सुगंधित सामग्री आउर लेप तैयार करलौए।

सब्त केर दिन व्यवस्था केर विधि केर अनुसार उमान आराम करलौए।

यीशु केर फिर से जी उठेक

(मती २८:१-१०; मार्कुस १६:१-८; यूहन्ना २०:१-१०)

२४ १सप्ताह केर पहिला दिन बहुत फाजिरे हे उ स्त्रीमान कबर में उ सुगंधित सामग्री के, जेके उमान तैयार कईर रहौए, लेई के आलौए। २उमान कबर से पत्थर लुढ़काल मिललक। ३सेहेसे उमान भीतरे चईल गेलौए किन्तु उमान हुवाँ प्रभु यीशु केर शव के नी मिललक। ४जेखान उमान सेकार से उलझन में रहौए कि, उमान ठिन चमचमाते पोशाक पिन्धाल दुईझन व्यक्ति आए खड़ा होलौए। ५डर के मारे उमान माटि दिगे हेठमुड़ियाए रहौए। उ दुनों व्यक्तिमान उसोउब के कहलौए, “जे जीवित आहे, उके तोहरे मुर्दामान केर बीच काहे खोईज चलाथा? ६उ हियाँ नैखे। उ जी उठालक। याईद करा जेखान उ गलील में राहे, उ तोहरे के का कई राहे। ७उ कई राहे कि मनुष्य केर बेटा के पापीमान केर हाथ में सौँपाए जाएक निश्चित आहे। आउर उके क्रूस में चढ़ाए देवाल जाई आउर तीसरा दिन उके फिर से जीवित कईर देवेक निश्चित आहे।” ८“सेखान उ स्त्रीमान के उकार शब्द याईद होए गेलाक।

९उमान कबर से घुईर आलौए आउर उमान ई सोब बातमान के उ ग्यारह आउर अन्य सोभे कोई के बतालौए। १०ई स्त्रीमान रहौए मरियम-मगदलीनी, योअन्ना आउर याकूब केर माए, मरियम। उमान तथा उमान सागें केर दोसरा स्त्रीमान भी ई बातमान के प्रेरितमान के कहलौए। ११लेकिन उमान केर बात के प्रेरितमान व्यर्थ सौँईचलौए। सेहेस उमान उसोउब के विश्वास नी करलौए। १२किन्तु पतरस खड़ा होलाक आउर कबर दिगे कुईद गेलाक। उ नीचे झुईक के देखलक लेकिन उके सन केर उत्तम रेशमी से बनाल कफन केर अतिरिक्त कोनो नी दिखाई देलाक। आउर अपने मने मन जे कुछ होए राहे, उकार में अचरज करते हुवाँ से उ चईल गेलाक।^a

^a २४:१२ कोनो यूनानी प्रतिम में ई पद नैखे।

ईम्माऊस केर रास्ता में

(मार्कुस १६:१२-१३)

१३ओहे दिन उकार दुईझन चेलामान, यरूशलेम से सात माईल दूर रहाल ईम्माऊस नाम केर गाँव में जात रहौए। १४जे घटनामान घईट राहे, उ सोब के उमान आपस में बातचीत करते जात रहौए। १५जेखान उमान उ बातमान के चर्चा आउर सोच विचार करते रहौए सेखने स्वयं यीशु हुवाँ आपके उपस्थित होलाक आउर उमान सागें-सागें चलेक लगलक। १६(किन्तु उमान के उके चिन्हेक नी देवाल गेलाक।) १७यीशु उमान के कहलक, “चलते चलते एक दोसरे से तोहरे का बात केर चर्चा करथा?”

उमान रुईक गेलौए। उमान बहुत दुखी दिखाई देत रहौए। १८उमान में से किलयुपास नाम केर एकझन व्यक्ति उके कहलक, “यरूशलेम में रहेक वाला तोयं एकला ऐसान व्यक्ति हेकिस जे पिछले दिन में जे घटना घटलक, उके नी जानिसिला।”

१९यीशु उमान के पूछलक, “का बात?”

उमान उके कहलौए, “सोब नासरी यीशु केर बारे में हेके। उ एकझन ऐसान व्यक्ति राहे जेझन जेसोउब करलक आउर कहलक उ परमेश्वर आउर सोभे आदमीमान केर सामने ईके देखाए देलाक कि उ एकझन महान् नबी राहे। २०आउर हमरे एहे बारें में बात करात रही कि हमार प्रमुख याजकमान आउर शासकमान उसे कैसान मृत्यु दण्ड देवेक केर लाई सौँईप देलौए। आउर उमान उके क्रूस में चढ़ाए देलौए। २१हमरे आशा करात रही कि ई ओहे राहे जे ईसाएल के मुक्त कराताक।

“आउर ई सोब कुछ केर अतिरिक्त ई घटना केर घटाल आईज तीसरा दिन हेके। २२आउर हमार टोला केर काएझन स्त्रीमान हमरे के अचम्भित में डाईल देलौए। आईज फाजिरे उमान कबर में गेलौए। २३किन्तु उमान के, उकार शव नी मिललक। उमान घुईर आलौए आउर हमरे के बतालौए कि उमान सोरगदूतमान केर दर्शन पालौए जेमान कहलौए कि उ जीवित आहे। २४आउर हमरें से काएझन कबर में गेलौए आउर जैसान स्त्रिमान बताए रहौए, उमानों हुवाँ वैसानेहे पालौए। उमान उके देईख नी पालौए।”

२५सेखान यीशु उमान के कहलक, “तोहरे कितना मूरख हेका आउर नबीमान जे कुछ कहलौए, उकार में विश्वास करेक में कितना भोदा आहा। २६का मसीह केर लाई ईटु आवश्यक नी राहे कि उ ई यातनामान के भोगी आउर ई प्रकार अपन महिमा में प्रवेश करेक केर?” २७आउर एहे रकाम मूसा से शुरु कईरके सोब नबीमान तक आउर समूचा शास्त्र में उकार बारे में जे

कहाल जाए राहे, उ उसोउब केर व्याख्या कईरके उमान के समझालक।

२८उमान जेखान उ गाँव केर पास आलाँए, जहाँ जात रहाँए, यीशु ऐसान बर्ताव करलक, जैसान कि उके आगे जाएक आहे। २९किन्तु उमान उके जोर से आग्रह कईरके कहलाँए, “हमार सागें रुईक जा काहेकि लगभग साँझ होए चुईके आउर एखान दिन ढईल चुईके।” सेहेसे उ उमान केर सागें ठहरेक भीतरे आए गेलाक।

३०जेखान उमान सागें उ खाएक केर टेबल में राहे सेखान उ रोटी उठालक आउर धन्यवाद करलक। आउर उके टुकड़ा कईर के जेखान उ उमान के देत राहे ३१सेखने उमान केर आँईख खोईल देवाल गेलाक आउर उमान उके चिन्हं पालाँए। किन्तु उ उमान केर सामने से अदृश्य होए गेलाक। ३२आउर उमान आपस में बोललाँए, “रास्ता में जेखान उ हमार सागें बात करात राहे आउर हमरे के शास्त्रमान के समझात राहे होले का हमार हृदय के भीतरे आगुन रकाम नी भड़कत उठात राहे जानों?”

३३आउर उमान तुरथे खड़ा होलाँए आउर वापस यरूशलेम में चईल देलाँए। हुवाँ उमान ग्यारह प्रेरित आउर दोसरे आदमीमान उमान के सागें ईकट्टा मिललाँए, ३४जेके कहत रहाँए, “हे प्रभु, वास्तव में जी उईठे। उ शमौन के दर्शन देलाक।”

३५आउर उ दुनोंझन रास्ता में जे घईट राहे, उकार ब्योरा देईके आउर बतालाँए कि जेखान उ रोटी केर टुकड़ा लेई राहे, सेखान उमान यीशु के कैसान चिन्हं पाए रहाँए।

यीशु केर अपन चेलामान केर

सामने प्रकट होएक

(मती २८:१६-२०; मरकुस १६:१४-१८;

यूहन्ना २०:१९-२३; प्रेरितमान केर काम १:६-८)

३६जेखान उसोउब उमान के ई बातमान के बताते रहाँए कि उ स्वयं उमानक बीच आएके खड़ा होलाक आउर उमान के बोललक, “तोहरे के शान्ति मिलोक।”

३७किन्तु उमान चौईके के भयभीत होए गेलाँए। उमान सोचलाँए जैसा कि उमान कोनो भूत के देखाताँए रकाम। ३८किन्तु उ उमान के बोललक, “तोहरे ऐसान घबराल काहे आहा? तोहरे के मन में संदेह काहे होवाथे? ३९मोर

हाथ आउर मोर गोढ़ के देखा। मोके छुवा, आउर देखा कि कोनो भूत केर माँस आउर हड्डी नी राहेला आउर जैसान कि तोहरे देईख पाथा कि, मोर सोभे आहे।”

४०ईके कईके उ हाथ आउर गोढ़ के उमान के देखालक। ४१किन्तु अपन आनन्द के कारण उमान सेखनो भी उकार में विश्वास नी करेक सकलाँए। उमान बिस्मित होए रहाँए सेहेसे यीशु उमान के कहलक, “का तोहार टिन कोनो खाएक वस्तु आहे?” ४२उमान पकाल मछरी केर एकटु टुकड़ा उके देलाँए। ४३आउर उ उके लेईके उमानक सामनेहे खालक।

४४आउर उ उमान के कहलक, “ई बातमान उसोउब हेके जेके मॉय्र तोहरे के उसमय कई रहों, जेखान मॉय्र तोहार सागें राहों। हर बात जे मोर विषय में मूसा केर व्यवस्था में नबीमान तथा भजन केर पुस्तक में लिखाल आहे, पूरा होएक आहे।”

४५आउर पवित्र शास्त्र के समझेक केर लाई उ उमानक बुद्धि केर द्वार खोईल देलाक। ४६आउर उ उमान के कहलक, “ई ओहे हेके, जे लिखाल आहे कि मसीह यातना भोगी आउर तीसरा दिन मोरालमान में से जी उठी। ४७-४८आउर पापमान केर क्षमा केर लाई मनफिराव केर ई संदेश यरूशलेम से शुरु होएके सोब देशमान में प्रचार कराल जाई। तोहरे ईसोउब बातमान केर साक्षी हेका। ४९आउर मोर परम पिता मोरसागें जे प्रतिज्ञा कईरह, उके मॉय्र तोहर लागिन भेजबों। किन्तु तोहरे ई नगर में उ समय तक ठहार्हर रहेक होई, जेखान तक तोहरे सोरग केर शक्ति से परिपूर्ण नी होवात ताकले।”

यीशु केर सोरग वापसी

(मरकुस १६:१९-२०; प्रेरितमान केर काम १:९-११)

५०यीशु आउर उमान के बैतनिय्याह तक बाहिरे लेई गेलाक। आउर उ हाथ उठाए के उमान के आशीर्वाद देलाक। ५१उमान के आशीर्वाद देईके उ उमान के छोईड देलाक आउर उके सोरग में उठाए लेवाल गेलाक। ५२सेखान उमान उकार आराधना करलाँए आउर बहुत आनन्द केर साथ उमान यरूशलेम घुईर आलाँए। ५३आउर मन्दिर में परमेश्वर केर स्तुति करते करते उमान अपन समय बिताएक लगलाँए।